

Luk

Węi tópuratere whi Jon deyaalopóló yale fo

¹ Kótóné eraalopóló muló betere fo dā tuǵpaae mo eró betepa, mepaae whiné kolóló aseǵalepó.

² Ai whirape atima kǵleaané aseǵni, yale alarape mo kelale whirapené deté wale fotóró yó maté wou betalepó. Ai whirapeta, kale fo wisi kae fotamo hoseké eraǵsóró hotowayóló kaae taru, yó mótu betalepó. ³⁻⁴ Mepaae whirapené deté wale fo aseǵale kaae, mió ǵalokélé ai fo wisiyóló taleyóló betemó kaae sóró, mo donotóró aseǵaai kisipa mutapó. Doa whi Tiopilus-ó, take mepaae whirapené ǵǵpaae yó melale fota, mo erapóló naao diriyóló tuǵ ǵaasepóló, ǵǵlo i aseǵtere ape.

⁵ Kale Judia hae kwia tǵteróló kaae tare topo whi Herot betale alimó etéǵalepó. So whimó Talepaae momaratere whi betǵ beterepó. Ai whiǵta, Lipai faketei, Abaijané deté wale whi Sekaraiapó. Ama soma Elisabet-ta, momaratere topo whi Eron-né deté wale sopó. ⁶ Kótóné keletómó atimaamo mo donoi soró whiǵtamo bitu, Kótóné yóló muló betere fo aǵmó sukóló, ama erae dere ala betǵ eraté fu betalepó. ⁷ Atéretei, kale so Elisabet atimaamo naale senaalekélé mei, ni daayóló betepa, sokélé sere yóo, whikélé otere yóo ǵalepó.

⁸ Atéro betere tuǵmó Abaija fake whirapené so whimó momarǵpóló, tukóló muló betere be dǵmó Sekaraiaró ama fake whiǵtamoné momatere

be kaae tarepó. Atéru, Sekaraia ą so whįmó momarótu betalemó etéyalepó. ⁹ So whįmó momaratere whįrape atima mara mole ala sya furaalu, atimané doi mole ni fakerape fesekée deralemó, Sekaraiané doi mole ni fake dono fetée horóló muni dorowalepó. Atétepa, ą kale momatere be tuąpaae fóló, felé ąlaa wale fetera kaae ąla si keletómó biliyóppóló, atimané ą sóró beteralepó. ¹⁰ Atéró, kale felé ąlaa wale fetera kaae ąla simó sukųlaa dalatere sukamó ą momatere be dolopaae fóló, simó terepetu betalepó. Atétu betepa, mepaae momayaai wale so whį atima belamó kaae taru momatu betalepó.

¹¹ Até du betepa, Talené dotonale *ensel* wóló, kale felé ąlaa wale ąla bilitere tiki turu naase dęró daapa kelalepó. ¹² Ai *ensel* sókó walemó, Sekaraia kilita sókó furaalu, mo winé sukutu betalepó. ¹³ Tétepa, kale *ensel*-né ąpaae duraalu, “Sekaraia-ó, yą wiyaąse, naao du betale moma Talené wosalepó. Naao so Elisabet naale deyaalo ai ape. Téyaalopa, ama doi Jon mulae. ¹⁴ Ai naale detere kilituraalu, yą doasi haįné sukó, mo so whįkélé ai naale kilituraalu, haįné sukó yóló Talepaae mo kée du betaalo ai ape. ¹⁵ Ti noatepae, Talené keletómó ą mo doasi whį betaalopó. ą doayóló bitukélé, *wain* węiró topo doyóló keyaa fole węitamo naalomeipó. ą hamané depemó betepatei, kale Dęi Kepe Wisi ą tuąmó fąayóló mo sųró betaalopó. ¹⁶ Atéru, take kópaee fu betere Israel fake só whį atima tęteróló kaae tare Kótó aqmó beteróppóló, ai naalené momó dapesó waalo ai ape. ¹⁷ Tale wóppóló folosóró ąpi wouraalu,

ama yaaire alata, take betale wh̄i Ilaija ̄a keperó fotok̄otamo ̄āanuraalu du betale ala kaae, ai seké ̄a tūamókélé até yaalopó. Ai naale doayóló bitu, alimaraperó naale senaaletamopaae momó hosaa muópóló, atima tué tiki feteraalo ai ape. Atéturaalu, mepaae Kótóné fo woseni dow̄aae fu betere so wh̄i Kótóné donoi ala tūamó wisi kisi-patamo beterópóló eraalopó. Atéturaalu, so wh̄i fea Tale beterepaae faaire ala amatei, donoróló beteraalo ai ape,” yalepó.

¹⁸ Atéró Sekaraiané *ensel*-paae duraalu, “Atei ala mo eraalopóló ȳalo noayóló kisi-pa yaaloé? Ti ̄e otere yóo, ȳalo sokélé sere yóo, erapó,” yalepó.

¹⁹ Tétepa, kale *ensel*-né ̄a paae duraalu, “̄Eta Kótóné keletómó daalu i ala yae depa du betere *ensel* Kebriel-pó. Mió i dere fo wisi ȳalo ȳapaae yó melópóló, ama ̄e ȳa beterepaae dotonatepa wóló ȳatamo fo i du betere ape. ²⁰ Mió ȳalo i dere fo wosóló kisi-pa tiki tiréni depa, ti naao fo aluyaalo ai ape. Ȳa atéatei bitiré fóló, mió i dere fo dokonóló eratere sukamó ti naao fo momó yaalo ai ape,” yalepó.

²¹ Téró, Sekaraia momatere be dolopaae holóló betepa, belamó ̄a kaae tawóló betó mole so wh̄iné duraalu, “̄A mo taketi holaletei, diki du betere-a, noakó su bitu dérópó,” du betalepó. ²² Téró kale wh̄i ̄a belapaae dorowóló atimapaae fo yaairetei s̄uni, ama fo alureteiné naasené maaté du betepa, so wh̄iné etei kisi-pa mualepó. Be tūamó Talené me alakó ̄a paae nokené dere ala kaae eratepa kilitu yalepó du betalepó.

²³ Atéró, momatere be tūamó kutó diyópóló

dãle mulale be de kemetepa, ama bepaee felepó.
²⁴ Ai alarape yale k̄lipaae ama soma Elisabet naale yalepó. Atétepa, kale so ą kelaqsóro ama bemó kinóló betepatei, wélié aporó kemeyalepó.
²⁵ Ȧ atéro bitu duraalu “Take ę ni daapa so wh̄j feané faletu betaletei, mió i be demó Talené ępaee erale wisi alané so wh̄j feané keletómó yãlo hale kemeralepó,” yalepó.

Yesu deyaalopóló yale fo

²⁶ Téró, kale so ą naale yóló betepa, apomi wélié tuamó Kótóné ama *ensel* Kebriel, Kaleli haemó tene Nasaret be huluapaae dotęyalepó.
²⁷ Atéro, kale *ensel* Kebriel betą so seimale Maria beterepaae felepó. Ai sota, Depit fake wh̄kó Josep-né dokaaيراalu tukóló betero beterepó.
²⁸ Téró, kale *ensel* ą beterepaae fóló duraalu, “Talené hękesere so seimale-ó, Tale yątamo ai betere ape,” yalepó.

²⁹ Atei fo Mariané woseturaalu, etei kaae kęleó dere fo-a, noa betené dérópóló ą kisipa teketu betalepó. ³⁰ Até du betepa, kale *ensel*-né ąpaee duraalu, “Maria-ó, Kótóné ama yą mo wisiyóló kolóló hosaa mutu, yąpaee wisi ala eraai dapa, wiyaęse. ³¹ Yąta, naale yaalo ai ape. Ai naale detepa, ama doi Yesu mulae. ³² Ȧ doasi topo wh̄j betepa kilituraalu, so wh̄j feané mo ó taoró betere Kótóné Naalemapó du betaalo ai ape. Ai naaleta, take ama noumatere Depit bitu yale kaae, so wh̄j fea tęteróló kaae tanópóló, Kótóné amatei ą doasi wh̄j sóro beteraalo ai ape. ³³ Ȧta topo wh̄j bituraalu, Jekop-né firale fakerape tęteróló kaae

tare ala kemekélé ini, haḷe yótóro tawaalopó,” yalepó.

³⁴ Tétépa, Mariané *ensel*-paae duraalu, “Èta, wh̄tamokélé konipa, ai ala neyóló yaaloé?” yalepó.

³⁵ Ai fo depa, *ensel*-né aḷpaae tokó mótu duraalu, “Kale D̄ei Kepe Wisi ya tuḷpaae biṭi waalopó. Téturaalu, mó ó taoró betere Kótóné fotokḷné ya t̄eteróló husuró betaalo ai ape. Ai deyaaire naaleta, me dowi alakélé muni, mo kae naale detepa so wh̄i feané kilitu, ita Kótóné Naalemapó fo yaalo ai ape. ³⁶ Aita ya maaté mei, naao kekelé so Elisabet-kélé seretei naale erapó. Upulé a ni daapa mepaae so wh̄iné atei serené naale deyaalomeipó dua yaleteti, mió a naale epa, apomiró wélié kemeyalepó. ³⁷ Ti fea ala fea Kótóné s̄umó enénipóló de?” yalepó.

³⁸ Ai fo depa, Mariané aḷpaae duraalu, “Ti èta Kótóné ama kutó diratere so betepa, naao yale fotóro ama aḷpaae erópóló yae,” yalepó. Téró, kale *ensel* felepó.

Maria a Elisabet k̄le fele fo

³⁹ Atéyale be d̄emótóro, Maria a ḷla ḷla hapale sisóló ai be hulua taaróló, Judia du sorokó mole haemó t̄ene be huluapaae felepó. ⁴⁰ Atéró, kale so a Sekaraiaró somatamo betere be dolopaae fóló, Elisabet-paae duraalu, “Fapa k̄leó,” yóló apualepó. ⁴¹ Mariané Elisabet-paae ai dere fo woseturaalu, Elisabet-né depemó betere naale toróyó holalepó. Atéturaalu, D̄ei Kepe Wisi

à tuámó fàayóló suralepó. ⁴² Atéru Elisabetné fo fakeyóló duraalu, “Sorape fea betó mupatei, yà betà Tale Kótóné mo wisiró beterapó. Atéturaalu, naao deyaaire naalekélé ama mo wisiró beterapó. ⁴³ È mé so wisi betepa, è teteróló kaae tare Talené hama naao è kẹle waleé? ⁴⁴ Naao kọleó dere fo woseturaalu, yàlo depemó betere naalekélé hẹkesené sukutu toróyọ holalepó. ⁴⁵ Kótóné yàpaae eraalopó yale fo wosóló, naao kisipa tiki tiralemó yà wisiró betepa, mióta yà hẹkesené sukàe,” yalepó.

Mariané Kótóné doi hale horótu yale wole fo

- ⁴⁶ Téro, Mariané duraalu,
 “Yàlo hosaa tuámó Talené doi hale sóró horatapó.
⁴⁷ Yàlo hosaa turónékélé è aluyaşsóro tao sale Kótópaae mo kée yóló hajiné sukutapó.
⁴⁸ Ti èta, kutó diratere doi muni sókótei so betepatei, ama è wisiyóló tao salepó.
 Mió i be demó kaae sóró bitiré faaire so whị feané è kilituraalu, ita Kótóné wisiró betere sopó yaalo ai ape.
⁴⁹ Ti noatepae, mo doa fotokọ bole Tale Kótóné emó mo doakale ala eralepó.
 Ama doi mo kae muluraalu, dowi ala mo betàkélé munire Talepó.
⁵⁰ Mepaae so whị de Kótópaae winé sukóló à aqmó dua betepa, ama kọlené sukutere ala mió i alimó betere so whịpaaekélé, take bitiré faaire so whịpaaekélé, hẹle yó tarapó.
⁵¹ Ama doasi bole fotokọné mepaae doasi alarape eralepó.

Atéturaalu, mepaae wh̄i de atima kisipanétei duraalu, ‘Ēta mo doasi seké wh̄i beter-apóló,’ bopé faketu betale wh̄irape dapo dapo yóló f̄ópóló, h̄okó faralepó.

52 Mepaae t̄eteróló kaae tare doasi topo wh̄irapené kaae tare alarape ama kemeróló, haepaae só deróo, mepaae naameyóló sókótei betere so wh̄i ama sikipaae horóo, yalepó.

53 Mepaae wotené sukutere wh̄irape ama ɔla wisi melóló hairóo, mepaae ɔla ɔla dekéro mole néli so wh̄i h̄ale f̄ópóló dotonóo, dua yalepó.

54 Ama kutó diratere Israel fake wh̄irape kisipa keteréni, k̄olené sukuturaalu, atima tao sere ala h̄ale yó tarapó.

55 Talené Abraham-ró ama deté faaire naaletamopaae wisi ala eraalopó yóló mulale fo keteréni, d̄ané ayarapepaaekélé eralepó.

Atéyale kaae, mió i alimó d̄apaaekélé ama k̄olené sukutere ala h̄ale yó tarapó,” yalepó.

56 Téró, wélié soremó Maria ɔ Elisabet-tamo beteró, nalo ama bepaae fesaae felepó.

W̄ei tópuratere wh̄i Jon deyale fo

57 Téró etéyalepó. Kale so Elisabet ɔ naale saaitere be d̄emó ama naale dealepó. 58 Tale Kótóné doasi k̄olené sukuturaalu, ɔpaae erale alamó Talepaae mo kée yóló doasi h̄ekese yalepó. Atétepa, ama be wh̄i so wh̄iró kekelé so wh̄itamokélé ama dere h̄ekese kaaetóro du betalepó.

⁵⁹ Atéró kale so naale sóró beteró, bokó wale be demó ama tiki sekaꝝ tukóló siriróo, kale naalené doikélé alima Sekaraiané doi yakoróo yaai, ama fake so wh̄i walepó. ⁶⁰ Até yaaitepa, ama hama Elisabet-né duraalu, “Meipó. Ama doita, Jon mulaai dapó,” yalepó.

⁶¹ Ai fo depa, atimané ɔpaae duraalu, “Yɔ fake wh̄ikó mo betɔkélé atei doi munipó,” yalepó.

⁶² Ti fo depa, atimané alimapaee naasené maaté yóló duraalu, “Naao kisipané ɔ de doi mulaaloé?” yalepó. ⁶³ Tétepa, ama atimapaee naasené maaté yóló duraalu, aɕɕtere sóku sóró ape depa, sóró walepó. Atéró, ai kale sóró wale ɔla tómó Jon doi aɕɕyalepó. Ai doi aɕɕtere kilituraalu, so wh̄i feané haió yóló, sirayalepó. ⁶⁴ Até yaletamotoró Sekaraia ɔ fo aluretei momó duraalu, Kótóné doi hale sóró horalepó. ⁶⁵ Atimaamoné be felekemó betó mole so wh̄iné atétere ala kilitu, me ala kae dapóló winé sinalepó. Du sorokó mole Judia hae kwiamó betó mole so wh̄i feapaae i ala yalepóló deté kwɛyóló fakeralepó. ⁶⁶ Mepaae i fo wosale so wh̄iné “I naaleta, Tale Kótóné mo doasi fotokɔ beté ɔ tuɔmó mupa kilitu, take doayóló ɔ noa kaae wh̄i betaalorópó,” du betalepó.

Sekaraiané yale wole fo

⁶⁷⁻⁶⁸ Kale naale Jon-né alima Sekaraia Dɛi Kepe Wisiné fotokɔratepa, Kótóné ɔpaae yae depa mo so wh̄ipaae duraalu,
 “Dɔné Talené doi hale sóró horaalopó. Israel fake so wh̄i tɛteróló kaae tare Kótópaae mo kée du betae.

- Ti noatepae, ɗa ama so wh̩póló dupuró beteraṗó.
- 69 Ama kutó diratere wh̩ Depit-né firale fake tuamó Kótóné wh̩ bet̩ soro betero beteraṗó.
- Ai sekéné ama fotokóné ɗa i hae so wh̩ aluyaqsoro tao saalopó.
- 70 Ti mo take Kótóné ama kae betero betere kolo wh̩rapené yale fo mo dokonóturaalu yaleṗó.
- 71 ɗa bóe wh̩ kuamó betepa, ama tao saalopó. Téturaalu, mepae wh̩né dowi kisipa muoló ɗatamo bóe dupa, ama fotokóné sesé yaalopó.
- 72 ɗané ayarape ama kisipa keteréni, kolené sukuturaalu mió ɗa tao saaire wh̩ doton-aalopó.
- 73 Ti aita haḷe mei, Kótóné ɗané aya Abraham-pae i ala eraalopó mo dirii fo yoló muló betereiteinéṗó.
- 74 Take ai yoló muló betere fo dokonóturaalu, bóe wh̩rapené ɗa dolo teteraqsoro, tao soro betero beteraṗó.
- Atérené mió ɗa wikélé ini, halaainé Kótóné kutó bet̩ dirótu betenéraṗó.
- 75 Ti betere dok̩ fea ɗa ama keletómó ama kae ere alaró mo donoi alatamo tuamótóro betó tawaalopó.
- 76 Yaṭa, yaḷo naaleṗó. Take nalopae so wh̩ feané ya kilituraalu, mo taoro betere Kótóné ama kolo wh̩pó yaalopó.
- Ti Tale waaipa yaṗi folosoro wouraalu, a waaire tu donoraē yaaire wh̩ betaalopó.

- 77 Téturaalu, Kótóné ama so whjné dowi alamó melaaire kwia aluróló tao saaire ala naao atimapaae yó melaalo ai ape.
- 78 Ti Kótóné kōle dere ala ama hosaa tuámó f̄aneteiné ai ala eraalopó.
Ti atéyaaire alata, h̄jka teó sokotere suka d̄ané tikimó felétu dere kaae, Kótóné ama hepen-mó ere d̄ d̄ betere tūpaae eraalopó.
- 79 Ti aita, noa yaai mei, mepaae diliki tuámó betó mole so whjró mo felekemó suk̄ai du betere so whj̄tamo Kótóné hosaa muni deyóló dua betere ala tūpaae bitj̄ f̄ópóló, ai d̄éné yó melaalopó,” yalepó.
- 80 Atéró, kale naale ̄ doaturaalu, ama kepe tūpaaekélé doasi fotok̄ bualepó. Atéru, ̄ Israel so whj̄ beterepaae h̄kearóló sókó waairaalu, so whj̄ bitini h̄le wópu tikimó bitiré felepó.

2

Yesu deale fo (*Mat 1:18-25*)

- ¹ Ai alarape du betale tuámó etéyalepó. Rom *Gavman* topo whj̄ Sisa Akastus-né i hae kwiamó betó mole so whj̄ doi siré kw̄yae yóló mulalepó.
- ² Atéró so whj̄ doi saleteita, Siria hae kwia Kwirinius-né t̄teróló kaae tapa, folosóro kaae sutóro yalepó. ³ Atétepa, kale so whj̄ mo fea doi s̄póló, atimané turuku be séle sélepaae felepó.
- ⁴ Atétepa, Josep ̄ Depit-né deté wale whj̄ ereteiné Kaleli hae kwiamó t̄ne Nasaret be taaróló, Judia haemó t̄ne Depit-né be hulua

Betelehem-paae felepó. ⁵ Ama dokaai tukóló beteró betere so Maria naale epa, atimaamoné doikélé mulaai felepó. ⁶ Atéro fóló, atimaamo ai bemó betepa, kale so naale saaire be de sókó walepó. ⁷ Ai be demó kale soné ama topo naale deyalepó. Atéro, kale naale kutiné bope yóló hupurape ɔla melótua dere ni fakené aleyale nuku tómó beleró beterepó. Ti noatepae, uké wale so whiné fitere be fʌaneteiné yalepó.

Ensel-rapené sipsip hupu kaae tare whirapepaae yale fo

⁸ Téro etéyalepó. Ai hae kwiamó mepaae *sipsip* hupu kaae tare whirape ai be hulua taaróló, ne yó molepaae fóló, dikitamo atima hupurape kaae tawóló betó molepó. ⁹ Atéro beteremó, Talené *ensel* betʌ atima betere tikimó sókó wouraalu, Talené ama ere doasi dené atima betere tikikélé deyó felepó. Atéteremó atima fea winé sukutu betalepó. ¹⁰ Atétepa, kale *ensel*-né atimapaae duraalu, “Diʌ wiyaʌse, ɛta i hae kwia feamó betó mole so whiné wosóló doasi hajné sukʌaire fo wisinaale ene walepó. ¹¹ Diʌ i haemó betó mole so whi aluyaʌsóró, tao saaire whi mió i be demó Depit-né be huluamó ai deyale ape. ʌta, Kótóné so whi fea teteróló kaae tanʌpóló, sóró beteró betere Kerisopó. ¹² Diʌ fóló kelenalemó, miótóró deale naale kutiné bopeyóló hupurape ɔla melótua dere ni fakené aleale ɔla tómó beleró betepa kilituraalu, ita kale bope yale naale hʌtipó yaalo ai ape,” yalepó.

¹³⁻¹⁴ Atéro, mo tétitóró kale *ensel* betʌ daalepaae ó hepen bemó betó mole *ensel*-rape

mo hãle ɔla kaae dorowóló daae mulu, Kótóné doi hale sóró horótu duraalu,

“Mo taoró betere Kótóné doasi mole doi hale sóró horae.

Kótóné ama tuéné wisi ala eraaitere so whĩpaae hosaa muni deyóló mo dua betere ala erópóló yae,” yalepó.

¹⁵ Kale *sipsip* hupu kaae tare whĩrape betó mu-patei taaróló, *ensel*-rape hepen-paae fesaae holalepó. Atétepa, kale whĩrape atimasisi duraalu, “Talené dɔpaae yó melale ala kelaai, Betelehem be huluapaae faalopa fiépe,” yalepó.

¹⁶ Atéró, atima hapale fóló Mariaró Josep-tamo betóo, kale naalekélé hupurape ɔla melótua dere ɔla tómó firóo, epa kelalepó. ¹⁷ Atimané kale naale kolóló *ensel*-rapené atimapaae yale fo so whĩ feapaae deté kweyóló fakeralepó. ¹⁸ Ai fo depa wosale so whĩ feané ita, noa kaae fo yalerópóló, sirayóló tué teketu betalepó. ¹⁹ Até du betepatei, Mariané ai dere fo wosóló, ama hosaamó muló bitu kisipa hãle yó tarepó. ²⁰ Téró, kale *sipsip* hupurape kaae tare whĩrape atima bepaae fesaae furaalu, kale *ensel*-rapené atimapaae i ala epa kelaalo ai ape, yale ala motóró epa kelaletiné Kótóné doi hale sóró horaté fu betalepó.

Yesu momatere bepaae yó male fele fo

²¹ Atéró kale naale sóró bitiré fóló, bokó wale be demó ama tiki siriróló Yesu doi mulalepó. Aita kale so naale yaaipatei, *ensel*-né mulae yale doipó.

²² Moses-né ašémó soné naale sale tiki Talené keletómó wisiyópóló, kaae tawae ere be de keme-tepa, Josep-ró Mariatamo kale naale Talepaae melaai dapóló, Jerusalem bepaee dapesó felepó.

²³ Aita hałe meipó. Talené fo tuamó “Topo naale Talepaae melae,” ere fo sya furaalu yalepó.

²⁴ Téró, me ere fo i ape. “Beta soné naale senaale detepa, kale soné naale ditu yale ala Talené wisirópóló, ba hókóserere tamo ó sukusi tamo Talemó melae,” ere fo sya furaalu atéyalepó.

²⁵ Até yale sukamó, Jerusalem bemó whi betané doi Simeon beterepó. Ata, mo donoyóló bituraalu, Kótóné ala beta erótu betale whipó. Atéro, kale Israel fake so whi dowi sekei ala tuamó betepa, tao saaire whi wópóló, kale Deji Kepe Wisi atamo betamó beterepó. ²⁶ Apaae kale Deji Kepe Wisiné etei fo yóló munélipakalepó. Ya hapale sukuni, Talené sóró betero betere whi Keriso kolóló sukalo ai ape. ²⁷ Atéyale sukamó, Simeon otere Deji Kepe Wisiné fotokratepa, momatere be tuapaae fóló beterepó. Atéro beterepó, kale yóló muló betere foné yae ere ala yaairaaalu, hamaró alimatamoné Yesu apuóló momatere bepaee sókó walepó. ²⁸ Atéro wapa, kale Simeon oterené kale naale tao sóró ama naase tómó beleróló, Kótóné doi hale sóró horótu duraalu,

²⁹ “Qla qla fea tetteróló kaae tare Tale-ó, naao kale yóló mulale fo mió mo dokonatereteiné naao kutó diratere whi sukutepa, hosaa muni deyóló dua fópóló yae.

³⁰⁻³¹ Ti noatepae, naao so whi aluyaqsóró, tao saaire ala so whi feané keletómó donoróló

muló betepa mió yalo i keletere ape.

³² Ai dené Juda mei, kae fake so whi tuapaae Kótóné ere ala hakearatepa kolóló tué yóo, Israel fake so whikélé doasi doi sóo, yaalopó,” yalepó.

³³ Téró, kale naale hamaró alimatamoné Simeon oterené yale fo wosóló, haió i yale fo-a, noa betené yalerópóló siratu betalepó.

³⁴ Kale Simeon oterené atima wisiraterere fo yóló, hama Mariapaae duraalu, “I naalenéta, Israel fake so whi fea haepaae só deróo, mepaae so whi tao sóró sikipaae horóo, yaalopó. Atétere ala kilituraalu, Kótóné hiróló mole ala so whi feapaae hakearóló yó matepa, mepaae so whiné ai dere fo wosaalomeipóló, a só deraalo ai ape.

³⁵ Atétere alané mepaae so whiné hosaa tuamó mole tué tiki hakeamó mulaalopó. Atéteremó, sepake kwia kaaené naao hosaamó deyaalo ai ape,” yalepó.

³⁶⁻³⁷ Aimó Kótóné ama betá kóló so wulia Aser fakekó Fanuel-né senaalema Anakélé beterepó. Ama whitamó dokóló betepa weikeró ba fo kemeyóló, oma sukutepa wulia bitu kemeyale ba fotamó touróturaalu 84 ba fo biti serepó. Atéro Kótópaae kisipa tiró bitu, momatere be taaréni, dikitamokélé, detamokélé, moma dere ala hãle yó tarepó. Atéru, a ɔla weyóló bitu, moma dere ala betá dua yalepó. ³⁸ Téró ai fapotóro kale so Ana atima beterepaae sókó wóló Kótópaae mo kée yóló, Jerusalem bemó betó mole so whi aluyaqsóro dupuróló tao saaire whi wópóló kaae

tare so wh̄ipaae kale naale i ape yóló yó mótu betalepó.

³⁹ Atéró, Josep-ró Mariatamoné Talené yae yóló muló betere alarape yóló kemetepa, Kaleli haemó t̄ene atimané diri Nasaret be huluapaae momó fesaae felepó. ⁴⁰ Kale naale ą doaturaalu, mo doasi fotok̄o buóo, tuę tiki dotoróę fóló fosó fosó yóo, Kótóné ąpaae hosaa muóló yaala sókó fío erapó.

Yesu ą teó naale belek̄amale, momatere bemó betere fo

⁴¹ Téro etéyalepó. Kale bosenée fele be de sókó wapa ąla deteremó, ama hamaró alimatamo ba fo dok̄o fea Jerusalem be huluapaae fua yalepó. ⁴² Kale naale doayóló 12 ba fomó betepa, atima dua dere kaae, ąla detere sukamó atimaamo Jerusalem be huluapaae holalepó. ⁴³ Kale bosenée fele be de mómó ąla detere ali kemetepa, ama hamaró alimatamo bepaae fesaae furaalu, kale naale Yesu Jerusalem bemó betepatei, fole so wh̄itamó fele nisyóló atimaamo felepó. ⁴⁴ Téro kale soró wh̄itamóné kisipané so wh̄itamó fole nisyóló atimaamokélé fu betepa, be de bet̄a kemeyalepó. Atéró fóló kale naale atimaamoné fake so wh̄iró fulumu wh̄irapetamo betere tikimó kek̄alepó. ⁴⁵ Até yalemó bitinipa, kek̄ai Jerusalem be huluapaae momó fesaae felepó. ⁴⁶ Atéró kekitu betepa, be de sore h̄ale kemeyóló nalo kale momatere be bopére tipí tuamó betepa kelalepó. Atéru, mepaae Juda yó matere wh̄irapené dere fo wosóo, mepaae wosetere forapekélé yóo du betalepó. ⁴⁷ Kale

naale atéro kisipa fosó fosóru atimané ɔpaae wosetere fo mo donotóro tokó matepa wosetu-raalu, whjrape feané siratu betalepó. ⁴⁸ Atétere ala hamaró alimatamoné kilitu, atimaamo kilita sókó fóló hamané ɔpaae duraalu, “Ti naale-ó, ayanaao dɔmo yɔ whaaliala depa kekɔle supa, noatepa atei kaae ala yaleé?” yalepó.

⁴⁹ Ti fo depa, atimaamopaae duraalu, “Yɔlo ayané ɛ beterópóló ere bemó fóló beteretei di-aamo tué iniru ɛ kekenapó,” yalepó. ⁵⁰ Ama ai yale fo bete atimaamoné diriyóló wosóló kisipa sinipó.

⁵¹ Téró, kale naale ama hama alimatamo Nasaret be huluapaae fóló, atimaamoné dere fo betɔ wosóló aɔmó sukóló beterepó. Téruraalu, Yesuné ama yale fo fea hamané kisipa keteréni, ama hosaamó muló beterepó. ⁵² Téró, Yesu ɔ teó doatutei kisipa tiki dotoróɛ fóló, fosó fosói naale wisi doatepa Kótónékélé, mo so whjnékélé, hɛsekeyóló ɔpaae hosaa mualepó.

3

Wɛi tópuratere whj Jon-né yó male fo (Mat 3:1-12, Mak 1:2-8, Jon 1:19-28)

¹ Taiperius Sisa 15 ba fo tuamó ɔ topo whj bituraalu, Rom hae kwia mo fea ama tɛteróló kaae tarepó. Atéyale sukamó, Pontias Pailat ɔkélé doasi *Gavman* topo whj bitu, Judia hae kwia tɛteróló kaae tawóo, Herot ɔkélé doasi topo whj bituraalu, Kaleli hae kwia tɛteróló kaae tawóo, ama noma Filip-né Ituraea hae kwiaró Trakonaitis hae kwiatamo tɛteróló kaae tawóo,

Lisantias a doasi topo whi bitu, Abilene hae kwia tetaroló kaae tawoo, erepó. ² Anas-ró Kaiapas-tamo Kótópaae momaratere doasi topo whi betere sukamó, Sekaraiané naalema Jon whi bitini wópu mole tikimó betepa, Kótóné fo a tuapaae sókó walepó. ³ Atéró, Jon a Jordan wei fole hae kwiamó tē mole be hulua dokopaae fóló, fo yó mótu betalepó. Atéró, Kótóné fo yó mótu duraalu, “Diaaḡ du betere dowi ala taaróló, Kótópaae kisipa tiki feteyóló ape. Atétepa, yaḡo diḡ wei tópuraaḡo ai ape. Diaaḡ dowi alamó saaire kwia Kótóné me ḡla meipóló, haḡle kemeraalo ai ape,” deté kutu betalepó. ⁴ Mo take betale Kótóné ama kóló whi Aisaiané aseḡóló muló betere fo mo donotóróti yalepó. Ai fo i ape.

“Whi betḡ haḡle wópu mole tikimó bitu fo fakeyóló duraalu,

“Tale waaire tḡ aleyae, a waaire tḡ donoraē.

⁵ Tukweḡ derepale tiki, hae mulóló wisiraē.

Doasi hasi uluró du sokoreteitamo dukḡyóló muluraē.

Wē wēre tukélé, mo donoyóló aleyae.

Kapo ó hapisaḡa muóló dore tḡ dukḡyóló taaē faróló wisiraē.

⁶ Até depa, ti Kótóné so whi fea aluyaḡsóró tao saaire ala wisi so whi mo feané kelaalo ai ape, ’ ” yalepó.

⁷ So whi mo fea Jon-né wei tópurópóló a beterepaaē wua depa, atimapaaē duraalu, “Diaaḡ dere alata, wuliné tḡ kotere kaaē dapó. Kótóné diḡtamo fopaaē butu taleyaḡsóró, mopaaē botokó faai de? ⁸ Diḡ dowi ala taaróló kisipa feteyóló tḡ wisipaaē fulapó du betere fo, haḡkeamó motóró du

betae. Ti noatepae, Abraham-ta diaaꝓ ayapó du betere fomó yaꝓo diꝓpaae i dere ape. I muó mole kapo fakerape Kótóné wh̄i aleyóló, Abraham-né naale senaale beteranérápó. ⁹ Talené kꝓwei ni bete dokꝓ taketi muló beterápó. Mepaae ninétamo du wisi olenitepa, ti ai nirape fea diyóló sipaae taae deraai Talené ama tꝓ ai ni betemó bukó tarapó.” yalepó.

¹⁰ Ai fo depa so wh̄i feané ꝓpaae duraalu, “Ti dané noa alakó yaaloé?” yalepó.

¹¹ Ti fo depa Jon-né atimapaee duraalu, “Me wh̄i dené kuti tamo deró betepa, me kuti sokóló yaꝓꝓare wh̄i melae. Wh̄i me dené ɔla huyóló mupa, ti aikélé betꝓ kaae alatóró yae,” yalepó.

¹² Mepaae *takis moni* siré kotere wh̄irape atimakélé w̄ei tópuuai dapóló wóló ꝓpaae woseturaalu, “Yó matere wh̄i-ó, dꝓ noa alakó yaaloé?” yalepó.

¹³ Tétepa, ama atimapaee duraalu, “Diaaꝓ *takis moni* siré kutu, bosenóló sini, sae yale sꝓtóró sae,” yalepó.

¹⁴ Ti fo depa, mepaae diki tare wh̄irape wóló ꝓpaae woseturaalu, “Dꝓ noa ala yaaloé?” depa ama duraalu wh̄iné *moni* saai, so wh̄i t̄eteréli fo yóló ó dilikóló saꝓse. Naa *Gavman*-né diꝓ matere *moni*-tóró tawóló betae. I sꝓ meipóló, dokó dokó yaꝓse,” yalepó.

¹⁵ So wh̄i feané Jon kilituraalu, i seké Kótóné sóró beteró betere wh̄i Keriso du yalepóló, tuꝓ tekitu betalepó. Ti noatepae, atima Keriso mo ke-laai kisipa mutu betaleteinépó. ¹⁶ Até du betepa, Jon-né atimapaee tokꝓ mótu duraalu, “Yaꝓota, diꝓ

węi maaté tópuratapó. Téteretei, mo doa seké whi betą waalo ai ape. Aąa ę kaae meipó. Ę a aąmó naale belekaamale kaae betereteiné yąlo ama hó be dokore képi teraayaairetei mo sunipó. Amata, kale Dęi Kepe Wisiró sitamoné dią węi tópuraalo ai ape. ¹⁷ Ama naasené *whit* betąpaae eróló kane fake kaae ąla tó mó mulóló, fumi beséné só fópóló epeyóló horatere ąla tarapó. Tétu, mo *whit*-ta betąpaae eróló mulótu beterapó. *Whit* fumita, mo sukókéle feni hąle dó tare sipaae taae deraalopó,” yalepó. ¹⁸ Atéró, Jon-né kale mió wosetere kisi fo wisi so whi feapaae yó melóturaalu, so whiné kisipa tiki feteraaire forapekéle, yó melótu betalepó.

¹⁹ Tétu betaletei, kale doasi *Gavman* topo whi Herot-né noma Filip-né sotei a dokóo, mepaae kae kae dowi alarape yóo, du betalepó. Até du betepa, Jon-né Herot-paae atei alarape taalae yóló, foné salepó. ²⁰ Herot-né take yale alarape tó mó, me i alakéle yalepó. Kale Jon *dipula* beteralepó.

Jon-né Yesu węi tópurale foró Yesu deté yale whirapené doirape

(Mat 3:13-17, Mak 1:9-11)

²¹ Atéyale sukamó, Jon-né so whi fea węi tópuróturaalu, Yesukéle węi tópuralepó. Atéró a momatu beteremó, ó hepen be tų tukwę fóló molepó. ²² Atépa, kale Dęi Kepe Wisi ba hókóserere kaae Yesuné tikimó bitį dorowalepó. Até dere-tamo, hepen beró fo fakeyóló duraalu, “Yąta, yąlo Naalepó. Nao dere ala wisi kilituraalu, ę mo doa

hękesenę sinitapó. Ti yaṭa yało mo yaala sókó fóló mole Naalepó,” yalepó.

²³ Téró etéyalepó. Yesu ą kutó kaae saai betale sukamó, 30 ba fo beterepó. ą atéro betepa so whįné ąta, Josep-né naalema nisi yalepó.

Josep-ta, Heli-né naalemapó.

²⁴ Heli-ta, Matata-né naalemapó.

Matata-ta, Lipai-né naalemapó.

Lipai-ta, Melki-né naalemapó.

Melki-ta, Janai-né naalemapó.

Janai-ta, Josep-né naalemapó.

²⁵ Josep-ta, Matatias-né naalemapó.

Matatias-ta, Amos-né naalemapó.

Amos-ta, Naham-né naalemapó.

Naham-ta, Esli-né naalemapó.

Esli-ta, Nakai-né naalemapó.

²⁶ Nakai-ta, Mat-né naalemapó.

Mat-ta, Matataias-né naalemapó.

Matataias-ta, Semen-né naalemapó.

Semen-ta, Josek-né naalemapó.

Josek-ta, Joda-né naalemapó.

²⁷ Joda-ta, Joana-né naalemapó.

Joana-ta, Resa-né naalemapó.

Resa-ta, Serubabel-né naalemapó.

Serubabel-ta, Sealtiel-né naalemapó.

Sealtiel-ta, Neri-né naalemapó.

²⁸ Neri-ta, Melki-né naalemapó.

Melki-ta, Adi-né naalemapó.

Adi-ta, Kosam-né naalemapó.

Kosam-ta, Elmadam-né naalemapó.

Elmadam-ta, Er-né naalemapó.

²⁹ Er-ta, Josua-né naalemapó.

Josua-ta, Elieser-né naalemapó.
Elieser-ta, Jorim-né naalemapó.
Jorim-ta, Matata-né naalemapó.
Matata-ta, Lipai-né naalemapó.
³⁰ Lipai-ta, Simeon-né naalemapó.
Simeon-ta, Juda-né naalemapó.
Juda-ta, Josep-né naalemapó.
Josep-ta, Jonam-né naalemapó.
Jonam-ta, Eliakim-né naalemapó.
³¹ Eliakim-ta, Melea-né naalemapó.
Melea-ta, Mena-né naalemapó.
Mena-ta, Matata-né naalemapó.
Matata-ta, Natan-né naalemapó.
Natan-ta, Depit-né naalemapó.
³² Depit-ta, Jesi-né naalemapó.
Jesi-ta, Obed-né naalemapó.
Obed-ta, Boas-né naalemapó.
Boas-ta, Salmon-né naalemapó.
Salmon-ta, Nason-né naalemapó.
³³ Nason-ta, Aminadab-né naalemapó.
Aminadab-ta, Atimin-né naalemapó.
Atimin-ta, Arni-né naalemapó.
Arni-ta, Hesron-né naalemapó.
Hesron-ta, Peres-né naalemapó.
Peres-ta, Juda-né naalemapó.
³⁴ Juda-ta, Jekop-né naalemapó.
Jekop-ta, Aisak-né naalemapó.
Aisak-ta, Abraham-né naalemapó.
Abraham-ta, Tera-né naalemapó.
Tera-ta, Nahor-né naalemapó.
³⁵ Nahor-ta, Seruk-né naalemapó.
Seruk-ta, Reu naalemapó.

Reu-ta, Pelek-né naalemapó.
 Pelek-ta, Eber-né naalemapó.
 Eber-ta, Sela-né naalemapó.
³⁶ Sela-ta, Kainan-né naalemapó.
 Kainan-ta, Arpaksat-né naalemapó.
 Arpaksat-ta, Sem-né naalemapó.
 Sem-ta, Noa-né naalemapó.
 Noa-ta, Lamek-né naalemapó.
³⁷ Lamek-ta, Metusela-né naalemapó.
 Metusela-ta, Enok-né naalemapó.
 Enok-ta, Jared-né naalemapó.
 Jared-ta, Mahalalel-né naalemapó.
 Mahalalel-ta, Kainan-né naalemapó.
³⁸ Kainan-ta, Enos-né naalemapó.
 Enos-ta, Set-né naalemapó.
 Set-ta, Adam-né naalemapó.
 Adam-ta, ti Kótóné naalemapó.

4

Satan-né Yesu dée nópóló sụ sale fo (Mat 4:1-11, Mak 1:12-13)

¹ Yesu ą Dęi Kepe Wisi fąayóló sụruraalu, Jordan węi taaróló wapa, Dęi Kepe Wisiné ą whi bitini, hąle wópu mole tikipaae ąlisóró felepó. ² ą aimó betepa, dowi Satan-né ą dée nópóló, sụ sere alarape deté fu betepa 40 be dęrape kemeyalepó. Atéyale be dęmó ą ọlakélé néni wote siri bitiré fóló, kemene folepaae ą wote yalepó.

³ Atéró betepa, dowi Satan-né ąpaae duraalu, “Yątamo Kótóné Naalemapata, ti i kapopaae *bred* o alée fae yae,” yalepó.

⁴ Ai fo depa Yesuné ɔpaae duraalu, “Tale Kótóné ašemó i fo erapó.

‘So wh̄i betereteita, mo ɔla maaté nukuraalu bitinipó erapó,’ ” yalepó.

⁵ Atéró, kale dowi Satan-né ɔ mo ópaae hore dupaae dapesó holóló daalu, i hae kwia dokɔ tɛtéróló kaae tare alarape fea ɔpaae tétitóró hapale yó melalepó. ⁶ Téró, ɔpaae duraalu, “Yɔlo yamó doasi doi muaaire alaró i haemó muó mole wisi wisi alatamo naao tɛtéróló kaae tawaasepóló melaalopó. Ti noatepae, take ɛpaae matepa taretei, mepaae yɔlo kisipa mole wh̄irape melaai depa, ti s̄umó manérápó. ⁷ Yɔlo i dere fotamo naao betɔ wosóló ɛ aqmó bitu, doa Tale-ó depa, ti i ɔla ɔla fea naaotóró tɛtéróló kaae tawaasepóló melaalopó,” yalepó.

⁸ Ti fo depa, Yesuné ɔpaae duraalu, “Kótóné ašemó ere fo i ape.

‘Tale Kótó mo betɔtóró beterapa, ɔ aqmó sinóló bitu, Aya doa Tale-ó, yóló ama ala betɔ erótu betae erapó,’ ” yalepó.

⁹ Téró, kale dowi Satan-né Jerusalem bemó tɛne momatere be hulua tómó dapesó holóló daaló bitu duraalu, “Yɔtamo Kótóné Naalemapata, ti haepaae t̄ú derepae. ¹⁰ Ti noatepae, ašemó i fo erapó.

‘Kótóné ama *ensel*-rapepaae yɔ me ɔlané doalé yaɔsóró, wisiyóló kaae tawae yaalopó.’

¹¹ Me fo i ape. ‘Yɔ atimané naase tómó muni durupuraalu, me ɔlané yɔ kotóo sóró doalé yaalomeipó,’ ” yalepó.

¹² Ai fo depa, Yesuné kale dowi Satan-paae duraalu, “Aşémó i fokélé erapó. ‘Naao Tale Kótóné ya tao sirémóló kãae kolóló sụ saqse,’ erapó,” yalepó.

¹³ Atéró, kale dowi Satan-né Yesu dée nópóló sụ sale kılıpaae me tẹ mutere sukamó momó sụ saai dapóló taaróló felepó.

Nasaret so whị Yesuné dere fo wosaalomeipó yale fo

(Mat 13:53-58, Mak 6:1-6)

¹⁴ Atéró, Yesu kale Dẹi Kepe Wisiné fo-tokqratepa, ą Kaleli hae kwiapaae momó fesaae felepó. ą atéró wóló beterafó dere fo ai hae kwiamó betó mole so whị feapaae deté kweyalepó. ¹⁵ Atéró, ą ai hae kwiamó bituraalu, atimané fo wosetere be dokọ fo yó maté kotopa, so whị feané ama doi hale sóró horótu betalepó.

¹⁶ Take ą doayóló betale Nasaret be huluapaae fóló bituraalu, kale sãa nokole be dẹmó ama dua dere kaae, fo wosetere be dolopaae holalepó. Atéró, Kótóné aşémó ere fo dosşayaaairaaalu turukó holalepó. ¹⁷ Kótóné ama kóló whị Aisaiané aşere *buku* bopeyóló moletei, ama dosşayópóló, whị mené ąpaae melalepó. Tétepa, ai *buku* sóró dãae faróló, ama tuę mole fo kekãlemó keletepa dosşayale fo ipó.

¹⁸ “Talené ama Dẹi Kepe Wisi ę tuşámó beteró beterafó. Ti aita hãle mei, ama kale fo wisi so whịpaae yó melópóló ę sóró beteralepó. Atéru, *dipula* kaae betere so whị hãle fópóló dotonóo, kele dilikire so whinė kele fisãae falóo, mepaae wae sóró

sonaalei ala tuamó beteró betere so wh̄i sokóló h̄ale beteróo yópóló, ę dotonalepó.

19 Talené so wh̄i wisiyóló beterópóló, ama kolené sukutu hamokoróló h̄ale tao sere ali i wale ape fo so wh̄ipaae yópóló, ę dotonalepó,” yalepó.

20 Téró, Yesuné kale f̄loi *buku* momó bopeyóló kaae tare wh̄ipaae melóló, ą bit̄i deyalepó. Atéró betepa, ai fo wosetere be dolomó betó mole so wh̄i feané ąpaaetóró kele fopolaa yalepó.

21 Téró, ama atimapaee momó duraalu, “Mió diaaq̄ wosale ašemó yóló muló betere fota, motóró dokonalepó,” yalepó.

22 Ama yó matere fo wosale so wh̄i feané i wh̄iné k̄lómó mo kok̄i fo wisinaale dapóló, siratu betalepó. Tétu atimasisitei duraalu, “Ita, Josep-né naalema meié?” yalepó.

23 Ai fo depa, Yesuné atimapaee duraalu, “I mara mole fo diaaq̄ ępaae mo enérápó. ‘*Dokta wh̄i-ó*, naaotei ą tikimó daale kisi bete wisirótimié? Ti Kapeneam be huluamó du betere alarape d̄ané wosalepa, umó erótu betale ala kaae naao i turuku bemókélé erótumié?’ ” yalepó.

24 Atéró ama atimapaee momó duraalu, “Ȳlo diąpaae mo i dere ape. Kótóné k̄ló wh̄iné ama be wh̄i so wh̄ipaae Kótóné fo i ape yóló yó matepa, atimané mo dapóló wosetimipó. 25 Ȳlo diąpaae mo i dapa wosae. Mo take Israel haemó Ilaija betale alimó mepaae sorape atimané wh̄i sukóló wulia betó molepó. Ai sukamó ba fo sorené wélié apo mirómó hali kinó betepa, hae kwia feamó ęla sóku aluyóló, wote ali walepó. 26 Téyaleteti,

Kótóné Ilaija dotonaletaitea, mo betą Israel fake sorapekó tao sópóló dotonénipó. Ténitei, Saidon hae kwiamó tene Sarepat be huluamó betere betą wulia so tao sene fópóló dotęyalepó. ²⁷ Téro, Kótóné ama kóló whį Elaisané Israel hae kwiamó dowi humu fuluné tiki doyóló betó mole so whį mo betąkélé wisirénipó. Israel hae kwiamó atei kaae whįrape betó mupatei, mo betąkélé wisiréni, Siria hae kwiamó betere whįkó Naaman maaté wisiralepó,” yalepó.

²⁸ Ai kale fo wosetere be dolomó betó mole so whį mo feané ama ai dere fo wosóló, atima doasi fopaae bualepó. ²⁹ Atéro atima hapale turukó huturaalu, ą belapaae hókó deralepó. Téro, ai be hulua felekemó ere kulapaae taae deraai dapóló dapesó felepó. ³⁰ Téyaai depa, ai touró betere so whį kua dolomótei sókótamo yóló, ama faai yale tikipaae felepó.

*Yesuné dowi kepe hąkonale fo
(Mak 1:21-28)*

³¹ Téro, Yesu ą Kaleli hae kwiamó tene Kape-neam be huluapaae derepelepó. Aimó bituraalu, kale sąa naai tukóló muló betere be demó so whį feapaae ama fo momó kaae sóró yó mótu betalepó. ³² Ama ai yó matere fo so whį feané woseturaalu, sóró beteró betere topo whinė fo kaae dapóló, siratu betalepó.

³³ Ai fo wosetere be dolomó dowi keperape tepeyóló betere whį betą beterepó. ³⁴ Ai sekéné fo fakeyóló duraalu, “He! Nasaret be hulua whįkó Yesu-ó, naao dąpaae noa alakó eraai waleé? Nao dą doraai waleé? Yąta, me dowi alakélé muni,

Kótóné mo kae beteró betere wh̄ipóló, yało kisi-parapó,” yalepó.

³⁵ Ai fo depa, Yesuné kale dowi kepe foné sóró duraalu, “Fo taaróló ya ai wh̄i tuəmó betteretei, sókó ape,” yalepó. Ti fo depa, dowi kepe kale wh̄i tuəmó betaletei, so wh̄i feané keletómó ama tiki haepaae taae deróló ą sókó felepó. Atéyaletei, kale wh̄i ą doalékélé inipó.

³⁶ Atétere ala so wh̄i feané kolóló, sirayóló atimasisitei duraalu, “I wh̄iné yó mótu betere fota, mo kaepó. Ti ama fota, doasi fotokqtamo yó matepa, dowi keperapenékélé ama dere fo mo betą wosóló, ai sókó fulapa, kelae!” yalepó.

³⁷ Yesuné i ala du beterapó fo, ai hae kwiamó betó mole so wh̄i mo feapaae deté kwęyalepó.

*Yesuné so wh̄i feané kisi wisirale fo
(Mat 8:14-17, Mak 1:29-39)*

³⁸ Yesu ą ai fo wosetere be taaróló, Saimon-né bepaae felepó. Ai bemó kale Saimon-né auma sere tiki suputere kisiné sinóló mupa, atimané Yesupaae, “Naao wisiraaloé?” yóló wosalepó.

³⁹ Atétepa, ą kale so molepaae fóló hemene doropóló, kale soné tiki supu dere kisi bete foné salemó, kemeyalepó. Atéteretamotóró kale so ą turukó holóló, atimamó ąla kaae sóró biliyóló melalepó.

⁴⁰ Be dikiyaairaaalu, suka doropoletamo mepaae hałe betere wh̄irapené kae kae hepo daale so wh̄i Yesu beterepaae dapesó walepó. Atéró wóló betó mupa, so wh̄i dokq feané tikimó ama naase mulótua yalemó, atimané kisi beterape wisiyalepó. ⁴¹ So wh̄i feané tiki tuəmó tepeyóló

betere dowi keperape fo fakeyóló sókó furaalu, yaṭa Kótóné naalemapó dua yalepó. Ai fo depa, atimané aṭa haḷe whị mei, Kótóné so whị tẹteróló kaae tanópóló sóró beteró betere whị Kerisopó yaqsóró, kale dowi keperape foné sua yalepó.

⁴² Mo hịkati Yesu ama wotoró so whịkélé bi-tinire tikipaae felepó. Atépa, kale so whị feané keketé kwẹyóló, ą betere tikimó sókó walepó. Atéró wóló bituraalu ą metikipaae faqsóró, atimatamo betaai dapóló, sesé du betalepó.

⁴³ Tétepatei, ama atimapaee duraalu, “Kótóné tẹteróló kaae tare aqmó mole fo wisi i ape yóló yó maté kwẹyópóló, Kótóné ẹ dotẹyalepó. Atéreteiné ẹ diatamo betenéni, mepaae be huluapaae faai dapó,” yalepó. ⁴⁴ Téró, ą Judia hae kwiamó tẹ mole fo wosetere be dokọ fea fo yó matétóró kutu betalepó.

5

Yesuné mepaae ama yó melaaire whịrape ape yale fo

(Mat 4:18-22, Mak 1:16-20)

¹ Téró etẹyalepó. Me be demó Yesu ą Kenesaret weị fókumó daalepó. So whị mo fea haḷe ọla kaae wóló tourale tikimó, hae tiki faae fóló mulu, Kótóné fo wosetu betalepó. ² Até du betepa, weị nuku tamo ai weị fókumó duló betepa kelalepó. Ai nuku tamota, ya siré kotere whịrapené nukupó. Atimané nuku aimó dupa teraae fóló, weị fókumó haḷeke warape fukutu betalepó. ³ Atétu betepa, ą nukumó bitị holalepó. Ai nuku tale, Saimon-paae duraalu, “Naa nuku ai weị kulu tuapaae sawa

hikili falae,” yalepó. Téró, ă nuku tómó bituraalu so whĭ feapaae fo yó mótu betalepó.

⁴ ă fo yó melóló kemetepa, Saimon-paae duraalu, “Yakó detémóló kelaalopa, nuku wĕi kulu tuăpaae fóló, diaaq hăleke warape wĕi dolopaae derae,” yalepó.

⁵ Ai fo depa, Saimon-né ăpaae duraalu, “Doa whĭ-ó, mió dikitamo yakó saalo nisiyóló đă depe tukó wei ala yóló deraté kwĕyalemó, mo betăkókélé denipó. Téyaletei, naao derae depa ti hăleke warape đăné deraalopó,” yalepó.

⁶ Atéró, atimané hăleke warape deralemó mo doakale yarape deale tikimó, atimané hăleke warape tukó faairaalu yalepó. ⁷ Atéteremó, atimané fulumu whĭrapepaae atima tao sene ape depa wóló, mepaae yarape nuku dolopaae bulóló fu betaalemó, kale nuku tamo wusuró mo felekemó wĕi dolopaae buó deyaai yalepó.

⁸⁻¹⁰ Atétepa, Saimon-ró ătamo kutó ditere whĭrapetamokélé, atima betămó ya siré kotere Sebedi naalema tamo Jems-ró Jon-tamokélé, ya mo dekéró sóró muló betere kilituraalu, haió yóló siratu betalepó. Atétepa, Saimon Pita ă Yesuné hó aqmó bukutiri teăró bitu duraalu, “Tale-ó, ęta dowi ala du betere whĭpa, taaróló yă fumié?,” yalepó.

Tétepa, Yesuné Saimon-paae duraalu, “Yă wiyaqse, naao ya su dere kaae, mió kaae sóró so whĭ siré kwĕyaasepólópó,” yalepó. ¹¹ Atétepa, atimané nukurape wĕi fókupaae tao sóró mulóló, atimané ęla ęlakélé mupatei taaróló ă sya felepó.

Dowi humu fuluné tiki dore whi Yesuné wisirale fo

(Mat 8:1-4, Mak 1:40-45)

¹² Téró etéyalepó. Yesu ą beta be hulumó beteremó, dowi humu fuluné tiki dore whi walepó. Atéró, Yesu betere felekemó ama kelepa haepaae deróló bukutiri teąró bitu ąpaae woseturaalu, “Tale-ó, ąło tiki doretei naao kisi-pané wisiraai depa, ti wisiraasepólópó,” yalepó.

¹³ Atétepa, Yesuné ama naase teréę faróló kale whiné tikimó wolaayóló duraalu, “Naao tiki ąło wisiraai kisi-pané mutapa wisiyae,” yalepó. Téyalemó, mo ai fapotoró kale whiné dore tiki mo ti wisiyó felepó.

¹⁴ Atéró, Yesuné kale whi dotonaai ąpaae mo diri ma fo yóló duraalu, “Ąło naao tiki wisiralepóló, mo whi-pané momókó ąąse. Ą fóló, Kótópaae momaratere whiné naao tiki fo-pané yópóló, yó male fae. Atéró fo-pané naao tiki wisipa kilitu, Moses-né ere fo sya furaalu, Talepaae ąle melae ere ąla melae. So whi feané ai ala kilituraalu, ita Talené erapó kisi-pané muaalopó,” yalepó.

¹⁵ Yesuné mo so whi-pané ąąse yaletai, i ala yalepóló deté kwęyóló fakeratepa, so whi feané woseturaalu, atimané kae kae kisi betere-pané wisiró, ama dere fo wosó yaairaalu, wua yalepó. ¹⁶ Atépaitei, Yesu ą so whitamo betere tiki taaróló so whikélé bitinire tikipaae suka fea moma eneta dua yalepó.

Yesuné tiki momaare whi wisirale fo
(Mat 9:1-8, Mak 2:1-12)

¹⁷ Atéró, me sukamó etéyalepó. Ama fo yó mótu betepa, mepaae Farisi wh̄iraperó Moses-né as̄ere fo yó matere wh̄irapetamo Kaleli haeró Judia haetamomó betó mole so wh̄ikélé, Jerusalem be hulua so wh̄ikélé, wóló betó molepó. Ai sukamó, so wh̄i feané kisi bete wisiraaire Talené fotok̄o s̄umó bolepó. ¹⁸ Atépa, mepaae wh̄irapené bet̄a tiki momaare wh̄i besek̄ené dokopatei, beleyóló wóló be tūapaae holóló Yesu beterepaae sóró holaai kisipa mualepó. ¹⁹ Téro, kale wh̄i sóró faaire tumó so wh̄i mo fea daayale tikimó fenénipa, siki bepaee sóró holóló kea sokóló, kale wh̄i dokopatei, besek̄etamo Yesu daale donotóro deralepó.

²⁰ Atéró, atimané kisipa tiki tiratere ala Yesuné kolóló, kale tiki momaare wh̄ipaae duraalu, “Ti naale-ó, naao dowi alamó kwia melaai yaleteti mió i kemeratere ape,” yalepó.

²¹ Yesuné ai fo depa, Farisi wh̄iraperó Moses-né as̄ere fo yó matere wh̄irapetamo atimasisi fo yaai tūé teketu betalepó. “Ti wh̄iné ̄ata, Kótó kaaepó du betere foné Kótó faletu beterapó. Mo wh̄i bet̄anékélé dowi alamó melaaire kwia kemeranénitei, Kótóné bet̄a s̄umó enérapó,” du betalepó.

²² Atéró mutere kisipa Yesuné kolóló, atimapaee duraalu, “Noatepa dīa atei tūé mutu bitu de? ²³ Ti mé fo so wh̄i feané enére? Naao yale dowi alamó saaire kwia aluratapó enérepe, ȳa turukó holóló naao besek̄e sóró fae fo enére? ²⁴ I haemó betó mole so wh̄iné dowi ala bete tokóló aluraaire fotok̄o Wh̄iné Naalemané s̄umó bulapóló, kisipa

yaasepóló i wh̄ipaae eratere ala kelae. Ȳalo ȳapaae mo i dere ape, ȳa turukó holóló naao beseke sóró bepaae fae,” yalepó. ²⁵ Ai fapotóró kale be wh̄i so wh̄i feané keletómó turukó horóló ama beseke sóró bepaae furaalu, Kótóné doi hale sóró horaté felepó. ²⁶ Atéteremó, so wh̄i fea winé sukutu sirayóló duraalu, “Mo take etei kaae ala depa, ðané kolókélé ini, mió kisi ala keletapóló,” Kótóné doi hale sóró horótu betalepó.

Takis moni sere wh̄i Lipaipaae Yesuné ą sya ape yale fo

(Mat 9:9-13, Mak 2:13-17)

²⁷ Ai ala yóló kemetepa, Yesu ą betą *takis moni* siré kotere wh̄ikó ama doi Lipai *moni* su betepa kolóló, Yesuné ąpaae duraalu, “Ȳa ę sya ape,” yalepó. ²⁸ Ti fo depa, ą turukó holóló ama ąla ąlakélé mupatei, taaróló ą sya felepó.

²⁹ Téró, Lipainé Yesu ama bepaae dapesó fóló, ąmó doasi ąla deralepó. *Taks moni* siré kotere wh̄iraperó mepaae so wh̄itamo fea touró bitu, ąla nuku beterepó. ³⁰ Tétu betepa, mepaae Farisi wh̄iraperó atima betą kisipa mulu Moses-né asęre fo yó matere wh̄irapetamoné Yesuné yó matere wh̄irapepaae duraalu, “*Taks moni* siré kotere wh̄iraperó dowi ala du betere wh̄irapetamo węiró ąlatamo betąmó noatepa ąla nuku bitu dérópó,” yalepó.

³¹ Ti fo depa, Yesuné atimapaae duraalu, “Hepo daanire so wh̄i *dokta* wh̄i beterepaae fumi, hepo daale so wh̄i maaté fua dapó. ³² Ę waleteita, donoi ala du betere wh̄ipaae ape yaai ani, dowi

ala du betere so wh̄i atimané dowi ala taaróló ape yaairaalu walepó,” yalepó.

Yesuné yó matere wh̄irape ɔla woteremó yale fo (Mat 9:14-17, Mak 2:18-22)

³³ Atimané ɔpaae duraalu, “Jon-né yó matere wh̄irapeta, Kótópaae kisipa muóló, me féli ɔla weyóló bitu, momatua dapó. Atétere kaae, Farisi wh̄irapené yó matere wh̄irapekélé atétua dapó. Tétepatei, naao yó matere wh̄irape ai ala ini, atima ɔlaró w̄eitamo nokole ala suka fea h̄ale yó tarapó,” yalepó.

³⁴ Tétepa, Yesuné atimapaee duraalu, “Bet̄a wh̄i ɔ so dokotere sukamó ama nomarape ɔla weyóló h̄ale bitua de? Meipó. ³⁵ Téyaalo meitei, me sukamó kale so dokaaire wh̄i atima bet̄amó bituraalu, ɔla nuku beter̄alemó, ɔ tawóló só fole sukamó atima ɔla weyóló h̄ale betaalopó,” yalepó.

³⁶ Ama atimapaee yale fo kisipa sópóló, me fo sale etéró yalepó. “Mepaae wh̄iné kisi kuti bis̄ayóló der̄akele kuti bis̄aae faletei nomotua de? Atétepa, ti der̄akele kutiné kisi kuti h̄ukulu yóló doróo, nomaletiekélé kok̄o ini yóo, yaalopó.

³⁷ Atétere kaae, mepaae wh̄irapené *wain* w̄ei hupu sekaɛné aleyale der̄akele wutimó tepetumipó. Até enalemó, kale w̄ei fotok̄oné kale hupu sekaɛné aleyale der̄akele wuti fulukó furaalu, w̄eikélé sunée faalopó. ³⁸ Até yaɔsóró, atimané kisi *wain* w̄ei tepeturaalu, ti hupu sekaɛné aleyale kisi wutimó tepetua dapó. ³⁹ Folo moi *wain* w̄ei nokole wh̄irape atima kisi *wain* w̄ei naai h̄ekese

dumipó. Ti noatepae, folo moi *wain* wẹi nóló toureteiné mo wisirapó, du beterapó,” yalepó.

6

Yesu ąta, ąąa nokole be de ąęteróló kaae tare Talepó yale fo

(Mat 12:1-14, Mak 2:23-28, 3:1-6)

¹ Téro, ąąa naai tukóló muló betere be demó, Yesu ą ama yó matere whırapetamo *whit* kutó tuąmó ąęyóló felepó. Atéro furaalu, ama yó matere whırapené ai kutómó ere *whit* du ąąae sóró fumi hotokóló nukulé fu betalepó. ² Mepaae Farisi whırapené até dere ala kolóló, ąpaae duraalu, “Sąa nokole sukamó naao yó matere whırapené atei ala yópóló, noatepa kaae tare?” yalepó.

³ Ai fo depa, Yesuné atimapaae tokó mótu duraalu, “Depit-ró ama fulumu whırapetamo wotetepa yale ala ašemó moletei, diaaq dosąayóló kisipa muni airapó. ⁴ Depit ą Kótóné be dolopaae holóló bituraalu, Kótópaae melale mo kae muló betere *bred* otei ama sóró nalepó. ą nóló, kwia-paae ama fulumu whırapekélé matepa, atimané sóró nalepó. Ai ota, hąle mo whıné nukumi, Talepaae momaratere whırapené maaté nukua dapó,” yalepó. ⁵ Téro, Yesuné atimapaae duraalu, “Sąa nópóló tukóló muló betere be de ąęteróló kaae tare Taleta, ti kale whıné Naalemapó,” yalepó.

⁶ Téro, ąąa nokole me be demó, Yesu ą Kótóné fo wosetere be dolopaae fóló, fo yó mótu betalepó. Atéro yó mótu betałémó, betą whı ama turu

naase sinóló dopa kelalepó. ⁷ Atétepa, mepaae Farisi wh̄iraperó Moses-né as̄ere fo yó matere wh̄irapetamoné Yesu só deraaire bete kikitu, kale s̄aa nokole be d̄emó naase dowi wh̄i wisirateró kelaairaaalu, kaae tawóló beterepó. ⁸ Atimané atéró mutere kisipa ama kolóló, kale naase dowi wh̄ipaae duraalu, “Ȳa so wh̄i kuamó turukó holóló, daayae,” yalepó. Atétepa, kale wh̄i ̄a so wh̄i feané keletómó daane holalepó.

⁹ Tétepa, Yesuné atimapaee duraalu, “Ȳalo dīapaae bet̄a fo wosetapó. S̄aa nokole sukamó noa ala yaq̄se yóló mule? Wh̄i tao sóró wisiraterere alapé, dowi ala deretei? Ó wh̄i sukaq̄sóró tao sere alapé ó wh̄i betere bete doraterere alaé?” yalepó.

¹⁰ Ai so wh̄i beterepaae kele keleyóló kale wh̄ipaae duraalu, “Naāo naase teré̄e falae,” depa, kale wh̄iné naase teré̄e faralemó, wisiyalepó.

¹¹ Atéteremó, doasi fopaae buóló atimasisitei fo k̄laaróló duraalu, “D̄añé ̄apaae noa alakó er-aaloé,” du betalepó.

*Yesuné 12 wh̄irape sókó sóró beterales fo
(Mat 10:1-4, Mak 3:13-19)*

¹² Téró bet̄a sukamó Yesu ̄a moma yaairaaalu, du sorokó mole aq̄paae felepó. Atéró, aimó Kótópaae moma deté fu betepatei, be d̄eralepó.

¹³⁻¹⁴ Atéró be d̄eyó hotepa, h̄ika ama yó matere wh̄irapepaae ape yóló, fea betó mupatei, ¹² wh̄irape maaté sorokó sóró, *aposei* doi mulalepó.

¹⁵ Saimon doi mupatei, ama me doi Pita mulalepó. ¹⁶ Ama noma Andru, Jems, Jon, Filip, Batolomiu, Matyu, Tomas, Alpias-né naalema Jems-kélé, k̄alo k̄alore wh̄i Saimon, Jems-né naalema

Judas-kélé, Yesu dópóló eleké deyaaire wh̄ Judas Iskariot, atima atéró wh̄rape sóró beteralepó.

¹⁷ Atéró, Yesu ą kale du sorokó mole tiki taaróló, ai aqmó sawa mulure tikipaae ama sóró beterale wh̄rapetamo derepelepó. Kale mepaae yó matere wh̄rapekélé, Judia hae kwiamó wale so wh̄kélé, Jerusalem be huluamó wale so wh̄kélé, w̄i fóku felekemó t̄ene Tair beró Saidon betamomó wale so wh̄kélé, mo h̄le ąla kaae wóló touró beterepó. ¹⁸ Atéró waletaitea, ama dere fo wosóo, atimané kisi bete kemeróo, mepaae so wh̄kélé dowi kepe tepeyóló betereitei dóló h̄konóo, yópóló walepó. ¹⁹ Ama fotok̄né aimó betó mole so wh̄ atimané kisi bete wisirótua yaletiné, ama tikimó wolaayaai dapóló walepó.

*Yesuné ama yó matere wh̄rapepaae dere fo
(Mat 5:1-12)*

²⁰ Atétepa, Yesuné ama yó matere wh̄rape kaae taru duraalu,
“Dią yoleale betere wh̄rapeta, ti Kótóné t̄eteró betere ala sereteiné dią hajné sukutu betere-
apó.

²¹ Dią mió woténé sukóló mole so wh̄rapeta, take ąla s̄mó naalopóló kisipa mutu, hajné ai sukutu betere ape.

Mió dią dekené sukóló moló du betere so wh̄ta, take hajné sinóló betaaireteimó, Talené wisiró beterepa, wisi kisipa muóló betae.

²² Atéró, dią Wh̄jné Naalema sya fu betereimó, mepaae wh̄rapené dią h̄róo, kae beterepóló h̄kó falóo, dowi ala dere

whipóló diaaḡ doi doróló fale yóo du betepa, ti Talené diḡ wisiró betepa, hajné sukutu betae.

23 Atétere sukamó heḡesené sukutu, tuwó holae. Ti noatepae, diaaḡ take saaire doasi dupu wisi hepen-mó muló betepapó. Ti take atima alimarapenékélé Kótóné ama kḡló whḡrapepaae betḡ kaae ala erótua yalepó.

24 Téretei, néli whḡrape diḡ mo doa wió yae! Ti noatepae, diaaḡ tiki feléyóló mo dua betaaire ala taketi sóró tareteiné, nalopaae atei wisi wisi ḡla momó kae saalomeipó.

25 Mió diḡ mepaae whḡ de ḡla sumó nóló betere so whḡ diḡ mo wió yae! Ti noatepae, take diḡ wotené sukḡalo ai ape.

Mió diḡ mepaae whḡ de dḡ nóló heḡesetu betepa, take diḡ deḡené sukuturaalu doasi wole yaaireteiné mo doasi kḡlerapó.

26 So whḡ feané yaḡpaae whḡ wisi-ó, yóló dukiraterere fo du betepa, kḡlerapa mo doasi wió yae. Ti noatepae, mió diḡ dukiraterere so whḡ atima alimarapenékélé take betale kapala kḡló whḡrape atéro dukirótua erapó,” yalepó.

*Bóe whḡpaae yaala sókó fu betae yale fo
(Mat 5:38-48)*

27 “Téretei, mepaae yaḡlo fo wosetere so whḡ diḡpaae i dere ape. Diḡ hḡróló bóe duraalu, dowi ala erótu betere so whḡpaae yaala sókó fóló heḡesené sukutu, wisi ala betḡ erae. 28 Mepaae whḡ dené diḡ doróló seḡeraterere fo depa, Kótóné atima wisirḡpóló, fo wisitei yae. Mepaae whḡ

dené diɔpaae sekeɪ ala eratepa, Kótópaae atima wisirae yóló momarae. ²⁹ Mepaae whɪ dené naao faamumó deké supa, metikirókélé dǒpóló yó melae. Mepaae whɪ dené naao tómó deró betere kuti sokotepa ti naao tuɔmó deró betere kutikélé seséni, sokǒpóló yae. ³⁰ Mepaae whɪ dené yɔpaae me ɔlakó ɔlae depa, ama kematere ɔla melae. Mepaae whɪ dené naao tare ɔla fasetepa, momó ɔlae fo yaɔse. ³¹ Mepaae so whɪné yɔpaae erané dere ala kaae, naao mepaae so whɪpaaekélé erótua yae.

³² Diɔpaae yaala sókó fu betere whɪpaae maaté yaala sókó fu betere-a, ai doasi alaé? Mepaae dowi ala dere whɪrapenékélé atimané fulumu whɪrapepaae atéro yaala sókó fole ala du beterapó. ³³ Mepaae whɪ dené diɔpaae wisi ala erótu betepa, diaaɔkélé atimapaee wisi ala eratepa, aita doasi ala meipó. Ti aita, dowi ala du betere so whɪnékélé dere alapó. ³⁴ Diaaɔtamo mepaae whɪné diɔpaae momó tokǒ melǒpóló me ɔla melatepa, ai-a hapólure? Ti mepaae dowi ala dere whɪrapenékélé momó tokóló saai ai ala dua dapó. ³⁵ Tépatéi diaaɔta, bóe whɪpaae yaala sókó fóló wisi ala betɔ erótua yae. Atéturaalu, naao me ɔla mótu, momó tokǒ melǒpóló kisipa muóló meni, hɔle meló betɔ yae. Atétepa, ti diɔ mo taoró betere Kótóné dupu wisi menóló, ama naalerape betaalo ai ape. Ti noatepae, ama kǒlené sukutere alaró hɔle tao sere alata-mota, dowi ala du betere whɪraperó ɔpaae mo kée initere whɪrapetamopaae erótu beterapó. ³⁶ Diaaɔ Ayané mo so whɪ feapaae kǒlené sukutu

dere kaaetóro diaaǵkélé me wh̄ipaae atéroro kǵlené sukutu betae,” yalepó.

*Me wh̄i h̄aletei foné só deraǵse yale fo
(Mat 7:1-5)*

³⁷ “Diaaǵ me wh̄i taleyóló só deratere ala yaǵse. Naaotamo me wh̄i só deratere ala initepa, ti mené diǵkélé taleyóló só deraalomeipó. Diǵné mepaae wh̄itamo foné só deréni depa, ti yaǵkélé mené só deraalo meipó. Mené yaǵpaae erale dowi ala me ǵla meipóló h̄ale kemeratepa, ti diaaǵ yale dowi alakélé me ǵla meipóló h̄ale kemeraalopó.

³⁸ Mepaae ǵla ǵla yaǵyaǵre so wh̄imó h̄ale matepa, menékélé diǵmó h̄ale melaalo ai ape. Naa me ǵla melaai depa, ti deyóló mo ti faǵanóló melae. Ti noatepae, naao mepaae wh̄imó mo dekéroro mótu dere kaae, menékélé yaǵmó naao male s̄utoró melaalo ai ape,” yalepó.

³⁹ Atéroro, ama i yale fo tómó atimapaee i fo sale yalepó. “Betǵ kele dilikire wh̄iné me kele dilikire wh̄ipaae tu i mole ape yóló ǵlisóroro fenére? Atétepa, ti ǵ dée nukuraalu, atimamo wusuró dée nóló dolopaae derepaalopó. ⁴⁰ Betǵ *skul* naalené ǵ yó matere wh̄i teteraalo meipó. Téyaalo meitei, kispia siré fóló s̄utepa, ti ǵ yó melale wh̄i kaae betaalopó.

⁴¹ Naa kele dolomó doakale bole ni fake kilini, naao noné kelemó sawatamo bole momeitei noatepa sokaai du betere? ⁴² Naa nopaae duraalu, ‘No-ó, naao kele dolomó bole mome sawa sokotapa maé,’ dere noatepa de? Naa kele dolomó bole doasi ni fake sokóló naao kele feléruraalu, ti naao noné kelemó bole mome sokotapa mo wisirapó,” yalepó.

*Wisi niné dowi du oletimipó yale fo
(Mat 7:16-20, 12:33-35)*

⁴³ “Ni wisiné dowi du oletimipó. Dowi ninékélé wisi du ulutimipó. ⁴⁴ Mo nirape fea du oletepa kolóló, ita du wisi oletefe nipó, ita, kokola oletefe nipó dua dapó. Whirape feané nose du teketuraalu, mu daai képi tikimó ó hãle hõko ni tikimó olepa teketumipó. Mo besãae teketukélé hãle kípimó olepa tekete? Meipó. ⁴⁵ Whi wisiné hosaa tuãmó wisi alatóro fãayóló muluraalu, ama dere fokélé, wisi fotóro dua dapó. Dowi whiné ama hosaa tuãmó fãayóló mole alatóro dowi fo hãkeamó depa wosetua dapó.

*Be hõko tẽtere alaró wisiyóló tẽtere alatomomó
yale fo
(Mat 7:24-27)*

⁴⁶ Yãlo diãpaae yae dere alamo diaaõ iniyóló, epaae doasi Tale-ó fo noatepa du betere? ⁴⁷ Mepaae whiné yãlo dere fo wosóló, yãlo yae dere alakélé wisiyóló erótu betere so whi ti etei kaae alané kelerapó. ⁴⁸ Whi betãné ama be tẽyaairaaalu, tó hae fea dukuté doropóló, hae dirimó kapo fake mulóló, ai tómó be tẽtua dapó. Atéro tẽne be doakale hali tikiró wẽi asyatamo waalotei, ai be mo wisiyóló tẽneteiné tokó fenipó. ⁴⁹ Téyaalotei, whi me dené yãlo fo wosetutei, yãlo erae dere ala erénitepa, ti etei ala kaaené kelerapó. Whi betãné ama be tẽyaairaaalu, tó hae kãayóló taae faréni, hãle hõko tẽnapó. Atépa, doakale hali tikiró wẽi ayatamo waletikimó, kale be tokó taae faróló, mo ti doralepó,” yalepó.

7

Topo diki tare whjné kutó diratere whj wisirale fo

(Mat 8:5-13)

¹ Téró, Yesuné so whjpaae fo yó melóló keme-tepa, ą Kapeneam bepaae felepó. ² Ai bemó betą topo diki tare whjné ama hosaa mole kutó diratere whj betą heponé mo felekemó sukąai du betalepó. Ai topo whjné 100 Rom diki tare whjrape tẹteróló kaae tarepó. ³ Atépa, kale topo whjné Yesu wóló beterapó dere fo woseturaalu, ama kutó diratere whj Yesuné tao sene wópóló, mepaae Juda topo whjrapené ąpaae ene fópóló dotęyalepó. ⁴ Atima Yesu beterepaae wóló ąpaae duraalu, “U whj wisinaale mo felekemó sukutapa, naao ą wisiraasepóló yą dą faalopó. ⁵ Ti noatepae, dą Juda fake so whjamo hekesené sukóló yaala sókó fole ala muluraalu, dąné fo wosetere bekélé ama tęnalepó,” yalepó.

⁶ Atétepa, Yesu ą atimatamo fóló, kale whjné be felekepaae sókó waairaalu wou betepa, kale diki tare whjrapené doasi topo whjné ama fulumu whjrape Yesutamo tumó hokolaatu, i fo yae yóló dotonalepó. ⁷ Atétepa, atima fóló, kale topo whjné Yesupaae yae yale fo yalepó. “Tale doa whj-ó, ą whj wisi betepapakó yą ama be tuąpaae ape yaalomeipa, yą tika tumó daalu kisi bete wisi yae fo betą yae. ⁸ Ti noatepae, ękélé ę tẹteróló kaae tare whj aqmó beterapó. Yąlo diki tare whjrape atimakélé ę aqmó beterapó. Ai whjrapepaae yąlo ‘Fae,’ depa fóo, ‘Yą ape,’ depa

wóo, dua dapó. Yálo kutó diratere wh̄ipaae i ala yae depa, ai alatóró ama dua dapó,” yalepó.

⁹ Yesuné i kale wh̄iné ene wale fo wosóló sirayalepó. Téró, Yesu fetée fóló ą sya wou betere so wh̄ipaae duraalu, “Israel hae kwiamó etei kaae kisipa tiki tiró betere wh̄i mo betąkéle betepa kilinipó,” yalepó. ¹⁰ Téró, kale doasi topo wh̄iné doteyale wh̄irape bepaae momó fesaae wóló kelalemó, kale kutó diratere wh̄iné hepo bete wisiyóló, mo betepa kelalepó.

Yesuné wulia soné naale kepaarale fo

¹¹ Atéró, Yesu ą Kapeneam be huluaamó sawa beteró, ama yó matere wh̄irapekélé, mo so wh̄ikélé, fea ątamo Nain be huluapaae sókó faai fu betalepó. ¹² Atéró fu betaalemó, ai be hulua tipiné bopéró daaló betere tikimó sókó felemó, betą sukąle wh̄i beleyóló walepó. Ai naalené hamata, oma sukóló wulia bituraalu, ai naale betątóró kaae tarepó. Ama tiki sini beleyóló fupa, ai be huluaamó betó mole so wh̄ikélé fea ątamo fu betalepó. ¹³ Atétepa, Talené kale so kelalemó, kọlené hosaamó supa, ą daalepaae fóló duraalu, “Yą wole ekesé,” yalepó.

¹⁴ Téró, Yesu ą wóló kale sukąle wh̄i dokore besekę olaatepa, beleyóló fu betere wh̄irape feni, kejyóló daayalepó. Atétepa ama duraalu, “Ti naale-ó, yálo yąpaae dapa turukó holae,” yalepó. ¹⁵ Tétepa, kale sukąle wh̄itei turukó holóló bituraalu, fo kaae sóró yalepó. Téró, Yesuné kale sukąle naalené hamapaae naao naale ai ape yóló melalepó.

¹⁶ Ai ala kolóló, so whị fea winé sukutepa, Kótóné doi hale sóró holóló duraalu, “Kótóné mo doasi kóló whị betạ ama so whị tao saai i wóló betere ape,” yalepó. ¹⁷ Yesuné ai ala du beterapó fo Judia hae kwiaró ai hae kwia tuạmó betóló fale so whịtamo feapaae deté fóló fakeralepó.

*Jon-né ama yó matere whị tamo Yesu
beterepaae dotonale fo
(Mat 11:2-19)*

¹⁸ Atéró, kale Jon-né ama yó matere whịrapené Yesuné i alarape du beterapóló, Jon-paae ene walepó. ¹⁹ Jon-né ama yó matere whị tamopaae ape yóló, Tale beterepaae fópóló doteyalepó. Atétepa, atimaamo fóló ạpaae woseturaalu, “Waalopóló bope du betale whị yạpé? Whị me kae wópóló kaae tawaróe?” fo ene fópóló dotonalepó.

²⁰ Atéró, kale whị tamo Yesu beterepaae wóló ạpaae duraalu, “Dạmota, wẹi tópuratere whịkó Jon-né yạpaae wosene fae depa walepa, yạta kale waalopóló bopetu betale whịpé, whị me kae wópóló kaae tawaalóe?” yalepó.

²¹ Atéyale sukamótóró Yesuné mepaae hepo daale so whịkélé, depe dolomó dowi kepe betere so whịkélé, kele dilikire so whịkélé, wisirótu beterapó. ²² Atéró, ama atimaamopaae duraalu, “Diaamo fesaae fóló diaamoné wosale foró kelale alatamo Jon-paae ene fae. Mepaae kele dilikiyóló betale so whịné kele fisạae fóló ọla ọla kolóo, họleke dore so whị mo sesẹre whị kaae kweyóo, dowi humu fuluné tiki dore whịrape sesẹ mo betere whịné tiki kaae daayóo,

mepaae woséli kinu fokélé wosenire so wh̄i woséli tukw̄e falóo, mepaae sukutepa दौराई yale so wh̄itei kepaaróo, mepaae yoleale betere wh̄irapepaaekélé, kale mió wosetere fo wisi yó matepa wosetu beterapó fo ene fae. ²³ Mepaae so wh̄i de yało du betere alamó dée néni, suka fea eró tare so wh̄ita, hajné sukópóló yae fo ąpaae ene fae,” yalepó.

²⁴ Atéró, kale Jon-né dotęyale wh̄i tamo fimó, Yesuné Jon-mó kisipa mutu, ai betó mole so wh̄ipaae duraalu, “Upulé dią so wh̄ikélé bitini kópu kaae fitikipaae fua yale-a, beséné kape fépo eratere kelaai felepé, wh̄i kuti wisinaale deróló auretei kelaai feleé? Meipó. ²⁵⁻²⁶ Ti mepaae wisi wisi kuti maaté deratere wh̄ita, topo wh̄i betere be wisimótóró bitua dapó. ąta atei ala inipa, dią noa ọlakó kelaai feleé? Atépatei, diątamo Kótóné ama kóló wh̄i mo kelaai fitikimó, ti ąta ai kutó maaté mei, mepaae kutókélé dirópóló sóró beteró beterapó. ²⁷ Ašemó yóló muló betere fota, i wh̄imó kisipa mutu erapó.

‘Wh̄i betą ąpi folosóró furaalu, ya waaire tu donoraē fo ene fópóló yało dotęyaalo ai ape.’

²⁸ Yało diąpaae i dere ape. I haemó betó mole soné deale wh̄irapekélé fea betó moletei, kale w̄ei tópuratere wh̄i Jon-né t̄eteró beterapó. Tépatei, wh̄i me detamo Kótóné t̄eteróló kaae tare aqmó, belei sókó deóló betepa, ti kale w̄ei tópuratere wh̄i Jon bosenée falapó,” yalepó.

²⁹ Mo so wh̄i fearó *takis moni* siré kotere wh̄irapetamo Jon-né dere fo wosóló sya fupa,

atima wẹi tópuraleteiné Yesuné yale fo wosóló, Kótó ąta, mo donotóro taletere Talepó du be-talepó. ³⁰ Téyaletei, mepaae Farisi whịraperó Moses-né asẹre fo yó mótu betere whịrapetamo Kótóné tao sóró eraai yale wisi ala atimanétei hóralepó. Ti noatepae, atima Jon beterepaae wẹi tópuaaíraalu feni yaleteinépó.

³¹ Téró, Yesuné duraalu, “Mió i alimó betere so whịrapené du betere ala yąlo noapaae dó faróló yaaloé? ³² Atimata, so whị mo fea touróló betere tikimó, kale keteirape atimasisitei melaa duraalu, etei kaae ala dere naale senaale kaaené kelerapó. ‘Dią kilyópóló dąné fó wuti haleróló mepaae wole forape yaletei, dią hẹkeseyóló sama kịlinipó.

Dią dekẹ duraalu moló yópóló, mepaae wole forape yaletei, dią wolekélé inipó,’ yalepó.

³³ Atére kaae, kale wẹi tópuraterere whịkó Jon ọlakélé, wẹikélé, néni, weyóló hąle betepa, diaaọ duraalu, ‘A tuámó dowi kepe tepeyóló beterapó,’ dua yalepó. ³⁴ Kale whịné Naalema ọlaró *wain* wẹitamó nokole ala kolóló diaaọ duraalu, ‘Kelere? i whịta, ọla mo dekéro nóo, *takis moni* siré kotere whịraperó dowi ala dere whịrapetamo fulumu yóo, du beterapó,’ fo diaaọ ai dere ape,” yalepó.

³⁵ Atei fo diaaọ du betteretei, mepaae so whị de Kótóné mo fo wisi wosóló sya fupa, so whị feané hąkeamó kilitu, ita Kótóné mole fosó fosóre tuẹ sya feleteiné erapó, yalepó.

Dowi ala du betale soné Yesuné hó fokale fo

³⁶ Téró etéyalepó. Farisi whịrapekó betąné Yesupaae ątamo ọla naai faalopó depa, fóló

beterepó. ³⁷ Ǻ atéro wóló Farisi whjné bemó ɔla nuku beterepó dere fo ai be hulúamó dowi ala du betere soné wosóló, *alapasita* kanené aleyale wutimó felé kɛlaa wale *wel* wɛi soro walepó. ³⁸ Atéro wóló, Ǻ Yesuné sisópaae fóló, ama hó aqmó hemée deyóló bitu, wole du betalepó. Atéro du betale wole kaape Yesuné hɔleke tópaee durupu beterepó. Tétepa, kale soné ama topo nikinétei, helekóló kópurótu betalepó. Atéro, kale soné Yesuné hɔleke tamo kóló tukó nóló, kale felé kɛlaa wale *wel* wɛi ama hómó suniyalepó.

³⁹ Atétere ala betá Farisi whjné kolóló, ama kisipanétei duraalu, “I whjta, Kótóné kóló whj uasóró, ti ama hómó olaa deremó, dowi ala dere sonétei Ǻ olaa dapó, kisipa muǽpó,” yalepó.

⁴⁰ Tétepa, Yesuné ǽpaee duraalu, “Saimon-ó, yálo yǽpaee yaaitere fo betá mulapó,” yalepó. Ti fo depa, ama duraalu, “Yó matere whj-ó, naao ɛpaee yaaitere fo yae,” yalepó.

⁴¹ Ti fo depa, Yesuné ǽpaee duraalu, “Betá whjné *moni* momó tokó melaai dapóló, tamo whjné kwia mulóló me whjné 500 *denarias moni* sóo, me whjné 50 *denarias moni* sóo, yalepó.

⁴² Kale whj tamóné sale *moni* talepaee tokó melaairetei sunipa, kale whjné me ɔla meipóló, taaralepó. Atéro taalatepa, atimaamokó mé whjné kale *moni* talepaee doasi hosaa muóló yaala sókó fole ala enére?” yalepó.

⁴³ Ti fo depa, Saimon-né ǽpaee duraalu, “Yálo kisipanéta, kale doasi *moni* sale whj Ǻ hɛkese yaalo ai ape,” Tétepa, Yesuné duraalu, “Naa dere fota, mo dono dapó,” yalepó.

⁴⁴ Téró, a kale so daalepaae fetée fóló, Saimon-paae duraalu, “I so naao kelere? E naao bepaee waleteti, yalo hokele fokópóló, naao wejókó e menipó. Ténitei, i soné betá ama wole kaape fe yalo hómó epa, ama topo nikinétei helekóló kópuralepó. ⁴⁵ E naao bepaee wale sukamó, yalo faamumó naao kóló tukó néni, i soné betá yalo hó kóló tukó nuku betalepó. ⁴⁶ Naao yalo topomó *wel* wej dilénitei, i soné betá yalo hokemó felé kela wale *wel* wej dilalepó. ⁴⁷ Atéyale kaae, yalo yapaae i dere ape. I soné ama mo doasi du betale dowi alamó saai yale kwia yalo hale keraleteiné ama epaae hosaa muóló doasi yaala sókó fu beterapó. Tépetei, whi me dené ama dowi ala hale tómó maaté keraletepa, ti ama yaala sókó fóló hekesené sukutere alakélé hale tómó erapó,” yalepó.

⁴⁸ Téró, Yesuné kale sopaae duraalu, “Naao yale dowi alamó saaire kwia hale kimeró beterapó,” yalepó.

⁴⁹ Ai fo depa, atamo betámó qla nuku betere whirape atimasisitei, fo kelaaróló duraalu, “I whita, Tale kaae bitu, dowi alamó saaire kwia ama hale keraalopóló dérópó,” yalepó.

⁵⁰ Tétepa, Yesuné kale sopaae duraalu, “Naao kisipa tiki tiró betere alané ya tao sóró wisiralepa, naao hosaa muni deyóló mo dua fae,” yalepó.

8

*Qla wae biliterepaae dó faróló yale fo sale
(Mat 13:1-23, Mak 4:1-20)*

¹ Ai ala yóló kemetepa, Yesu ą doasi be huluaró sawa be huluatamopaae fóló kale fo wisi yó móturaalu, Kótóné tẹteróló kaae tare aqmó mole ala etérapóló yó maté kwęyalepó. ą atéró kotere alata, ama yó matepa wosetere 12 whįrapekélé feapó. ² Téró, take depe tuamó dowi keperape betepa wisirale sorapekélé, mepaae hepo daapa wisirale sorapekélé, fea ątamo felepó. So whįné Maktala be hulua sokó Mariapó du betere so felepó. Ai sota, take węikeró dowi keperape tepeyóló betepa, dóló hąkonale sopó. ³ Kale topo whį Herot-né ama be ó ąla ąla fea kaae tanąpóló, sóró beteró betere whį Kusané soma Joanakélé, so me Susanakélé, mepaae sorapekélé, mo fea ątamo felepó. Ai sorape atima *moninétei*, Yesuró ama yó matere whįrapetamo tao sua yalepó.

⁴ Atéró so whį fea betąpaae tourótu betepa, mepaae kae kae doasi be hulua mó betó mole so whįkélé wóló tourótu betalepó. Atépa, Yesuné ama i fo sale yalepó. ⁵ “Whį betąné ąla wae ke ama kutómó terepeté kwęyaairaaalu, sóró felepó. Atéró furaalu, mepaae kerape tumó sorokóta yóló mupa, so whįné hąlekené tẹiya tẹiya yalepó. Atépa, sikimó kotere barape dorowóló, kale kerape dósu yóló nalepó. ⁶ Téró, kale whįné kutómó kerape terepeté kwęyaaletei, mepaae ti kane tómó dakere haemó taae doróló hapale holalepó. Téyaaletei, kapo tómó dakere hae feę meiru, kale ąla wae feleke doaló derepeniyóló, hapale séliyalepó. ⁷ Mepaae ke ti dowi ne eremó taae derepelepó. Atéyaaletei, dowi netamo betąmó holóló kale ke ąla wae wisi dowi nené bopeyóló

aluralepó. ⁸ Mepaae hae wisimó terepée derepele ɔla wae wisiyóló holóló, du oleyalepó. Ai ɔla ɔlumétepa sóró, 100 yorape faanalepó,” yalepó.

Ama i fo sale yóló kemetepa, fo fotokɔiné duraalu, “Whi de woséli daapata, i dere fo wisiyóló wosóló tuę muae,” yalepó.

⁹ Tétepa, ama yó matere whirapené ɔpaae woseturaalu, “Naao ti yale fo sale noa betené yaleé?” yalepó.

¹⁰ Ai fo depa, ama atimapaae duraalu, “Tale Kótóné teteróló kaae tare aɔmó kinóló mole ala diaaɔ tuę yópóló, mené diɔ sóró beteró beterapó. Téretei, mepaae haɔle mo so whipaaeta, ti fo salené maaté du beterapó. Ti noatepae, “Take atima kelené kelaalotei, mo diriyóló koló faalomeipó.

Take atimané fo wosaalotei, bete mo diriyóló kisipa yaalomeipó,’ erapó.

¹¹ I yale fo sale bete i ape. Kale ɔla wae keta, ti Kótóné fo wisipó. ¹² Kale ɔla wae ke tumó taae doropóló mupa, barape dorowóló dósu yóló nale kaaeta, mepaae whi de Kótóné fo wisi wosóló, atimané hosaa tuɔmó mulatepatei, dowi Satan wóló, kale fo wisi tokó sua du beterapó. Aita haɔle mei, kale fo wisi wosóló kisipa tiratepa, Kótóné atima tao saqsóró du beterapó.

¹³ Téró, mepaae kane tómó dakere haemó taae derepele ɔla waeta, i ala dere kaaepó. Kótóné fo hekesetamo wisiyóló woseteretei, atimané tuę tuɔmó mulótimpó. Sawa sukamó kisipa tiki tiró bitu, woseté fu betaalotei, sekęi ala wale be demó hapale dée nukua dapó. ¹⁴ Kale dowi

ne dolomó taae doropóló ɔla wae botokó sóró honiyale kaaeta, i ape. Mepaae whi de Kótóné fo wosólótei, tumó furaalu, atima betere alamó doasi whaalia dere alakélé, tó tikiné felé yaaire alakélé, atimané kiswa tiki tuamó muló bitu, kale fo wisi botokó sóró aluróló, du wisi oletimipó. ¹⁵ Tépaitei, hae wisimó taae derepele ɔla waeta, i ala dere kaaepó. Mepaae so whiné kale fo wisi kiswa wisitamo wosóló keteréni, atimané hosaa tuamó mulóló eró tareteiné, ɔla wae kaae holóló, kale fo wisi du oletua dapó,” yalepó.

*Mo whi betanékelé lamp sɔ kinóló munanéni
yale fo*

(Mak 4:21-25)

¹⁶ “So whiné lamp sɔ dɛróló haené aleale nuku aomó ó fitere kea aomó kinóló munéni, so whi feané kolópóló dɛróló hakeamó mulótua dapó. ¹⁷ Ti so whiné kelaosóró mió hiróló muló betere ala fea take fopa hakeamó mulatepa, so whi feané kelaalopó. ¹⁸ Téyaalopa, mió diaaɔ wosetere fo wisi mo wisiyóló sya fóló, erótóró tawae. Ti noatepae, mepaae so whi dené Kótóné fo wisi mo bete mulapóló tao tapa, atétere so whipaae Talené tómó beleróló mo dekéro melaalopó. Mepaae so whi dené wosale fo wisi ama kswané tare nisi du betereiteikélé Kótóné fasó saalopó,” yalepó.

*Yesuné hamaró nomarapetamo wóló belamó
daalopó yale fo*

(Mat 12:46-50, Mak 3:31-35)

¹⁹ Téró etéyalepó. Yesuné ama hamaró nomarapetamo ɔ kelaai waleteti, so whi fea touraletikimó, ɔ daale felekepaae fenénipa, atima belamó kaae

tawóló daae molepó. ²⁰ Atépa, mepaae whjné ɔpaae duraalu, “Naa haeró nonaaorapetamo ya kelaai wóló belamó daae mulapó,” yalepó.

²¹ Ai fo depa, ama atimapaee duraalu, “Mepaae so whj de Kótóné fo wosóló erótu betepa, ti yɔlo haeró norapetamo ai ape,” yalepó.

*Yesuné hali tikiró besé tikitamo foné sale fo
(Mat 8:23-27, Mak 4:35-41)*

²² Téró me be demó Yesuné ama yó matere whjrapepaae duraalu, “I whj kɛla uté tɛró faalopa fiépe,” yalepó. Atétepa, atima nuku tuɔpaae bitj holóló, tɛ felepó. ²³ Atéró, atima nukutamó whj tómó fu bituraalu, ɔ nuku salemó toró mulóló, noke firepó. Atéró whj tómó fu betalemó, doakale besé tikiró whj asyatamo wale tikimó, nuku dolopaae whj bɔ dorowóló ɔɔaturaalu, weiné atima mo felekemó aluratapó, du betalepó.

²⁴ Tétepa, ama yó matere whjrape fóló, ɔ turukuróló duraalu, “Doa whj-ó, mió weiné dɔ mo felekemó i alurateré ape,” yalepó.

Atétepa, ɔ turukó holóló kale besé tikiró whj asyatamopaae taalae yóló foné salemó, béyóló dono felepó. ²⁵ Atéró, ama yó matere whjrapepaae duraalu, “Diɔ kisipa tiki tiró bitini airapó,” yalepó.

Ai fo deremó atima witepa, sirayóló atimasisitei duraalu, “I sekénéta, noa whjrópó. Wej asyaró besé tikitamokélé, ɔ aɔmó bitu, ama dere fo mo betɔ wosetapó,” yalepó.

*Dowi kepe tepeyóló betale whj wisirale fo
(Mat 8:28-34, Mak 5:1-20)*

²⁶ Atéró, atima ai Kaleli wẹi kẹla tẹyóló, Kadarin hae kwiamó sókó felepó. ²⁷ Atéró, Yesu ẹ nuku taaróló hae tópaae taae felemó, ai be huluumó betẹ dowi kepe tepeyóló betere whị ẹtamo hokola yaai walepó. Ẹ mo take bitiré woutei, kutikélé deréni, tiki hẹle whị dou tómótóro bitua yalepó. ²⁸ Atéyale whịné Yesu daale kolóló, keterẹ yóló ama hó aomó deraapisa fóló fió mulu fo fakeyóló duraalu, “Mo taoró betere Tale Kótóné Naalemaó, yalo yapaee dapa, naao ẹ momó kae susupuraose,” yalepó. ²⁹ Ti noatepae, Yesuné kale dowi kepepaae duraalu, ai whị tuamó betereitei taaróló sókó fae dere fomó yalepó. Ti ẹta, take mepaae whịné *sein* képiné dokóló mulótua yaleteti, kale dowi kepené ẹ whị bitinire tikipaae fópóló, hokó fatua yalepó.

³⁰ Yesuné ẹpaee woseturaalu, “Naao doi deé?” depa ama duraalu, “Yalo doita Lisanipó,” yalepó. Ti noatepae, ẹ tuamó keperape mo hẹle ọla kaae woló, betó moleteinépó. ³¹ Téró, kale dowi keperape atima betere tiki taaróló, mo apaae derepale dolopaae hokó deraose yóló momó du, momó du, yalepó.

³² Ai du sorokó mole aomó hupurape kimimó daae mupa, dowi keperapené Yesupaae woseturaalu, “Dẹ ai hupurape tuapaee bitị faai dapa, naao dapaee fae yaaloé? depa, Yesuné wisirapa téyae,” yalepó. ³³ Atétepa, kale dowi keperape kale whị tuamó betaleteti taaróló, kale hupurape tuapaee tepeyóló bitị felepó. Tétepa, kale hupurape botokó fele tikimó wẹiné sẹane kulamó doropóló, wẹiné sorokọ fóló, fea sisiraae felepó.

³⁴ Atétepa, kale hupu kaae tare whĩrape witu-raalu botokó fóló, doasi be huluaró ipu berapeta-mopaae fóló atimané kelale ala deté kwęyalepó.

³⁵ Ai fo wosale so whĩ feané noa ala yalerópóló kelaai felepó. Atéró, Yesu beteremó sókó felemó, dowi keperape tepeyóló betale whĩtei tuę wisi muóló, mo whĩ kaae kuti wisitamo betepa kilitu, atima wiyalepó. ³⁶ Téró, mepaae ai ala depa, kelale so whĩné ai wale so whĩpaae duraalu, “I whĩta, dowi keperape tepeyóló betale whĩtei, mió ą wisiyóló mo sesęre whĩ kaae, ai beterapa kelae,” yalepó. ³⁷ Téró, ai kale Kadarin hae kwiamó betó mole so whĩ doasi wituraalu, Yesupaae atima taaróló fae yóló, sętu betalepó. Atétepa, ą faairaaalu, węi nukupaae biťi holalepó.

³⁸ Tétepa, dowi keperape tepeyóló betale whĩné Yesupaae ąkélé yątamo fęnére? yóló wosalepó.

³⁹ Tétepa, Yesuné ą dotęyaaai duraalu, “Yą ętamo faalomeipa, Kótóné yąpaae erale ala yó melaai naao bepaee fesaae fae,” yalepó. Atétepa, kale whĩ ą fóló, Yesuné ąpaae erale alarape ai be huluaamó betó mole so whĩ feapaae yó melaté kwęyalepó.

*Yesuné betą senaaleró sotamo wisirale fo
(Mat 9:18-26, Mak 5:21-43)*

⁴⁰ Atéró, Yesu ą momó węi kęla tęyóló uté tęró sókó fóló beteremó, ą wópóló kaae tawóló betó mole so whĩ fea hękesetamo ą boperąle walepó. ⁴¹ Yesu atéró betepa, Kótóné fo wosetere be kaae tare whĩ Jairus wóló, Yesu kelalemó, mo doasi whĩpa, ama hó aqmó deraapisa fóló fió mulu, ąpaae mo miótóro ama bepaee faalopóló,

wosetu betalepó. ⁴² Aita haḷe mei, 12 ba fo kemere senaale mo betatóró betereitei mo felekemó sukḷai depa yalepó.

Téror, Yesu tumó fu betepa, so whi feané betekḷi betekḷi deté fu betalepó. ⁴³ A atéror sókó felemó, faḷe fu betepa 12 ba fo kemere so betḷa walepó. Tétu betepatei, mo whi betḷanékelé ama ai kisi bete wisiraaire mo sunipó. ⁴⁴ Atére so ḷ so whi kuamó Yesuné sisóró kikiti sókó wóló, ama tómó deró betere kuti salemó olaa yaletamotóró, ama samea fu betaletei tikalepó.

⁴⁵ Atétepa Yesuné atimapaee duraalu, “E né olaa yaleé?” yalepó. Téyalemó, ai so whi feané atima meipó depa Pitané duraalu, “Doa whi-ó, so whi feané ya tḷ alu yóló ai daae mole ape,” yalepó.

⁴⁶ Tétepa Yesuné duraalu, “Diḷkó whi betḷané e olaa yaletikimó, yaḷo fotokḷ sókó felepa, e né olaa yaleé?” yalepó.

⁴⁷ Téror, so whiné keletómó kale soné ama yale ala hiranénipa, ḷ Yesuné hó aqmó deraapisa fóló fió molepó. Atéru, ama kisi bete wisi yópóló kisipa mutu olaa yalemó, kisi bete mo hapale tétitóró wisiyalepo. ⁴⁸ Téror, kale sopaae duraalu, “Ti senaale-ó, naao kisipa tiki tiraletiné ya ai wisiyalepa, hosaa muni deyóló dua fae,” yalepó.

⁴⁹ Kale sotamo ai fo du betepatei, fo wosetere be kaae tare topo whi Jairus-né ama be whi wóló ḷpaae duraalu, “Naao senaale mo ti ai sukḷe ape. Térapa, yó matere whipaae fo me kae ini taalae,” yalepó.

⁵⁰ Ai dere fo wosóló, Yesuné kale wh̄i Jairus-paae duraalu, “Naao senaaleta wisiyaalopa, yā fo-moyóló whaaliani, kisipa tiki bet̄a tirae,” yalepó.

⁵¹ Atéró etéyalepó. Ā kale fo wosetere be kaae tare topo wh̄i Jairus-né bemó sókó fóló duraalu, “Mepaae wh̄irape ɛtamo faai dapóló waq̄se. Pita, Jon, Jems, kale senaalené alimaró hamatamo bet̄a wópóló yae,” yalepó. ⁵² Atéró, sókó fóló ke-lalemó, kale senaale sukóló mupa molóró fo tiki whaatamo du betepa, Yesuné atimapaae duraalu, “Ai senaaleta, sukuni noke firapa, diaaq̄ fo tiki whaaró moló-utamo taalae,” yalepó.

⁵³ Ai fo depa, atima mo so wh̄iné kisipané i senaaleta, mo ti sukunapóló, ā d̄o nanalepó.

⁵⁴ Tetepa, kale senaalené naasemó tao sóró duraalu, “Ti senaale-ó, yā turukó holae,” yalepó.

⁵⁵ Atétepa, ama kepe bete ā tuq̄paae momó bit̄i wouraalu, mo hapale tétitóró turukó holóló daayalepó. Tétepa, Yesuné atimapaae duraalu, “Me ɔlakó nópóló melae,” yalepó. ⁵⁶ Atétere ala kolóló, kale senaalené ama alimaró hamatamo hokomó sókó furaalu, sirayalepó. Tétepa, Yesuné atimaamopaae fo mulótu duraalu, “I ala yalepóló, mepaae so wh̄ipaae momókó yaq̄se,” yalepó.

9

Yesuné sóró beteralé 12 wh̄irape dotonale fo (Mat 10:5-15, Mak 6:7-16)

¹ Atéró etéyalepó. Yesuné ama dosq̄ayóló sóró betero betere 12 wh̄irape bet̄apaae tourq̄le ape depa, walepó. Atéró wóló betó mupa, ama doasi fotok̄ bulóo, so wh̄i tuq̄mó dowi keperape

beteretei, dóló hōkonótua yóo, mepaae kae kae kisi daale so wh̄rape wisirótua yóo, yópóló sóró beteralepó. ² Atéro atima dotęyaa*i* duraalu, “Dią be hulua dokę feapaae fóló, Kótóné tęteróló kaae tare aqmó mole ala yó melóo, mepaae hepo daale so wh̄ikélé wisiróo yaasepóló fae,” yalepó. ³ Atéro ama atimapaee duraalu, “Dią furaalu dotó tikikélé, waró yotamokélé, mo nokole ęlakélé, *monikélé*, kutikélé me dekaaporóló momókó sóró faęse. ⁴ Dią me be huluamó sókó fęnalemó, betą wh̄iné dią dape supa, ti ai wh̄itamotoró fitua yóló, fole sukamó ai be taalae. ⁵ Mepaae so wh̄iné diątamo dape sini depa, ti atimané yale alamó dapóló kisipa muópólópa, ai be hulua taaróló faairaa*lu*, diaaę hómó dakere hae terepée deróló fae,” yalepó. ⁶ Atéro atima fóló, be hulua dokę feamó kale fo wisi yó maté kweyóo, atima kotere be huluamó kisi muó mole so wh̄ikélé, fea wisiraté kweyóo, yalepó.

⁷ Atima ai ala deté kutu betera*pó* dere fo Kaleli hae kwia tęteróló kaae tare wh̄i Herot-né wosalepó. Mepaae so wh̄iné kale sukąle wh̄i Jon momó kepaayóló betera*póló* deté fele fo wosetu, Herot-né ama kisipa tiki kęló kęló du betalepó. ⁸ Atétepa mepaae so wh̄iné duraalu, “Mo take betale wh̄i Ilaija wóló biturapó. Tétepa, mepaae so wh̄iné du, mo take betóló sukąle Kótóné ama kęló wh̄irapekó, momó kepaayóló wou yalepó,” du betalepó. ⁹ Tétepa kale topo wh̄i Herot-né duraalu, “Jon-ta, yało diki tare wh̄irapené depa tikalepa, aita demó dérópóló,” ama keęle faai kisipa mualepó.

*Yesuné 5,000 wh̄rape ɣla melale fo
(Mat 14:13-21, Mak 6:30-44, Jon 6:1-13)*

¹⁰ Téró, ama doteyale wh̄rape atima momó fesaae wóló, atimané yale alarape Yesupaae yó melalepó. Téró, ama atima maaté dape sóró, Betsaida be huluapaae felepó. ¹¹ Atima atéro felepó dere fo so wh̄ mo turóné woseturaalu, ɣ sya felepó. Atima atéro ɣ beterepaae wapa, wisirapóló dape sóró, Kótóné teteróló kaae tare aqmó mole ala atimapaae yó melóo, mepaae hepo daapa wale so wh̄kélé wisiróo, yalepó.

¹² Atéro, suka doropoletamo ama yó matepa wosetere 12 wh̄rape ɣ beterepaae wóló duraalu, “D̄ta ɣlakélé meire tikimó betera, i so wh̄ felekemó t̄ mole berapepaae fóló atimané naaire ɣlaró fiyaaire betamo atimanétei kek̄ai f̄pólópa, dotonae,” yalepó.

¹³ Ti fo depa, ama atimapaae duraalu, “Di-aaq̄tei, atima naaire ɣla melae,” depa atimané ɣpaae duraalu, “D̄néta, *bred* o bula aporó yóo, ya tamo yóo, yóló bet̄ i mole ape. Térapa, naao kisané i betó mole so wh̄né naaire ɣlakó d̄nétei dupune f̄póló kiswa mute?” yalepó.

¹⁴ Atéro, aimó betó muale soró naale senaale-tamo dos̄ani, wh̄ maaté dos̄ayóló touróturaalu, 5,000-rópó.

Tépatei, ama yó matere wh̄rapepaae duraalu, “Dos̄ayóló 50 wh̄rape kae kae yóló beteraté kw̄yae,” yalepó. ¹⁵ Tétepa, ama yó matere wh̄rapené so wh̄ fea taleróló beteraté felepó. ¹⁶ Atépa, Yesuné *bred* o bula aporó yóo, ya tamo yóo yóló taruraalu, hepen-paae kese holóló

Kótópaae mo kée yóló terekée daalu yalepó. Téro, ama yó matere whirapepaae melatepa, atimanémo so whi feamó aliraté kweyalepó. ¹⁷ Atéro, atima fea nalemo sũtepa, buki muni feletei, ama yó matere whirapené siré kweyóló, ¹² yorape deyóló fãanalepó.

Pitané Yesupaae Kótóné sóró betero betere whi Kerisopó yale fo

(Mat 16:13-28, Mak 8:27-9:1)

¹⁸ Téro, me sukamó etéyalepó. Ama yó matere whirape atimasisi maaté moma du bitu, ama atimapaae duraalu, “Ai so whi feané e-a, depó du bitu de?” yalepó.

¹⁹ Ti fo depa, atimané duraalu, “Mepaae so whiné yaata, wei tópuratere whi Jon-pó, mepaae so whiné ti Elaijapó, mepaae so whiné ti mo take betale Kótóné kóló whirapekó kepaayóló bituraalu, du betera,” yalepó.

²⁰ Ai fo depa, ama atimapaae duraalu, “Diãnéta e depóló kisipa mute?” yalepó. Atétepa Pitané duraalu, “Yaata, Kótóné so whi fea teteróló kaae tanópóló, sóró betero betere whi Kerisopó,” yalepó.

²¹ Ti fo depa, Yesuné atimapaae fo fotokõiné duraalu, “Pitané ai yale fota, so whipaae momókó yaqse,” yalepó. ²² Téro ama duraalu, “Kale Whiné Naalema kae kae sekei ala saalo ai ape. Doasi whi disirapénékélé, mo so whimó Talepaae momaratere topo whirapénékélé, Moses-né asere fo yó matere whirapénékélé, a mené dõpóló, só deraalo ai ape. Téyaalotei, a momó kepaayóló betaalopó,” yalepó.

²³ Téró ama yó matere wh̄irapepaae duraalu, “Wh̄i me de ę fole tuḡmó waaí kisipa mutepa, ti naao yaaire ala t̄eteróló ya dóló oleraaire fili-paa ni naaotei beleyóló, betere dok̄o ę sya ape. ²⁴ Mepaae so wh̄i dené ama betere bete me ala yaḡsórópóló amatei hotowaró kaae tapa, atétere so wh̄iné betere bete aluyaalo ai ape. Téyaalotei, wh̄i me dené yaḡo ala eróturaalu, Talepaae naaopóló taalatepa, atétere wh̄iné betere bete aluni, mo ti betó tawaalopó. ²⁵ Bet̄a wh̄iné i haemó muó mole wisi wisi ęla dekéró sóró bet̄apaae du betere tuḡmó ama betere bete alutepa, ti me noa dupu wisikó saaloé? ²⁶ Mepaae wh̄i de witu halemó, ękélé, yaḡo fokélé tuęnipó depa, kale Wh̄iné Naalemakélé, Alimakélé, mo kae betere *ensel*-rapekélé ama mo kae ere d̄etamo wale sukamó, Wh̄iné Naalemanékélé ai wh̄i ę tuęnipó, yaalopó. ²⁷ Téyaalopa, yaḡo diḡpaae mo i dere ape. Diḡ i daae mole so wh̄i mepaae suk̄aipatei, Kótóné t̄eteróló kaae tare ala mo kelaalopó,” yalepó.

*Yesuné ama tiki kae daane wale fo
(Mat 17:1-13, Mak 9:2-13)*

²⁸ Yesuné i forape yóló bitiré fóló, bokó waleró be d̄e kemetepa, etéyalepó. Pita, Jon, Jems, atima Yesuné dape sóró du sorokó molepaae moma yaairaalu felepó. ²⁹ Atéró holóló momatu be-talemó, ama kelepaa kae daane wóo, ama deró betere kutikélé mo epée d̄e kaae yó fóo, yalepó. ³⁰⁻³¹ Atére tuḡmó, wh̄i tamo Moses-ró Elaijatamo mo kae ere d̄etamo sókó wóló, Yesutamo fo du betepa kelalepó. Atima atéró du betale fota,

Yesu ą i hae taaróló hepen-paae momó fesaae faaire ala dokonóló, Jerusalem bemó eraalopó du betalepó. ³² Pitaró ama fulumu wh̄rapetamo noke fi turukó horóló kelalemó, kale wh̄i tamo mo doasi ere de ɽ tuamó daalu, Yesutamo fo du betalepó. ³³ Atéró, kale wh̄i tamo Yesu taaróló faai depa Pitané duraalu, “Yó matere doa wh̄i-ó, dą fea etéró betere ala mo wisirapó. Dąné diąmó furu be sore ɽnaai kisipa mutapó. Me ɽamó ɽenóo, me Moses-mó ɽenóo, me Elaijamó ɽenóo, yaalopó,” yalepó. Aita, Pita ą noa fo enénitepa, kóló kóló duraalu yalepó.

³⁴ Pitané atéró fo du betepatei, sąko dorowóló atima husuratepa, doasi winé sukutu betalepó. ³⁵ Ai sąko dolomó i fo yalepó. “Ita, ɽalo Naalepó. ą sókó sóró, ɽalo kae beteró betepapa, ama dere fo wosae,” yalepó. ³⁶ Ai fo yóló kemetepa kelalemó, Yesu ą betą daapa kelalepó. Ama yó matere wh̄rape atimané ai kelale alarape mo so wh̄ipaae ini, hiróló bitiré felepó.

Yesuné dowi kepe tepeyóló betere naale wisirale fo

(Mat 17:14-21, Mak 9:14-29)

³⁷ Atéró be deɽyó hotepa, atima ai du sorokó mole tiki taaróló dorowou betalemó, so wh̄i mo hąle ąla kaae ątamo ɽumó hokolaa yaai walepó. ³⁸ Ai so wh̄i betó mole kua dolomó betą wh̄i turukó holóló daalu, fo tokoróló duraalu, “Yó matere wh̄i-ó, ɽalo mo betą naale naao wisirąle waalóe? ³⁹ Suka fea dowi kepené ą taneta depa, keteré yóló ama kóló dako sókó wua dapó. Até duraalu, dowi kepené ą taaróló feni, fotokąné

ama tiki feseróló, hó naasekéle sosoro faróló mo dorótua dapó. ⁴⁰ Até du betepa, naao yó matere wh̄rapepaae h̄konaaloé? yóló wosalemó, atima s̄unipó,” yalepó.

⁴¹ Ai fo depa, Yesuné atimapaae duraalu, “Mió i alimó kisipa tiki tiréni, dow̄aae fóló k̄opaae fu betere so wh̄-ó, dī t̄ wisipaae f̄ópóló ę dītamo betale supa, ai naale ipaae dapesó ape,” yalepó.

⁴² Kale naale dapesó wou betepatei, dowi kepené haepaae taae deralepó. Atéró haemó mulu, feserótu betepa, Yesuné kale keperape foné s̄oró duraalu, ai naale tuamó beteretei h̄kó faróló, alimapaae malepó.

⁴³⁻⁴⁴ Kótóné doasi fotok̄oné eralepóló, so wh̄ feané kilituraalu, siratu betalepó. Yesuné atéró yale alamó so wh̄ feané haió, i-a noa ala yalerópóló, siratu betepa, ama yó matere wh̄rapepaae duraalu, “Ȳlo dīpaae i yaaitere fo mo wisiyóló wosóló kisipa muae. Kale Wh̄iné Naalema mo wh̄rapené d̄ópóló, mené eleké deyaalo ai ape,” yalepó. ⁴⁵ Ama atéró yale fo kinóló moleteiné bete atima wisiyóló kisipa initepa wosaai yalemó, atima wituraalu taaralepó.

*Doasi topo wh̄ de betaaloé yale fo
(Mat 18:1-5, Mak 9:33-40)*

⁴⁶ Téró, Yesuné ama yó matere wh̄rape atimasitei de doasi topo wh̄ beteré yóló, u só derólu i só derólu dere ala kaae salepó. ⁴⁷ Atimané atéró mutere kisipa Yesuné kolóló, naale bet̄ tao s̄oró turukó horóló ą daale demó daalalepó.

⁴⁸ Téró, ama atimapaae duraalu, “Wh̄ me dené

yalo doimó etei kaae naale wisiyóló dape supa, ti ɛtei dape sirapó. Wh̄i me dené ɛ wisiyóló dape supa, ti ɛ dotɛyale sekétei dape sirapó. Wh̄i me de diã tuãmó naale belekãamale aleyóló belei betepa, ti ɔ doasi wh̄i ai betere ape,” yalepó.

⁴⁹ Ai fo depa wosóló, Jon-né duraalu, “Tale doa wh̄i-ó, betã wh̄iné naao doi yóló dowi kepe hõkonótu betepa, ɔta ðákó meipóló kisipa mutu, ðané ɔpaae atékese yóló, sesé du betalepó,” yalepó.

⁵⁰ Ai fo depa, Yesuné ɔpaae duraalu, “Diaaɔ ɔ sesé yaɔse. Ti noatepae, mepaae diãtamo bóe dinitere wh̄ita, ti diãtamo mole wh̄i ai ape,” yalepó.

Yesu wisiyóló dape sini yale fo

⁵¹ Téró, Yesu i hae taaróló hepen-paae dapesó holaai feleke deremó, ɔ me tikipaae faai kisipa muni, Jerusalem be huluapaae maaté faai fotokõ yalepó. ⁵² Téró, Yesu ɔ nalo faairaalu, mepaae wh̄irape beró naaire ɔlatamo donoróló mulaai atimapi fõpóló dotonatepa, atima Samaria hae tuãmó tene bemó sókó felepó. ⁵³ Téyaleteti, ai be hulua so wh̄i feané ɔ Jerusalem bepaae faai wale kilitu, dape sinipó. ⁵⁴ Atétere ala kilitu, ama yó matere wh̄itamo Jems-ró Jon-tamoné ɔpaae duraalu, “Tale-ó, i be huluamó betó mole so wh̄i fea hepen-mó mole si dorowõpóló yaé yóló kisipa mute?” yalepó. ⁵⁵⁻⁵⁶ Ai fo depa, Yesu ɔ fetée fóló atimaamo foné sóró, atima me be huluapaae felepó.

*Betɔ whɛné Yesupaae yɔ sya walapó yale fo
(Mat 8:19-22)*

⁵⁷ Atéro atima fu betalemó, tɔ tuámó whɛ betɔné ɔpaae duraalu, “Yɔ mopaae fupa, ti ɛkélé yɔtóro sya waalopó,” yalepó.

⁵⁸ Ai fo depa, Yesuné duraalu, “Hɔonarapeta, atima fitere tiki yóo, barapekélé fiyaaire dépi daayóo eretei, Whɛné Naalema betɔ toró mulóló fiyaaire tiki inipó,” yalepó.

⁵⁹ Atéro, whɛ mepaae duraalu, “Yɔ ɛ sya ape,” yalepó. Ai fo depa, kale whɛné duraalu, “Tale-ó, folosóro ɛ yɔlo ayapi dourɔle fulapa, wisire?” yalepó.

⁶⁰ Ai fo depa, Yesuné ɔpaae duraalu, “Sukune aɔre whɛné ti sukune whɛ dourópóló, yɔ ti Kótóné tɛteróló kaae tare aɔmó mole ala yó maté kweyae,” yalepó.

⁶¹ Atéro, me whɛnékélé duraalu, “Tale-ó, ɛ yɔ sya waaitei, yɔlo hae ayapaae kɔleó fo ene faai kisipa mutapó,” yalepó.

⁶² Ti fo depa, Yesuné ɔpaae duraalu, “Whɛ me de ama kutó ditu bitutei, dɛpaae kele mulatere whɛné Kótóné tɛteróló kaae tare aɔmó mole kutó diraaire sɔnipó,” yalepó.

10

Yesuné 72 whɛrape dotɛyale fo

¹ Atéyale kilipaae. Talené mepaae 72 whɛrape sóro beteróló, ɔ faai dere be hulua dokɔpaae atimapi fópóló, tamo tamoyóló dotɛyalepó.

² Atéro dotɛyaae atimapaae duraalu, “Kutómó ɔla mo dekeró ɔlumépaitei, ai ɔla saaire whɛ betɔ

doaló meipó. Térapa, ai ɔla sere ala tɛtɛróló kaae tare Talené mepaae wh̄irapekó ai kutópaae dotonópóló, Talepaae kemayae. ³ Diɔ betɛ h̄orape betere tuɔpaae *sipsip* hupu malerape kaae, ɔalo i dotonaterɛ ape. ⁴ Diɔ furaalu *moni* detere bekélé, mo yokélé, hó bekélé, sóró faɔse. Tuɔmó furaalu, so wh̄ipaae kɔleó fokélé ini, fó betɔ yae.

⁵ Diɔ betɔ wh̄iné bemó sókó furaalu, Kótóné hosaa muni deyóló dua betere ala diɔ tuɔmó mulópóló yae, fo betɔ yae. ⁶ Ai be tuɔmó hosaa muni deyóló dua betere wh̄itamo betɛpa, ti Kótóné hosaa muni deyóló dua betere ala ai wh̄i tuɔmó muaalopó. Meipa, ti ai ala diɔtamo momó fesaae waalo ai ape. ⁷ Ai fitere bemótóro bitu, atimané diɔmó matere ɔlaró wɛitamotóro nuku betae. Ti aita, diaaɔ diteremó kutómó dupu dono ai sere ape. Térapa, diɔ be dokɔ h̄ko fité kuni, fitere bemótóro fitua yae.

⁸ Téró, diɔ betɔ be huluamó sókó fenalemó, ai be hulua so wh̄iné diɔ wisiyóló dape sóró ɔla matepa, ti ai ɔlatóro nae. ⁹ Atéro bitu, ai be huluamó kisi daae mole so wh̄i wisirótua yae. Diaaɔ atimapaae yó mótu, ‘Kótóné tɛtɛróló kaae tare alakélé diɔ betɛrepaae mo felekemó wale ape,’ fo yae. ¹⁰ Téyaalotei, diɔ betɔ be huluamó sókó fenalemó, atimané diɔ wisiyóló dape sinitɛpa, ti ai be bela tuɔmó daalu, atimapaae i fo yae. ¹¹ ‘Diaaɔ yale alamó, diɔné be hae ɔané hómó dakeretei diaaɔ keletómó i helekɛtere ape,’ fo yae. Diɔné dowɔae fu betɛpa, Kótóné tɛtɛróló kaae tare aɔmó mole ala mo felekemó

waalopa, diꞑ diriyóló kisipa muae yae,” yalepó.
 12 Atéró, Yesuné ama yó matere wh̄rapepaae duraalu, “Yꞑlo diꞑpaae mo i dere ape. Kótóné i haemó betó mole so wh̄j taletere sukamó, Sodom be huluamó betó mole so wh̄jpaae doasi sek̄ei ala eraalotei, diꞑ wisiyóló dape sinitere be hulua so wh̄jpaae eraaire sek̄ei alata, mo doasi bosenóló eraalo ai ape.

13 Korasin beró Betsaida be huluatamomó betó mole so wh̄j diꞑ tuꞑpaae doasi sek̄ei ala waalopa, diꞑ mo wió yae. Ti noatepae, i be hulua tamomó erale kelemei kaae, Tair-ró Saidon be huluatamomó erólusóró, ti atima mo taketitei yei kuti bukóo, kili diyóo, yóló kisipa feteyóló bituꞑpó.
 14 Téyaalotei, Kótóné fo tokóló tale dere sukamó Taia-ró Saidon be hulua so wh̄j tamopaae sek̄ei ala eraalotei, diꞑpaaeta, ai bosenóló mo doasi sek̄ei ala eraalo ai ape. 15 Diꞑ Kapeneam be hulua so wh̄j-ó, diaaꞑ kisipané diꞑ Talené ó sꞑpaae dapesó horaalopóló de? Meipa, doa kꞑleó. Wh̄j mo ti sukóló aluyaaire dolopaaetei derepaalo ai ape,” yalepó.

16 Tétepa, Yesuné ama yó matere wh̄rapepaae duraalu, “Mepaae diaaꞑ dere fo wosetere so wh̄jiné ti yꞑlo dere fokélé wosetapó. Mepaae so wh̄j dené diꞑ h̄ratepa, ti ɛkélé h̄ratapó. Téretei, mepaae wh̄j dené yꞑlo dere fo woseni nisiyóló h̄ratepa, ti ɛ dot̄eyale wh̄jkélé h̄ratapó,” yalepó.

17 Téró, kale dot̄eyale 72 wh̄rape h̄kesetamo momó fesaae wóló duraalu, “Tale-ó, ɗané naao doi yóló dowi keperape doló h̄konatepa, ɗané dere fo mo betꞑ wosóló fua dapó,” yalepó.

18 Ti fo depa, ama atimapaae duraalu, “Hepen bemó dowi Satan epée de kaae fitaa deté i haepaae dorowapa kelalepó. 19 Dowi wuliró tɔrapetamo diáne tɛya depa, dáne bóe whi Satan-né bole fotokóné diɔ doraalomeipó. 20 Ti ai alata motei, kale dowi keperape diɔ aɔmó sukóló beteremó hekeseni, hepen bemó diaaɔ doi aseýóló moleteimó betɔ diɔ hekesetu betae,” yalepó.

21 Atéyale sukamó, Yesu ɔ Deɔ Kepe Wisiné fotokɔratepa, doasi hajné sukutu duraalu, “Hepen beró haetamo aleóló muló betere Aya Tale-ó, *skul* yóló doasi kisipa sere whɔraperó fea ala tuɛre whɔrapetamoné kelaɔsóró kinóo, ketei aɔre whɔrapené kolópóló, haɔkearóo dere kilitu, yało yapaae mo kée yóló, naao doi sóró horatapó. Aya-ó, aita mo naao kisipa mole alatóro erapó,” yalepó.

22 Téró, Yesuné atimapaae duraalu, “Ai ala feata, yało tɛteróló kaae tanópóló, Ayané ɛpaae meló beterapó. Whi betɔnekélé Naalema tuɛni, Alimané betɔ tuɛrapó. Atére kaae, Alimakélé whi betɔné tuɛni, Naalemané betɔ tuɛrapó. Atérené Naalemané ama Aya i ape yóló yó melaai tuɛ mole so whɔpaae yó matepa, ai so whɔiné maaté Alima tuɛnérapó,” yalepó.

23 Téró, Yesu ɔ ama yó matere whɔrape atimanale bitu, ɔ atima beterepaae fetée fóló duraalu, “Mió diaaɔ kelené i kilitu betere ala tuɛ sere so whi Kótóné wisiró beterapóló, hajné sukutu beterópóló yae. 24 Ti noatepae, yało diɔpaae mo i dere ape. Mió keletere ala take

betale kóló wh̄iraperó topo wh̄irapetamoné kelenée deté waleteti kilini yóo, diaaq̄ wosetu betere fokélé wosenée deté waleteti woseni yóo ipakalepó,” yalepó.

Samaria wh̄iné Juda wh̄i tao sale fo

²⁵ Téró, Moses-né as̄ere fo yó matere wh̄i bet̄a turukó holóló Yesu s̄usóró duraalu, “Yó matere wh̄i-ó, ę̄ mo ti betó tawaairaaalu, noa alakó yaaloé?” yalepó.

²⁶ Ti fo depa ama duraalu, “Ai as̄emó noa fo ere? Ai yóló muló betere fo dos̄atu, naao noa kisipa mute?” yalepó.

²⁷ Ai fo depa, kale wh̄iné ą̄paae tokó mótu duraalu, “Tale Kótópaae h̄ekesené sinóló yaala sókó fole alata, naao hosaa turónékélé, kepe turónékélé, fotok̄o turónékélé, kisipa tiki turónékélé, du betae. Tétu, naaotei ȳa h̄ekesené sukutu dere kaae, naao be wh̄i so wh̄ipaaekélé, atéró h̄ekesené sukóló yaala sókó fu betae,” yalepó.

²⁸ Ti fo depa, Yesuné kale wh̄ipaae duraalu, “Aita, naao mo dono tokó matapa, ȳa mo ti betaasepóló, ai alatóro h̄ale yó tawae,” yalepó.

²⁹ Téró kale wh̄iné ama yale fonétei ą̄ só deranépa, ą̄ donore wh̄i aq̄yóló Yesupaae wosetu-raalu, “Naao ę̄paae be wh̄ipó dere fo-a, demó de?” yalepó.

³⁰ Ai fo depa, Yesuné duraalu, “Wh̄i bet̄a i Jerusalem be taaróló, Jeriko bepaae durupu betalepó. Téyalemó, qlémi nokole wh̄irape t̄u tuamó melaa muóló, ama kuti sorokóló taae faróló ą̄ susupuróló felekemó suk̄ai du betepa

atima felepó. ³¹ Atéró, Talepaae momaratere whi betã ai kale whi derepele tumó durupuraalu kelalemó, kale whi tumó mupa, dekeróló ą demó derepelepó. ³² Atétepa, betã Lipai fake whi ąkélé sókó walemó, kale whi sinóló mupa kolóló, dekeróló ąkélé demó felepó. ³³ Téyaletei, betã Samaria whi ąkélé kale whi mole tikimó sókó wouraalu kelalemó, kõi ala epa kilitu, ama tao saai kisipa mualepó. ³⁴ Atéturaalu, ą kale whi mole felekepaae fóló, kale whiné doalére tikimó *wel* weiró *wain* weitamó dilóló dokalepó. Téró, kale whi ama *donki* hupu tómó beteróló fóló, uké whirape fitua dere bemó beteróló, kale whi ama mo wisiyóló kaae tarepó. ³⁵ Téró, be depepa hika kale whiné ama *silpa moni* tamo sóró, kale uké whirape fitere be kaae tare whipaae duraalu, ‘Yalo i matere *moniné* ą kaae taté felalemó, ai *moni* tamo kemetepa, ti ę wóló naao *moni* yalo tokó melaalopa, ą mo wisiyóló kaae tawae,’ yalepó.

³⁶ Téró, Yesuné kale Moses-né asere fo yó matere whipaae duraalu, “Naao kisipané i whirape sorekó mé whi kale dale whiné ama be whi kaae aoyaleé?” yalepó.

³⁷ Ti fo depa, kale whiné momó tokó mótu duraalu, “Kõlené sukutu tao sale whipó,” yalepó. Ai fo depa, Yesuné ąpaae duraalu, “Ama yale ala kaae, naakélé yaai fae,” yalepó.

Yesu Mataró Meriatamo betere be huluumó betale fo

³⁸ Téró, Yesu ą ama yó matere whirapetamo tumó fité woló, Mata betere be huluumó sókó

wapa, Matané aṭamo betaai dape salepó. ³⁹ Matané kema Mariakélé Yesuné hó aq̄mó bituraalu, ama dere fo wosetu betalepó. ⁴⁰ Atétu betepatei, Marta a atima naaire q̄lamó bipi du bituraalu, ama yó matere fo wisiyóló wosenipó. Atétepa, kale so Yesu beterepaae wóló aṭaae duraalu, “Tale-ó, e yaḷo wotoró depe tukó wei ala du beterapa, ama e tao sene wópóló, naao aṭaae dumié?” yalepó.

⁴¹ Ti fo depa, Talené aṭaae duraalu, “Ti senaale Mata-ó, yaṭa mepaae ala noa yaaloé yóló, doasi whaalia du betereiteiné ya ai só deró betere ape. ⁴² Téretei, mo doasi topo q̄la betā ya seni, yaṭa ai ere ape. Mariané ama betā mo doasi topo q̄lapóló kisipa muóló sóró taretei dāné fasó saalomeipó,” yalepó.

11

*Yesuné Talepaae moma dere ala yó melale fo
(Mat 6:9-15, 7:7-11)*

¹ Téró me sukamó. Yesu a me tikimó bitu, moma du beterepó. Atéró, moma yóló kemetepa, ama yó matere whi betāné aṭaae duraalu, “Tale-ó, Jon-né ama yó matere whiraepaae Kótópaae momatere ala yó melale kaae, naao dākéle yó melaasepé,” yalepó.

² Ai fo depa, ama atimapaee duraalu, “Diaaq̄ Talepaae moma dere ala etéro yae.

‘Aya-ó, yaṭa dowi ala mo betākéle munire Kótó betereiteiné so whi feané naao doi wisinaale doasi mulópóló yae.

Naaŋ t̄eteróló kaae tare aq̄mó mole ala wisi wópóló yae.

³ Be d̄e dok̄o bet̄a bet̄amó d̄ané naaire ɔla naao s̄umó ɔlae.

⁴ Mepaae so wh̄iné d̄apaae erale dowi ala kwia tani, me ɔla meipóló h̄ale kemeratapa, d̄ané dowi ala kwiakélé naao h̄ale kemerae.

Téturaalu, s̄u sere alané d̄a deé nalaqsóró, naao d̄a ɔlisóró fae.’ ”

⁵⁻⁶ Téró, ama atimapaae duraalu, “Dīakó bet̄a wh̄iné ama fulumu wh̄i saletómó wóló betepa, ɔ diliki s̄u tūatamo ama noma beterepaae fóló duraalu, ‘No-ó, ȳalo fulumu wh̄i mióti sókó waleteteiné naaire ɔla meitepa, ȳapaae *bred* o bula sorekó ɔ maletamo melaasepé fo dekeró yó tapa, noa ala yaaloé?’

⁷ Ai be dolomó betere wh̄iné i fo yaalopó. ‘Be t̄u kinóló ȳalo naale senaaletamo fireteiné turukó holóló, naao kematere ɔla menanénipa, ɛpaae dotopoi fo ekesé,’ dua dapó. ⁸ Ȳalo dīapaae i dere ape. Kale wh̄i ɔ halainé kematóró h̄ale yó tapa, ama fulumu wh̄i turukó horóló kematere ɔla manénipatei, mo s̄umótóró melaalo ai ape.

⁹ Atérapa, ȳalo dīapaae i dere ape. Talepaae me ɔlakó kematepa, ai kematere ɔla melóo, keketepa ti ai ɔla mo kolóo, t̄u tuk̄iyae yóló t̄u dupa, ti tuk̄i yóo yaalopó. ¹⁰ Ti noatepae, mepaae kematere so wh̄iné ti mo sua dapó. Mepaae so wh̄iné keketepa ti ai ɔla mo kilitua dapó. Mepaae so wh̄iné t̄u tuk̄iyae yóló t̄u dupa, atétere so wh̄i wópóló t̄u tuk̄itua dapó.

11 Diakó me whjné diaaḡ naale senaalené yakópóló kematepa, ya taaróló, dowi wuli male melaaloé? 12 Ó naao senaale naalené ba kekó ‘Aḡae’ depa, ai kematere ḡla taaróló, whj tukó nokole tḡ melaaloé? Meipó. 13 Diḡ dowi ala du betere whjrape bitutei, diaaḡ naale senaalemó wisi wisi ḡla matere ala diaaḡ ai kisipare ape. Atére kaae, mepaae so whj dené Dḡi Kepe Wisi kematepa, ó hepen-mó betere diaaḡ Aya Talené mo melaalo ai ape,” yalepó.

*Yesupaae Belsebul-né fotokḡratepa dapó yale fo
(Mat 12:22-30, Mak 3:20-27)*

14 Téró me sukamó etéyalepó. Dowi kepené whj betḡ kḡló nomonó betepa, Yesuné dóló hḡkonalepó. Atétepa, kale dowi kepe sókó fu-raalu, ama fo kaae sóró deremó, ai touró betere so whj feané sirayalepó. 15 Atétepa, mepaae so whjné duraalu, “Aita, dowi keperapené topo kepe Belsebul-né fotokḡratepa, dóló hḡkonótu beter-apó,” yalepó. 16 Ai fo depa, mepaae whjrapené ama noa ala deró ḡ sḡ sóró kḡae kilituraalu, ḡpaae hepen bemó mole betḡ fareyópu eratapóló ḡané kisipa yaaipa, erae yalepó.

17 Atéró mutere tuḡ tiki Yesuné kisipa yóló atimapaee duraalu, “Mepaae doasi topo whjrape atimané tḡteróló kaae tare tuḡmó atimasisitei bóe dupa, ti tḡteróló kaae tare ala mo haepaae doropóló doyóo, betḡ be huluamó betó mole so whjkelé atimasisitei bóe dupa, ti ai be haepaae doropóló mo doyóo yaalopó. 18 Satan ama fake atimasisitei bóe dupa, ti ama tḡteróló kaae tare ala netéró fotokḡ buaaloé? Yaḡlo i dere fota, diaaḡ

ɛpaae ya dowi keperapené topo kepe Belsebul-né fotokɔratepa, hɔkonótu beteropó depa i dere ape. ¹⁹ Ti diaaɔ ɛpaae topo kepe Belsebul-né fotokɔratepa, dóló hɔkonalepó dere-a, diɔ fak-enékélé dóló hɔkonótu betere ala né fotokɔratepa de? Motamo Kótóné fotokɔ bulatepa dapó depa, ti fo tokóló taletere sukamó atimanétei diɔ só deraalopó. ²⁰ Téretei, yaɔlotamo Kótóné fotokɔné dowi keperape dóló hɔkonélipa, ti Tale Kótóné tɛteróló kaae tare aɔmó mole ala diɔ tuɔpaae wóló i mole ape.

²¹ Fotokɔ bole whjné be ó ɔla ɔla mepaae whjné doraɔsóró, sesé duraalu, kale whjné ama tɔró dikitamo tawóló, siki siki yóló kaae tapa, whj mené doraalomeipó. ²² Téretei, mepaae doasi fotokɔ bole whjné bóe sókó wouraalu, kale doasi fotokɔ bole whj dóló tɛteróló, bóe dele ɔla ɔlakélé fea fasóló, ama bemó muó mole wisi wisi ɔlakélé fea sóró ama be whjamo ɔli yaai sóró fulapó.

²³ Whj me de ɛtamo betámó bitinipa, ti ɛtamo bóe dilapó. Whj me de ɛtamo bitu, ɛ fasóló ɔla ɔla betɔpaaeróló munénitepa, ai whjné yaɔlo ɔla ɔla hɔko besekératapó.

²⁴ Atéró, kale dowi kepe whjné depe tuámó betereitei, sókó furaalu kópui hae tikipaae ɔ feléyóló betaaire tiki kekɔairaalu fua dapó. Atéró fóló, kelenalemó betaaire tiki kilinitepa, ɔ take betale be kelaai momó fesaae faai dapó dua dapó. ²⁵ Atéró ɔ sókó wóló kelenalemó, kale be wisiyóló fuóló taae faróló, wisiró betepa keletapó. ²⁶ Téró, kale dowi kepe ɔ momó fóló, mepaae dowi ala mo turó fɔane wɛikeró keperape dape sóró, kale

bepaae momó bitı̄ walapó. Atétepa, kale whı̄ ą take bitu sawa doyaletı̄, mió mo ti doyó faalopó,” yalepó.

²⁷ Atéró Yesuné ai forape du betepa, so whı̄ fea betó mole kuamó so betanı́ fo fakeyóló duraalu, “Yą deyóló awą male so naao hae Tale Kótóné wisiró betepa, ą hainé sinóló beterópóló yae,” yalepó.

²⁸ Ti fo depa, Yesuné atimapaae duraalu, “Ai dukiratere fota mepaae whı̄ de Kótóné fo wosóló, sya fóló erótu betere so whı̄ta, Tale Kótóné wisiró betereiteiné hainé sukutu betepapó,” yalepó.

Yesupaae me ala yaairemó dere fareyópukó erae yale fo

(Mat 12:38-42, Mak 8:12)

²⁹ Téró, so whı̄ fea wóló touró betepa Yesuné duraalu, “Mió i alimó betere so whı̄ dowi alané ąanuteı̄, ępaae doasi sira yaaire me fareyópukó erae du betepapó. Tépaiteı̄, me kae eraalomeı̄pa, mo take Jonapaae erale ala kaae betą eratepa kelaalo ai ape. ³⁰ Ti noatepae, Ninı̄pa so whı̄né Jonapaae erale fareyópu kilituraalu, ita Kótóné dotonale whı̄póló kisı̄pa moı̄pakalepó. Atéyale kaae, mió i alimó betere so whı̄nékélé Whı̄né Naalemapaae eratere ala kilituraalu, ita Tale Kótóné dotonó betere whı̄pó kisı̄pa muaalo ai ape. ³¹ Betą *Saoti* hae kwia teteróló betere doasi topo *kwin* soné mió i alimó betó mole so whı̄tamo fo tokóló taletere be demó, dią só deraalo ai ape. Ti noatepae, ai sota hae kwia dene falepaae bitı̄ wóló, Solomon-né fosó fosói kisı̄pa muóló yó

matere fo wosaai walepó. Téyaletei, Solomoné mole kisipa bosenóló wh̄i bet̄a i betere ape. ³² Téretei, Ninipa be hulua so wh̄iró dīa mió i alimó betó mole so wh̄itamo só deraai fo tokóló taletere be demó atimanétei dīa só deraalopó. Ti noatepae, atima Jonané yó mótu betale fo wosóló, kisipa tiki feteyalepó. Tépatei, Jonakélé t̄eteróló bosenée fale mo doasi sek̄e wh̄i bet̄a wóló i betere ape.

Keleta tiki fea d̄eró betere s̄a s̄upó yale fo

(Mat 5:15, 6:22-23)

³³ Mo wh̄i bet̄anékélé, *lamp* s̄a d̄eróló kinéli tikipaae ó nukuné husiróló mulótimpó. D̄eróló daalótua dere tikimótóro mulótua dapó. Mepaae so wh̄i be dolopaae wapa, ai demó bet̄erópóló, d̄eró bet̄erapó. ³⁴ Naao keleta, ti tiki turó d̄eró betere *lamp* s̄a s̄u ai ape. Naao kele tamo wusuró wisipa, ti naao tikikélé turó d̄erapó. Téretei, naao kele tamo wusuró dilikipa, ti naao tikikélé turó dilikirapó. ³⁵ Naao tiki tūamó dó tare d̄e diliki yaqsóro, mo hotowa yóló kaae tawae. ³⁶ Térapa, naao tiki turótamo d̄epa, ti tiki me kwiapaae sawa dilikikélé ini, tiki featóro d̄eyó furaalu, belapaaekélé sókó faalo ai ape,” yalepó.

Yesuné Farisi wh̄irapepaae wiyó yae yale fo

(Mat 23:1-36, Mak 12:38-40, Luk 20:45-47)

³⁷ Yesuné ai fo yóló kemetepa, Farisi wh̄i bet̄ané ̄atamo ̄la naairaalu ama bepaae dapesó fóló, ̄la nukuatere ni fake tómó tiróló bet̄erépó. ³⁸ Atéru, Yesu ̄la naairaalu, atimané mara mole ala sya furaalu, folosóro ama naase fokunitepa, kale Farisi wh̄i ̄a hokomó sókó fu sirayalepó.

³⁹ Atétepa Talené ɸpaae duraalu, “Aita motei, diɸ Farisi whɸiné ɸla nokole nukuró wutitamo haɸle tómó ere bólu maaté fukutua dapó. Téturaalu, diaaɸ tiki tuɸpaaeta, ti fea ɸla senée yóló ekeɸetere alaró ukusitere alatamoné ai ɸaane ape. ⁴⁰ Diɸ okokoi tuɸ mole whɸrape-ó, Kótóné diaaɸ tó tikimó ere ala fea taleturaalu, u tuɸpaaekélé tale dumipóló de? ⁴¹ Diaaɸ nuku tuɸmó mole ɸla sóró yolealere so whɸ tao sóró melae. Atétepa, ti diaaɸ tiki tuɸmó ere ala fea Kótóné kilitu, mo kokɸrapó fo yaalo ai ape.

⁴² Farisi whɸrape-ó, diɸné kutómó ere sawa ɸlakélé naase tamo supa, dekeyóló betaɸ Kótópaae haɸle móturaalutei, mo donotóró taletere alaró Kótópaae yaala sókó fole alatamo sisópaae erótu beterapó. Atére alamó doasi sekeɸi ala diɸ tuɸpaae waalopa, wiyó yae. Donoyóló taletere alaró Kótópaae yaala sókó fole alatamo touróló, Kótópaae haɸle matere alakélé uɸsóró mo wisi uɸpó.

⁴³ Farisi whɸrape-ó, diɸ fo wosetere bepaae furaalu, doasi doi mole whɸrape bitua dere tikimótóró betaai ekeɸle yóo, ɸla dotonatere tikimó daalukélé, so whɸiné doasi whɸ wisi-ó yóo, yóló dukiraterere kokɸmó ai ala dua dapó. Atétere alamó diɸpaae doasi sekeɸi ala waalopa wiyó yae.

⁴⁴ Farisi whɸrape-ó, diɸta u tuɸpaae whɸ dou epatei haɸle tiki aɸpa, ai tómó so whɸ fua wua du beterapó. Ti diɸta, douró betere whɸ kaae aɸrapa, wiyó yae,” yalepó.

⁴⁵ Tétépa, Moses-né asere fo yó matere kisipa fosóre whɸiné ɸpaae duraalu, “Yó matere whɸ-ó,

naao ai dere forapené dą mo ti só deratapó,” yalepó.

⁴⁶ Ti fo depa Yesuné duraalu, “Moses-né asęre fo yó matere whįrape-ó, diaaę so whįpaae i ala yae, i ala yaęse, du betere alata, doa sekeři ęla so whįné hųlumó belerótu dere kaae du beterapó. Ai sekeři ęla diaaę belerótu bitutei, atima fasóló tao sere alamo dumipó. Atęrapa, diępaae waaire sekeři alamó wiyó yae.

⁴⁷⁻⁴⁸ Take diaaę noutererapené dale Kótóné kęló whįrape dourale tiki be wisiyóló tęnútu beterapó. Mió atętu betere alané diaaę ayarapené whį dale ala wisirapóló, hąkeamó yó matapó. Atęteremó diępaae doasi sekeři ala eraalopa, wiyó yae. ⁴⁹ Atéró betale alamó Kótóné ama fosó fosóre kisipa sya furaalu, i fo erapó.

‘Yęlo kęló whįraperó *apospel* whįrapetamo atima beterepaae dotonaalotei, mepaae whį mo ti dóo, mepaae hęle susupuróo yaalopó,’ erapó.

⁵⁰ Atęrapa, mo take kaae sóró dilé wale kęló whįrapené samearó mió diaaę du betere whįrapené sameatamomó kwia turó mió i alimó betere so whį diaaę saalo ai ape. ⁵¹ Ita, mo dapó. Atęyaaire alata, Abel-mó kaae sóró dilé wóló, kale momatere bemó Kótópaae simó sukųlaa dalatere tikiró kae tukóló muló betere be ke tuęmó dale whį Sekaraiamó dęle yóló kwia feata, mió i alimó betó mole so whįné saalopó.

⁵² Moses-né asęre fo yó mótu betere whįrape-ó, Kótóné mo bete mole alapaae sókó faaire so whį faęsóró tu tukętere *ki* diaaę fasó salepó. Ti dięta,

ai tumó fumitei, atima faai du betere so whi diaaꝓ sesetu beterapó. Atétere alamó diꝓ doasi sekei ala saalopa, mo wiyó yae!” yalepó.

⁵³ Ai fo yóló kemetepa, Yesu ꝓ felemó, kale Farisi whiraperó Moses-né ere fo yó matere whirapetamoné ꝓ só deraairaalu, deteraai fo du betalepó. ⁵⁴ Aita hꝓle mei, ꝓ haꝓókó fuléro kelaai kae kae wosetere fo du betalepó.

12

Farisi whirape wisiyóló kaae tawae yóló yale fo (Mat 10:26-33)

¹ Atéro, so whi mo dekéro wale tikimó hae tiki faapa, folosóro Yesuné ama yó matere whirapepaae duraalu, “Farisi whirape tuamó bole yist diꝓpaae tekaꝓsóro hotowaró kaae tawae. Atimata tiki tuꝓpaae dopatei, tó tikimó hꝓle wisire nisi du beterapó,” yalepó. ² “Mió kilini hiró betere ala fea, take hꝓkearatepa so whi feané kolóló tuꝓ yaalopó. ³ Diaaꝓ diliki tuamó du betere fo demó depa wosóo, be dolomó dua kikiti dere fo be huluamó daalu fakeyóló depa so feané wosóo, yaalopó.

⁴ Norape-ó, diꝓpaae i dere fo wosae. Mepaae whirapené diaaꝓ tó tikita dóló sukunaalotei, take diꝓpaae me ala eraalomeipa, ai alapaae wiyaaꝓse. ⁵ Wiyaaai depata, ti naao mo tikikélé, kepe betekélé, doróló mo ti dó tare sipaae de-raaire fotokꝓ bole Kótó beterapa, ꝓpaae betꝓ mo doasi wiyae. ⁶ Sonaai *moni* ke tamoné aporó ba belekaꝓatiki dupunérapó. Atére barape betꝓkélé Kótóné kisipa keterótimpó. ⁷ Diꝓta, ai

ba belekaatikitamo suni, Kótóné ama hosaa mole doasi ɔla ai ape. Diaaɔ topo nikiKelé Kótóné ama sumó dosayólo kisipareteiné diɔ wiyaɔse.

⁸ Yaɔlo diɔpaae mo i dere ape. So whi feané kele tó mó mepaae whiné duraalu, Yesuta ɛ tɛteróló kaae tare Talepó depa, Whiné Naalemanékélé Kótóné *ensel*-rapené keletómó ɔ yaɔlo fo eratere whipó yaalopó. ⁹ Téyaalotei, whi me dené so whi feané keletómó ɔ Keriso fake meipó depa, ti Whiné Naalemanékélé, Kótóné *ensel*-rapené keletómó ai whi ɔ kisipanipó yaalopó. ¹⁰ Mepaae whi dené Whiné Naalema eróló foné só deratepa, ai dowi ala kwia kemeróló aluranérápó. Tépatéi, kale Dɛi Kepe Wisiné ditere kutó faleyóló só deratepa, ai kwia mo aluranénipó.

¹¹⁻¹² Bóe whirapené fo wosetere bepaae ó so whi tɛteróló kaae tare whirapepaae ó *Gavman*-né sóró beteró betere topo whi beterepaae fo tekai dapesó fupa, diɔ noa fo yaaloé yóló, whaalia yaɔse. Ti noatepae, atétere sukamó diaaɔ yaaitere fo fea Dɛi Kepe Wisiné yó melaalo ai ape,” yalepó.

Néli whiné hɔko ala yaletéi fo salepaae dó faróló yale fo

¹³ Tétepa so whi fea touró betere kuamó, whi betané Yesupaae duraalu, “Yó matere whi-ó, yaɔlo no daɔmoné ayané mómu ɔla ɔla bukóló, ɛmale melópólópa, naao yaɔlo nopaae yae,” yalepó.

¹⁴ Ti fo depa Yesuné duraalu, “Ti whi-ó, di-aamomó ɔla ɔla bukóló melópóló né ɛ sóró betéraleé?” yalepó. ¹⁵ Téró ama atimapaae duraalu, “Kae kae ɔla fea senée yóló au nokole

alané diꜥ doraꜥsóró, mo hotowaró kaae tawae. Ti noatepae, ɔla ɔla mo dekéro soro tare alané whi betero bitinipo,” yalepo.

¹⁶ Tero, ama atimapaae fo sale fo etero yalepo. “Beta neli whine ama diyale ke kutomo ɔla dekero salepo. ¹⁷ Ai ala kilitu, ama etei kisipa mualepo. ‘Ama kutomo yo mole ɔla mulaire tiki meipolo,’ a fomo du betaipo.

¹⁸ Tero ama duraalu, ‘Yalo ɔla ɔla mulaire teale be fisikolo mo doakale be teyolo yalo kutomo sere ɔlaro mepaae wisi wisi ɔlatamo mulaalopo.

¹⁹ Aterolo yalotei etei fo enerapo. E ɔla ɔla mo sumo moleteine mio me kutu dini doasi ba fomo sa nolo hale bitu, mole ɔlaro weitamoo maate haitamo nukule fu betaalopo,’ ere fo kisipa muni airapo.

²⁰ Tepatei Kotoné apaae duraalu, ‘Kisipa okokore whi-o, naoo betere bete mio dilikitamo yalo toko sirapa, naoo donorolo mulale ɔla ne saaloé?’ yalepo.

²¹ Whi me dené mepaae ɔla ɔla whi tao soro hale moturaalu, ita Kotopeaae matapolo kisipa muolo meni, atoro neli whi betaai dapolo fea ɔla ekeleyolo betapaae du betepa, ti i ere fo ai whipaaetoro eraalo ai ape,” yalepo.

Naaire ɔla o yayare ɔlamoo whaalaa yaqse yale fo

(Mat 6:25-34)

²² Tero, Yesune ama yo matere whirapepaae duraalu, “Yalo diapaae i dere ape. Diꜥ naaire ɔla meitepa, noa naaloé yolo whaalaa du betaqse. Nao tikimo kisipa mutu, kutikélé noa saaloé

yóló whaalía du betaqse. ²³ Nokole qlata, wisi qlatei whiné betere beteta, mo doasi qlapó. Kutikélé wisi qlatei, whiné tikita mo doasi qlapó. ²⁴ Barapené dere ala kolóló kisipa muae. Atimané naaire qla wae biliyóo, ɷlumé depa sóró bepaae mulatere alakélé yóo, dumipó. Tépatei, Kótóné atima kaae taru, betere dokq fea atimané naaire qla mótua dapó. Hepen bemó betere diaaq Ayané barape kolósu, diq kolósu depa, diq so whjpaee ama hosaa mo turó mulapó. ²⁵ Diqkó betq whiné ama betaaire alamó kisipa muóló whaalía duraaalu, q betaaire ba fo sumó fqloranére? ²⁶ Ai sawatamo ala diqané enénipa, ti mepaae doasi alarapemó noatepa whaalía du betere?

²⁷ Hqle yó mole nerape fuatere ala kolóló, kisipa muae. Ai ne fua kémi bisikóló kuti nomotumitei, ama ere au wisi kelaalo mo kokqrapó. Atére auné Solomon-né derótua yale kokqi kutiné au bosene falapó. ²⁸ Diq kisipa tiki sawa tiró betere so whjrape-ó, haemó hqle yó mole nerapeta mió maaté yóló dó simó biliraaire qlatei, Kótóné wisiyóló aurótua dapó. Ai nerapepaae erótu betere alakélé mo bosenóló, diaaq deraaire kuti Kótóné sumó melaalomeipóló de? ²⁹ Diqané naaire qla ó wéimó hosaa turó muóló noa naaloé yóló doasi whaalía du betaqse. ³⁰ Ti noatepae, hqle hqko betere so whj feané ai qla saai dapóló ketekq buóló wóputu beterapó. Ti diqané yqyqtere qla hepen bemó betere diaaq Ayané ama mo tuérápó. ³¹ Térapa, Kótóné tqeteróló kaae tare aqmó betaai dapóló, ketekq buóló kikitu betepa, ti yqyq du betere qla qla ama sumó melaalo ai ape.

³² Yálo *sipsip* hupu malerape-ó, diaaḡ Ayané ama tḡteróló kaae tare ala ḡ wisi kisipa muóló haḡtamo diámó haḡle melaalopa, whaalía yaḡse. ³³ Téraḡa, diaaḡ muó mole ḡla dotonóló *moni* sóró mepaae yolealere so whḡmó haḡle melae. Atétere alané haḡle muó tawóḡpóló, *moni* detere be wisi aletapó. Atéteḡa, ti wisi wisi ḡla hepen bemó haḡle muó taru, kemekélé yaalomeipó. Aimó ḡlémi nokole whḡkélé, hoséli ó ero sinékélé, turukóló doraalomeipó. ³⁴ Mé tikimó naao wisi wisi ḡla mupa, ti naao hosaakélé aimótóró mulapó,” yalepó.

Kutó mo wisiyóló kaae tawale fo
(Mat 24:42-51)

³⁵ “Diḡ kutó dine faairaalu kuti deróló bitu, sḡrapekélé duku beteróḡpóló, deḡróló mulae. ³⁶ Ti atétere alata, mepaae kutó diratere whḡrape atimané doasi whḡ betḡ so dokotere be deḡmó detere ḡla nale feletei fesaae wóḡpóló, kaae tatu dere kaaepó. Atéḡa, kale whḡ wouraalu be tḡ dupa, ḡ be dolopaae holóḡpóló, hapale atimané be tḡ tukḡyaalo ai ape. ³⁷ Atéró, atima tḡteróló kaae tare whḡ wouraalu kelerḡlemó, ama ḡla ḡla mo wisiyóló kaae tapa, ḡ heḡkeseturaalu atimapaee mo wisi ala eraalopó. Yálo diḡpaae mo i dere ape. Kale topo whḡ ḡ kuti wisi deróló, ama kutó diratere whḡrape wóḡpóló ḡpi fóló, ḡla nokole ni fake tómó kaae tawóló betaalopó. ³⁸ Kale doasi whḡ ḡ be diliki tuḡmó ó be teó deḡterepaae sókó wouraalu ama kutó diratere whḡrape kel-erḡlemó, fea ḡla ḡla sḡmó donoró betepa, ḡ heḡkeseturaalu atimapaee mo wisi alatóró eraalo

ai ape. ³⁹ Téplatei, i dere fo mo diriyóló wosóló tuę muae. Betaę be talené ama be fulukóló ęla ęla ęlémi saaire whę i sukakelemó waalopóló kisipa uęsóró ti ama be fulukóló ęla ęla sóró fępóló kaae tawuę meipó. ⁴⁰ Térapa, diękéle hotowaró donoróló betae. Ti noatepae, kale Whęiné Naalema waalomei nisyóló mokęleyaa yóló betere tuęmó waalo ai ape,” yalepó.

⁴¹ Tétepa Pitané duraalu, “Tale-ó, naao ai fo salepaae dó faróló dere fo-a, dępaae maaté dépe, so whę feapaaekélé de?” yalepó.

⁴² Ai fo depa Talene duraalu, “Betaę fosó fosóre kutó diratere whę ama doasiné dere fotóró wosóló eró tapa, mepaae kutó diratere so whę ępaae tęteróló kaae tawae enérápó. Tétu, tukóló muló betere sukamótóró atimané naaire ęla maté fępóló, ama naase tuęmó mulóló ę fulapó. ⁴³ Téró kale doasi whę ę momó fesaae wouraalu kel-eręlemó, ama diyae yóló fele kutó mo wisiyóló dipa kilitu, ai whępaae mo doa hękesené sinóló mo wisi ala eraalo ai ape. ⁴⁴ Yęlo diępaae mo i dere ape. Kale topo whęiné ama ęla ęla fea ai whępaae naao mo wisiyóló kaae tawae yóló ama naase tuęmó mulaalopó. ⁴⁵ Téplatei, kale kutó diratere whęiné ama etei kisipa munérápó. ‘Yęlo doasi ę foloti feletei hapale wómipó,’ dua dápó. Atéreteiné, ę bitu mepaae kutó diratere whęraperó sorapetamo fokosói ala yóló, du beteró ę ęlaró węitamo dekéró nóló topo doyóló keyaa faalopó. ⁴⁶ Atéru kale doasi whę waalopóló kisipani, mokęleyaa yóló betere tuęmó ę sókó wouraalu, kale whę diyóló turukópi sóró kisipa

tirénire so wh̄tamo touyóló beterópóló, h̄kó faraalopó.

⁴⁷ Ai wh̄iné ama doasiné mole ama kisipa tuę irutei, ą donoróló bitu doasiné dirae yale kutó diréniyalemó, fokosói ala yóló mo doasi susupuraalo ai ape. ⁴⁸ Téyaalotei, mepaae kutó diratere wh̄iné atima doasiné mole kisipa bete wisiyóló sinipa, ti ai wh̄ipaae kwia mótukélé sawa tétitóró melóo, dele alakélé dekéro ini, tétitóró dóo yaalopó. Nalo kale doasi wóló, ama doasi alarape t̄eteróló kaae tawae yale wh̄ipaae duraalu, ȳlo ȳpaae melóló fele kutórape fea maé yóló wosaalopó. Mepaae so wh̄iné me wh̄ipaae duraalu, ‘D̄ané ɔla ɔla kaae tawae,’ yóló h̄yóló mélipa, ti atima momó fesaae wou ama male s̄uróló maé yóló wosaalopó,” yalepó.

Fake tekeyóló, betaalopóló yale fo
(Mat 10:34-36)

⁴⁹ “Ěta i haepaae waleteita si sóró walepó. Ai si i haemó mo hapale dó holópóló, mo taketi noke ūpóló kisipa mutapó. ⁵⁰ Tépa, ę mo kae w̄ei tópuaaire ala bet̄a moletei kemeraai kaae taru, mo doasi sek̄ené sukutu betera póló. ⁵¹ Ě i haepaae waleteita, diaaɔ kisipané dī i haemó betó mole so wh̄tamo hosaa muni deyóló dua betaaire ala sóró walepóló de? Meipó. Ȳlo dīpaae mo i dere ape. Ěta, dī fake tekeyóló beterópóló, tekenale walepó. ⁵² Atérené mió i betere alimó kaae sóró, bet̄a bemó aporó so wh̄i betepa, atimasisitei bóe dóló tekeyóló, sore wh̄i kae betóo, tamo wh̄i kae betóo, yaalo ai ape. ⁵³ Atimasisi atéro fake tekeyóló kae bitu, alimané naaletamo

bóe dóo, naalené alimatamo bóe dóo, hamané senaaletamo bóe dóo, senaalené hamatamo bóe dóo, whiné hama hyama sotamo bóe dóo, hyama soné ama whi hama sotamo bóe dóo, yaalopó,” yalepó.

*Dere ala kilituraalu i ala yaalopóló kisi-
yaaire fo*

(Mat 16:2-3)

⁵⁴ Téró, Yesuné aimó touró betere so whi paae duraalu, “Suka doropolepaae sako hokolo depa kilitu, etei fo dua dapó. Mió hali waairaa ai dere ape deretei, motóro wua dapó. ⁵⁵ Besékélé *Saut* depaae wapa kilitu, mió mo dirii suka yaai dapó deretei motóro dua dapó. ⁵⁶ Diã tó tikiné wisire nisi du betere so whi rape-ó, i haemó dere alaró samó dere alatamo ti diaaq mo diriyóló kisi-parapó. Mió i alimó diã tuamó erótu betere ala diãné kilitu beterepa nalo waaire alimó yaaire ala bete diriyóló tué initere noatepa de?

⁵⁷ Diãné dere ala diaaqtei taleyóló, ita mo dono ala dapóló kisi-patere noatepa de? ⁵⁸ Whi mené yaatamo fo tokóló só deraai taletere whi beterepaae dapesó fupa, diaamosisi tumó furaalu donoratepa wisirapó. Ti noa yaqsóro meipó. Ama ya dapesó fóló, taletere whiné naase tuamó mulatepa, ai whinémo diki tare whi rapené topo whiné naase tuapaae mulatepa, ya *dipula* beteraqsóro dapó. ⁵⁹ Yalo yapaae mo i dere ape. Nao melópoló dale mulale *moni* fea melaleteti, kale sonaai *moni* ke mo ti kemeróló menitepa, ti ya sókó feni, hale bitiré faalo ai ape,” yalepó.

13

Kisipa fetenitepa aluyaalopóló yale fo

¹ Ai forape yóló kemeteretamo Pailat-né dale mepaae Kaleli wh̄rapené samea Kótópaae sukúlaa dalóló h̄le matere ɔlatamo touróló mótu beterapó fo mepaae wh̄rapené Yesupaae ene walepó. ² Ai fo depa Yesuné atimapaae duraalu, “Diaaɔ kisipané ai dale Kaleli wh̄rapeta, mepaae h̄le betó mole Kaleli so wh̄iné yale dowi ala bosenóló, atima mo doasi dowi ala ereteiné dalepóló kisipa mute? ³ Ténipa, ȳlo dīpaae i dere fo wosae. Diaaɔ dowi ala taaróló kisipa fetenitepa, ti dīkélé ai wh̄rape yale kaae yaalo ai ape. ⁴ Ai fo kaae, me i ape. Sailoam be huluaámó t̄ne f̄loi be kolokó dorowouraalu, mepaae 18 wh̄rape dalepó. Diaaɔ kisipané ai wh̄rapené yale dowi alané mepaae Jerusalem be huluaámó betó mole so wh̄iné dowi ala bosenée faleteiné erapóló kisipa mute? ⁵ Aténipa, ȳlo dīpaae i dere fo wosae. Dīkélé diaaɔ du betere dowi ala taaróló kisipa fetenitepa, ti atima yale kaae dīkélé fea dóló aluraalo ai ape,” yalepó.

⁶ Téró, ama atimapaae i fo sale yalepó. “Wh̄i bet̄ané ama képi du kutómó bet̄a nose biliyalet̄ei oloréro kēle felemó, du bet̄akélé olenipa ke-lalepó. ⁷ Atépa, ai kutó talené ama kutó kaae tare wh̄paae duraalu, ‘Ai nose du oloréro ba fo sore tuamó kēleta yalet̄ei, du mo bet̄akélé olere kilinipa, diyó mulae. Ti ai dowi w̄sa daale niné hae f̄e h̄le kemerópóló, noatepa kaae tawaaloé?’ yalepó.

⁸ Ai fo depa, kale whĭné ąpaae duraalu, ‘Doa whĭ-ó, ba fo betą tuąmó yąlo mepaae kęłaa i ęła ęła sóró ai ni betemó munaalopa, daalópoló taalae. ⁹ Waaire ba fo tuąmó kaae tarąlemó, olotepa ti wisirapó. Olenitepa ti diyó mullaalopó,’ ” yalepó.

Sąa naai dąle muló betere sukamó sisó fulukó tare so wisirale fo

¹⁰ Sąa nokole be dęmó Yesu ą fo wosaai tę mole berapekó betą bemó Talené ala etérópóló yó mótu betalepó. ¹¹ Tétu beteremó, aimó dowi kepené sisó fulukuró betepatei, ¹⁸ ba fo kemere so beterepó. Atéruraalu, ą donoyóló betere alakélé ini, mó heméetóró tarepó. ¹² Atępa Yesuné kolóló ąpaae ape yóló duraalu, “Ti so-ó, yą dokóló muló betere kisi bete mió ai kemeratere ape,” yalepó. ¹³ Atéró, kale soné tikimó naase mulaletamotóró, ama sisó fulukó taretei donone hotepa, Kótóné doi sóró holalepó.

¹⁴ Sąa nokole sukamótei Yesuné ai so wisiratere ala kilitu, ai fo wosetere be kaae tare topo whĭ ą fopaae butu, aimó betó mole so whĭpaae duraalu, “Kutó diyaaire be dęrapeta apo miró mulapó. Tęrapa, diaaę kisi bete wisirópoló depa ti Sąa nokole be dęmó węni, hąle be dęrapemó wua yae,” yalepó.

¹⁵ Ai fo depa, Talené ąpaae duraalu, “Dią tó tikiné hąle wisire nisi du betere whĭrape-ó, Sąa nokole sukamótei diaaę *bulmakau ó donki* hupurape duló betteretei węi nópóló dapesó fua dumié?

¹⁶ Atére kaae, Abraham-né deté yale i betere so dowi Satan-né kępiné dokóló muló betepa, ¹⁸ ba

fo haḷe kemeyalepó. Atépa ą fópóló, Sꞥa nokole be demótei, yaḷo teraayalepa ai ala dore?” yalepó.

¹⁷ Ama ai fo deremó, ątamo dei kisipa muóló só deraaire whjrape atimatei hale duraalu, wiyalepó. Téyaletei, so whj feané ama ai dere ala kilituraalu, kokꞥi ala dapóló doasi hekesené sukutu betalepó.

Mastard niró yist-tamopaae dó faróló yale fo sale

(Mat 13:31-33, Mak 4:30-32)

¹⁸ Téró Yesuné duraalu, “Kótóné teteróló kaae tare aꞥmó mole ala etérapóló noa alapaae dó faróló yaaloé? ¹⁹ Ti aita, i ala kaaené kelerapó. Betꞥ whjné *mastard* ni ke sawatamo só fóló, kutómó biliyalepó. Atéró kale ni holóló, doasi ami daapa, tetejímó sikimó kotere barape sirimó daaneta dua dapó,” yalepó.

²⁰ Atéró, ama kale yale kaae momó duraalu, “Kótóné teteróló kaae tare aꞥmó mole ala noatamo suróló enére? ²¹ Aita, i ala dere kaaepó. Betꞥ soné *flawa* o bula duraalu, *yist* mo sawatamo bulatereteiné doasi o bula alerótua dapó,” yalepó.

Betekꞥne sawa tꞥmó fae yale fo

(Mat 7:13-14,21-23)

²² Ai alarape yóló kemetepa, Jerusalem-paae fole tꞥmó tꞥ mole doasi be huluaró sawa be huluarapemó Yesu faai furaalu, Talené fo yó maté fu betalepó. ²³ Atéró, mepaae whjné Yesupaae duraalu, “Tale doasi-ó, betꞥ betꞥ so whj maaté aluyaꞥsóró tao saaloé?” yalepó.

24 Ai fo depa ama atimapaee duraalu, “Diꞑ mo sawa betekene tumó sókó faairaalu, ketekꞑ buóló fae. Yꞑlo diꞑpaae mo i dere ape. So whꞑ fea ai sawa tumó faai dapóló faalotei fenénipó. 25 Ai be talené ama be tꞑ kinó betepa diꞑ wóló belamó daalu tumó haluróló fo fakeyóló duraalu, ‘Tale doa whꞑ-ó, dꞑ holaai dapa tꞑ tukiyae,’ yaalopó. Ai fo depa ama diꞑpaae duraalu, ‘Diꞑ maae so whꞑrapee?’ yaalopó.

26 Tétepa, diaaꞑ i fo yaalopó. ‘Dꞑ fea betamó bitu, ɔlaró weıtamo nóo, yꞑ dꞑné tꞑrapemó daalu yó matere fo wosóo, du betale so whꞑpó,’ yaalopó.

27 Ai fo yaalotei, ama atimapaee i fo yaalopó. ‘Dowi ala yó tare so whꞑrape-ó, diꞑ maae wale so whꞑró ę kisipanipa, taae fae,’ yaalopó.

28 Atétepa, diaaꞑ Abraham, Aisak, Jekop, mepaae Kótóné whꞑrapekélé fea ama tꞑteróló kaae tare be tuꞑmó betó mupa kelaalopó. Téyaalotei, diꞑ ai be tuꞑpaae honi, belamó dele doasi sóró wole du bitu, diaaꞑ serekenétei diꞑ tukóló nuku betaalo ai ape. 29 Atétere be dꞑmótóro suka hotereró wale so whꞑkélé, suka doropoleró wale so whꞑkélé, u dꞑpaae wale so whꞑkélé, i dꞑpaae wale so whꞑkélé, mo fea Kótóné tꞑteróló kaae tare be tuꞑmó detere ɔla naairaalu, atima betaaire tiki séle séle sóró betaalopó. 30 Mió i alimó mepaae nalo wale so whꞑ folosene fóo, mepaae folosóro fole so whꞑrape nalone fóo yaalo ai ape. Yꞑlo i dere fota, haꞑsókó feni, mo yaalopó,” yalepó.

Yesuné Jerusalem so whꞑ hosaamó sirapóló yale

fo

(Mat 23:37-39)

³¹ Atéyale sukamótóro, mepaae Farisi whirape Yesu beterepaae wóló duraalu, “Herot-né yá daai du betepa, i be taaróló, metikipaae fae,” yalepó.

³² Ai fo depa, atimapaee duraalu, “Diá fóló, ai whi dóló nokole dowi haqpaee i fo yae. Mióró dótamota, ę mepaae kisi daae mole so whiró dowi kepe tepeyóló betere so whitamó wisiróló, sore be dené ti yálo diyaai yale kutó fea kemeróló dalemó sókó fatapó yae. ³³ Téyaalotei, mió ó dó ó duakélé, atimané ępaae me ala eratepa taaréni, hãle fó maaté yaalopó. Ti noatepae, Kótóné kóló whi kae tikimó sukutepa aqni, Jerusalem bemótóro sukutepa ti mo donorapó.

³⁴ Jerusalem, bemó betó molę so whirape-o, Kótóné ama fo eratere kóló whirape dóo, mepaae ama diá beterepaae dotęyale whirapekélé kapo duné siróló dóo, dua yalepó. Kale bané malerape ama baase aqpaee buósu dere kaae, diaaq naale senaale yálo atéro buó saalopóló dua yalemó, diané hórãlepó. ³⁵ Térãpa, mió diaaq be mo wópu maalo ai ape! Yálo diãpaae mo i dere ape. Ę diaaq kilini hãle bitiré fóló, Talené doimó wale whi-ó, Kótóné hamokoróló tao sere alané wisirópóló yae dere sukamó ti ę momó kelaalopó,” yalepó.

14

Yesu Farisi whiné bemó ęla naai betere fo

¹⁻² Téró, Sãa nokole sukamó Yesu ę Farisi whirapekó doi mole whiné bemó ęla naai fóló beterepó. Atépa, betã hó naase tópure whi

Yesu betere felekemó betepa, me alakó déró kelaai kaae tawóló betó molepó. ³ Atépa, Yesuné Farisi wh̄raperó Moses-né as̄ere fo kisi-pare wh̄rapetamopaae duraalu, “S̄aa nokole sukamótei wh̄j wisiratepa fo mulepé, meié?” yalepó. ⁴ Ai fo depa, atimané me fokélé tokó menipó. Atétepa, Yesuné kale wh̄j wisiyópóló tikimó tawóló, turukó hóróló f̄ópóló dot̄eyalepó. ⁵ Atéró, Yesuné atimapaae duraalu, “Dīakó wh̄j bet̄ané ama naale ó *bulmakau* hupu s̄aa nokole be demótei nóku dolopaae doropóló mupa, téti hapale tao saalo meié?” yalepó. ⁶ Ai fo depa, atimané apaae me fo tokó menipó.

⁷ Téró, atima ɔla naai wale so wh̄rape doasi doi mole wh̄j betere tikimó betaai dapóló fole ala kilitu, atimapaae etei fo sale yalepó. ⁸ “Wh̄j mené ama so dokoturaalu detere ɔla naai ape depa furaalu, doasi doi mole wh̄rape bitua dere ni fake wisimó betaai ekele yaq̄se. Ti noatepae, ya t̄eteró betere doasi doi mole wh̄rapepaae ape eretei, ya kisipani ai ape. ⁹ Atéró wóló betepa, diaamopaae ape yale wh̄jiné duraalu, ya betaai yale tikimó i seké beterópóló, ya hale tikimó betae depa, ya doasi hale saalopó. ¹⁰ Atéyaq̄sóró, yapaae ɔla naai ape depa furaalu, doasi doi mole wh̄rape betere ni fake aqmó h̄ko betae. Atépa, yapaae ɔla naalopa ape yale wh̄jiné kilituraalu, ‘No-ó, ya i wisi tikimó bit̄i holae yaalo ai ape.’ Atétepa, ya t̄amo bet̄amó ɔla nuku betere so wh̄jiné keletómó naao doi hale sóró horaalopó. ¹¹ Ti noatepae, mepaae wh̄j dené amatei a doi sóró horatepa, atétere wh̄j ti Kótóné haepaae só

deróo, whi me de amatei deróló dua betepa, ti Kótóné ą sóró horóló doasi doi mulóo, yaalo ai ape,” yalepó.

¹² Téro, Yesuné ąpaae ąla naai ape yale whi paee duraalu, “Naao suka tuąmó ó dikitamo ąla naairaalu, naao fulumu whi rape ó naao norape ó fake so whi rape ó yątamo felekemó betere néli so whi rape paee maaté ąla naai ape yóló dape saąse. Naaotamo ai ala depa, atimapaee erale ala kaae, yąpaakélé eraalo ai ape. ¹³ Téni, ai detere ąla naairaalu, haąe yolealere so whi ó tiki dore so whi ó hó dore so whi ó kele dilikire so whi fea ape yóló dape supa, ti Kótóné yą wisiróló hale horaalopó. ¹⁴ Ti atei kaae so whi rapené naao erale alamó yąpaee momó tokó menanénipó. Naao ai dere alamó saaire dupu wisita, take wisi ala yóló sukąle so whi rape kepaayóló wale sukamó senérápó,” yalepó.

So dokoteremó detere doasi ąlapaae dó faróló yale fo sale

(Mat 22:1-10)

¹⁵ Atéro, Yesuné ai dere fo wosóló, aimó ąla nuku betere whi rapekó betąné ąpaee duraalu, “Kótóné ąteróló kaae tare aąmó bitu, detere ąla naalopóló kisipa mutu betere so whi ąti ti Kótóné wisiró beterapa, doasi haąné sukutu beterápó,” yalepó.

¹⁶ Ai fo depa, Yesuné ąpaee tokó mótu duraalu, “Whi betąné ama doasi ąla deyaairaalu, taleyóló mulóló so whi feapaae naai ape yalepó. ¹⁷ Atéro kale whiné ąla deyaaire be de wapa, ąla naai ape yale so whi dapesene fópóló, ama kutó diratere

whi dotonalepó. Atétepa, a fóló atimapaee duraalu, 'Mió ɔla taleróló muló betepa faalopa ape,' yalepó.

18 Atéro deté kweyaleteti, atima fole hómó kutórapené bipi epa fenénipó dua yalepó. Folosóro whi betané duraalu, 'No-ó, yálo dóti dupuyóló diyaaire kutó kele faaireteiné, e yátamo faalomeipó,' yalepó.

19 Kale dere fo kaae whi menékélé duraalu, 'No-ó, eta yálo dóti dupuyale naasetamo *bulmakau* hupurapené dere ala kele faaireteiné yátamo fenénipó,' yalepó.

20 Whi menékélé kale dere fo kaaetóro yóló duraalu, 'No-ó, e so mo dótóro dokóló betereleiné yátamo fenénipó,' yalepó.

21 Atétepa, kale kutó diratere whi momó fesaae wóló, whirapené yale fo ama doasipaae yalepó. Tétepa, kale be tale a fopaae buóló ama kutó diratere whipaae duraalu, 'Ya mo hapale fóló ai doasi be huluaró sawatamo be huluatamopaae fole tumó yolealere so whikélé, tiki momaare so whikélé, kele dilikire so whikélé, hó naase dore so whikélé, fea wópóló dapesene fae,' yalepó.

22 Ti fo depa, ama yae yale alarape yóló kilipaae kale kutó diratere whiné duraalu, 'Doa whi-ó, naao epaae yae yale alarape fea yálo sumó yaleteti, mepaae whi beteraaire de hale ai mune fale ape,' yalepó.

23 Tétepa kale doasi whiné apaae duraalu, 'Ya doasi turapemó fóló, tu demó betó mole so whikélé fea dape siré kweyóló wapa, ti be kerape fea sunérapó. 24 Yálo yapaae i dere ape. Mepaae

wh̄i de ɔla naalopa ape yalemó wéni yale so wh̄irapeta, yaɔlo doasi detere ɔla mo sawakélé hoteyaalomeipó, ’ ” yalepó.

Filipaa ni beleyóló fenitepa Yesuné yó matere wh̄i betenénipó ere fo

(Mat 10:37-38)

²⁵ Téró, so wh̄i mo haɔle ɔla kaae Yesutamo fu betepatei, Yesu fetée wóló i fo yalepó. ²⁶ “Mepaae so wh̄i detamo ɛ beterepaae wouraalu, ti ama aya ó hae ó ama so, naale senaale ó ama noraperó nerapetamopaaekélé ó ama betere betekélé h̄óróló b́oe dinitépa, ti ɔ yaɔlo dere fo wosóló yó matere wh̄i betenénipó. ²⁷ Mepaae wh̄i dené ɔ oleraaire filipaa ni amatei beleyóló ɛ sya anitepa, ti atétere wh̄ikélé, yaɔlo yó matere wh̄i betenénipó.

²⁸ Diɔkó betɔ wh̄i ama kisipanétamo, doasi f̄loi be olekeyóló t̄yaairaalu, ama tare *moniné* s̄umó t̄néréro kisipanépi talenérápó. ²⁹⁻³⁰ Ti noatepae, be t̄yaai folosóro bete kaaturaalu, dirii eleké bilitapó. Téteretei, kale be kemerénipa kilitu, mepaae so wh̄iné d̄o nanóló doka doka duraalu, i sekéné mo folo t̄ale betei kemerénipóló d̄o nanaalopó,” yalepó.

³¹ Fo sale me i ape. Me hae kwia t̄terólo kaae tare topo wh̄iné me hae kwia t̄terólo kaae tare topo wh̄itamo b́oe d̄ele faairaalu, 10,000 diki tare wh̄iraperó me topo wh̄iné 20,000 diki tare wh̄irapetamo b́oe dupa, 20,000 diki tare wh̄irape dóló kemeraalopé neté yaalorópóló kale topo wh̄i ɔ kisipapi tekenérápó. ³² Atéro b́oe wh̄irape mo umó wou betepatei, ama kisipanétamo atimatei betɔpaae d̄lépa, ti b́oe dele ala taarópó. Míó

da bóa fiyóló dua betaalopó fo ene fae yaalopó. ³³ Atétere kaae, diáko whi me dené ama muó mole ɔla ɔla fea me ɔla meipóló taarénitepa, ti yało fo eratere whi betenénipó.

³⁴ “Kóta, mo feléi ɔla wisitei ama felé kemetepa, ti momó kae neyóló felé bulaaloé? ³⁵ Atéro felé initere kóta, ɔla betepaaekélé munéni, hałe tikipaae taae fatua dapó. Mepaae whi detamo woséli dapa, ti i dere fo wisiyóló wosópóló yae,” yalepó.

15

Aluyale sipsip hupupaae dó faróló yale fo (Mat 18:12-14)

¹ Téro, mepaae *takis moni* sere whiraperó so whiné dowi ala dere whirapépó du betere whirapetamo Yesuné dere fo wosaai ɔ beterepaae tourałe wóló betó molepó. ² Atépa, mepaae Farisi whiraperó Moses-né asere fo yó matere whirapetamoné Yesu kikití eratere fo yóló duraalu, “I whinéta dowi ala du betere whirapetei, touróló ɔla betámó nuku beteropó,” yalepó.

³ Ti fo depa, Yesuné atimapaae etei fo sale yalepó. ⁴ “Diáko whi betané 100 *sipsip* hupurapekó betá hupu alupa, 99 hupurape hałe tuɔ tikimó beteróló, alure hupu keketé kweyóló dape sumié? ⁵ Atéro, dape supa, ɔ hekesené sukóló bepaae dapesó wua dapó. ⁶ Atéro, bepaae só fóló, ama fulumu so whiró be whi so whitamopaae tourałe ape yóló duraalu, ‘Yało kale aluyale hupu kekitu beteró dape salepa, diákélé fea ɛ dere kaae hekesese yae,’ yaalopó. ⁷ Yało diappaee i dere ape.

Atétere kaae, betã dowi ala du betere whi kisipa tiki feteyóló Kótó beterepaae wapa, ti hepen bemó mo doasi hekesere dere alané i haemó dere hekesere tetéróló bosene falapó. Téretei, mepaae 99 so whiné duraalu, ða me dowi alakélé dumipa, kisipa tiki hãle neyóló feteyaaloé dere so whipaae hekesere doaló dumipó,” yalepó.

Aluyale moni kepaee dó faróló yale fo

⁸ Ai ala kaae me i ape. “So betãné *silpa kapané* aleyale naasetamo *moni* kekó betã alutepa, ama noa ala yaaloé? Kekãairaalu sã ðeyóló be tuãmó muó mole mome wisiyóló fuóló kekóló mupa sumié? ⁹ Atéro su, ama fulumu so whiró be whi so whitamopaae kale aluyale *moni* ke saleteiné ða hekesere yaalopa, ðiã fea betãpaae tourãle ape enérápó. ¹⁰ Yãlo ðiãpaae i dere ape. Ai ala dere kaae, mepaae whi de ama dowi ala taaróló, kisipa feteyóló Kótópaae wapa, ti ó hepen bemó betere *ensel*-rape mo doasi hekesené sinaalo ai ape,” yalepó.

Aluyale naalepaae dó faróló yale fo sale

¹¹ Atéro, Yesuné ama deté wou betere fo tómó me i fo yalepó. “Whi betãné naale tamo beterepó. ¹² Téru, me ðeķ naalené alimapaee duraalu, ‘Apa-ó, naao yãlo no ðãmomó melaai muló betere ɔla ɔla bukóló emaletamo ãlae,’ depa, alimané naalema tamo tuãmó bukuralepó.

¹³ Atéro kale ðeķ naale alimané melale ɔla ɔla fea sóró, mo saletó tikipaae felepó. Atéro bitu, mepaae kae kae ala hõko deté fu beteró, ama kale sóró fele ɔla ɔla fea kemeralepó. ¹⁴⁻¹⁵ Atéro

beteremó, ai hae kwiamó doasi wote ali wóló ą naaitere ąlakélé meitepa, ą fóló whı betapaae duraalu, ‘Naa me kutókó mupa yąlo diraalo pó yóló wosalepó.’ Ti fo depa, kale whıné ama hupurape kaae tawaaire kutó betą mulapa dirane fae yóló dotęyalepó. ¹⁶ Atéro fóló, kale hupurape kaae tapa mené ąmó nokole ąlakélé menipó. Tétepa, ą wotemó kale hupurape matere besąae bolo naai kisipa mutu betalepó.

¹⁷ Atétu ama take muale kisipa feteyóló, momó wisi kisipa muóló duraalu, ‘Yąlo ayané ama kutó diratere whırapeta, ąla dekéro mupa nuku betereitei, ę imó wotené sukutapó. ¹⁸ Tétereteiné, mió ę momó yąlo aya beterepaae fesaae fóló i fo yaalopó. Apa-ó, ó hepen-mó betere Kótópaaekélé, yąpaaekélé yąlo wisi ala eréni, mo doasi dowi ala eralepó. ¹⁹ Atéyaletéiné, mió ę naao naale aąréni, kutó diratere whırape kaae beterae,’ yaairaalu faai kisipa mualepó.

²⁰ Atéro tuę teketu beteró, kale naale ą betere tiki taaróló, alima beterepaae momó fesaae felepó. Atéro kale naale mo umó wou betepa alimané kolóló, ama hosaamó suraalu, ą mo hapale sururu yóló fóló, apuó taru kóló tukó nalepó.

²¹ Atétepa kale naalené alimapaae duraalu, ‘Aya-ó, naao kele tómókélé, hepen bemó betere Aya Kótóné kele tómókélé, mo doasi dowi ala yalepó. Téyalepa, mió ę naao naale aąraąse,’ yalepó.

²² Téyaletéi, kale naale alimané ama kutó diratere whırapepaae duraalu, ‘Dią mo hapale

fóló, amó deraaire kuti wisi sóo, naasemó bu-laaire bi sóo, hómó horaaire hõleke be sóo, yóló derae,' yalepó. ²³ Atéró, ama kutó diratere wh̄irapepaae duraalu, 'D̄ané ̄ h̄ekeseróló ̄la deraalopa, bet̄a seraai *bulmakau* hupu male sene fae. ²⁴ Ti noatepae, ȳalo i naaleta suk̄aletei momó kepaayóló biture kaae erapó. Mo ti aluyale wh̄itei momó dape sóró biture kaae epa, mió d̄ané amó ̄la deróló h̄ekese yaairaalu i dere ape,' yalepó.

²⁵ Até du betepa, kale wh̄iné topo naale kutómó daai be bela felekemó sókó walemó, *kitatamo* wole fo yóló, k̄ilitu betere fo wosalepó. ²⁶ Até du betepa, ama kutó diratere wh̄irapekó bet̄apaae ape yóló duraalu, 'Doa ai-a, noa alamaaté du bitu de?' yalepó. ²⁷ Ti fo depa ama ̄paae duraalu, 'Naao nō me alakélé ini, mo wisiyóló sókó waletiné, ayanaaoné seraai *bulmakau* hupu male dóló ̄la i derótu betere ape,' yalepó.

²⁸ Ai du betere ala kilitu, kale topo naalené alimatamo doasi fopaae buóló, bepaae hotere h̄oyóló belamó dalepó. Atépa, alima doropóló naalema be dolopaae holóppóló, bératere fo yalepó. ²⁹ Téyaleteti, ama alimapaae duraalu, 'Kelere! Ba fo dok̄o fea ̄ naao wae sóró kutó diratere wh̄i kaae bitu, h̄ókélé ini naao erae dere ala ȳalo eró tawalepó. Téyaleteti, ȳalo fulumu wh̄irapetamo dóló n̄ppóló, naao *meme* hupu male bet̄akókélé menipó. ³⁰ Até yaleteti, naao ai naale h̄oko n̄pumó kutu beteró naao melale wisi wisi ̄la fea aluróló wapatei, naao amó seraai *bulmakau* hupu male dóló ̄la ai deratere ape,' yalepó.

³¹ Ai fo depa alimané duraalu, ‘Ti naale-ó yaṭa, suka fea ɛtamo betereteiné yaḷo mole ɔla ɔla feata, ti naaotóro ai ape. ³² Téreteiné da fea heḷese duraalu, ɔmó ɔla deralepa, ya depe sekeṇi heḷese yae. Ti noatepae, naao no ɔ mo ti sukale whi momó kepaayóló wóló biture kaae epa ɔla deratere ala taaréni, mo enérapó. Aṭa, aluyale whitei, momó sókó wapa dape sóro i betere ape,’ yalepó.

16

ɔla ɔla teṭeróló kaae tawae yale fo sale

¹ Téró, Yesuné ama yó matere whirapepaae i fo yalepó. ‘Whi mené betɔ néli whipaae duraalu, naao ɔla ɔla kaae tare whiné wisiyóló kaae tani, hoḷo besekérotu beterapó depa wosalepó. ² Atei fo depa, ama sóro beterale whipaae ape yóló ɔpaae woseturaalu, ‘Naao du betere ala mené ɛpaae ene walepa, naao yaḷo ɔla ɔla netéro kaae tare? Mió naao ditu betere kutó kemeraai dapa, naao teṭeróló kaae taru deté wale ala fea ɛpaae yae,’ yalepó.

³ Ai fo depa kale whiné ama kisipanétei duraalu, ‘Yaḷo doasiné ɛ melale kutó kemeratepa, mió ɛ noa kutókó diyaaloé? Hae dukiyaaire fotokokélé buni yóo, me whipaae ɔla kema dere alakélé, hale yóo ereteiné, ɛ noa ala yaalorópó. ⁴ Tépatei, ɛ i kutó taaróló fupa, mepaae so whiné ɛ mo wisiyóló dape sópóló, i ala betɔ yaai kisipa mutapó,’ yalepó.

⁵⁻⁶ Atétepa, kale whiné ama doasiné ɔla ɔla kwia mulóló sale whirape betɔ betɔ ape depa,

walepó. Atéró kale folosóró kwia mulóló sale whĩpaae woseturaalu, ‘Yálo doasiné ọla naao meteró saleé? depa, ama duraalu, ẹ́ḗ 4,000 *lita olip wel* wẹ́i salepó,’ depa, kale whĩpaae duraalu, ‘Yá hapale fóló sawa beteró, naao sale 4,000 *lita wel* wẹ́i ẹ́ḗ helekóló, 2,000 *lita aseya*,’ yalepó.

⁷ Téró, kale dere kaae me whĩpaae woseturaalu, ‘Naao yálo doasiné ọla meteró saleé?’ depa, kale whĩné duraalu, ‘*Whiti* yorape 1,000 salepó,’ yalepó. Ti fo depa, kale whĩné ọ́paae duraalu, ‘Naao melaai sale kwia asẹ́retei helekóló 800 *aseya*,’ yalepó.

⁸ Atéró, kale ọ́la ọ́la talené ama sóró beterele whĩ wisipa meitei ọ́ dukiróló duraalu, ‘I whĩta ọ́lémi nuku bitutei, topo daalu fosó fosói ala maaté du beterepó. Ti i haemó betere so whĩ atimasisi u tao su i tao su dere ala mepaae so whĩné kilitu, mo fosó fosóre so whĩpóló duki-ratere alané, kale ẹ́ tuámó betó mole so whĩ tẹ́teróló ketei aqratapó,’ yalepó. ⁹ Yálo dią́paae i dere ape. I haemó bituraalu, naao sere *moni* mepaae yą́yą́re so whĩ tao sóró hẹ́le melae. Atéró fea melóló kemeratepa, atimané yą́ mo ti tẹ́ tare bepaae holae yóló dape saalo ai ape.

¹⁰ Mepaae whĩ dené sawa kutó mo wisiyóló kaae taru dirótu betepa, so whĩné kilitu i sekéné kutó mo dono ditapóló kisipa tiratere whĩnéta ti doasi kutókélémo wisiyóló diranérapó. Mepaae so whĩ denétamo sawa ọ́la mekó ọ́lémi supa, ti doasi ọ́lakélé ọ́lémi senérapó. ¹¹ Atétepa, i haemó muó mole ọ́la ọ́la diaaq wisiyóló kaae tawaaire sụnipa, mo ti muó tare wisi wisi ọ́la dią́paae kaae

tawae yóló né melaaloé? ¹² Me whjné diãpaae kaae tawae dere òla òlatamo diaaò mo wisiyóló kaae tanitepa, naao mo ti muó tawaaire òla yaámó né melaaloé?

¹³ Betã kutó diratere whjnétei, doasi topo whj tamoné kutó diranénipó. Atétepa, ti me whjpaae yaala sókó fóló mulu, ama kutó diróo, me whj hòróló ama erae dere alakélé eréni yóo, yaalopó. Ai ala dere kaae, betã whjnétei Kótóné kutóró mepaae *moni* saaitere kutótamo touróló diranénipó,” yalepó. ¹⁴ Ai fo depa, mepaae *monimó* hosaa muóló ekèlere Farisi whjrapené Yesuné ai dere fo woseturaalu, faleyóló doka doka du betalepó. ¹⁵ Ti fo depa, ama atimapaae duraalu, “Diãné ai du betere ala so whjné kilitu, mo wisirapó du betepatei, diaaò hosaa tuámó kinóló mole ala ti Kótóné kolóló mo kisiparapó,” yalepó. Atétepa, ama atimapaae duraalu, “Mo so whjnéta, diãné mo doasi bete mole ala dapó du betepatei, Kótóné keletómó ti bete muni, mo sonaalérapó.

¹⁶ Kale Moses-né asere foró Kótóné kóló whjrapetamoné yó maté waleteti, Jon betale alimókélé taaréni, hàle yó matétóro fu beterepó. Atétu betepa, Kótóné tètéróló kaae tare aqmó mole kisi fo wisi wosaai dapóló hajné sukuturaalu, so whj fea aipaae alaletamo fu beterepó. ¹⁷ Ti sãró haetamota kemeyaalotei, Kótóné fo kwia mo sawakélé aluyaalomeipó.

¹⁸ Whj me dené ama topo so tokó daaróló so me kae dokotepa, ti Kótóné fo tukóló nópu nukulapó. Whj me dené me whjné tokó daalale

so dokotepa, ti aikélé yóló muló betere fo tukóló nópu nukulapó,” yalepó.

Néli whjró Lasarus-tamoné yale ala

¹⁹ “Téró suka fea kelaalo mo kokçi sonaai kuti maaté derótua yóo, mo feléi wisi ɔla maaté nóo du betere néli whj beterepó. ²⁰ Ai néli whjné ama be tɔ sókó walemó yoleale whj humu fulu daayóló bitu, suka fea ɔla kematu betere whjné doi Lasarus beterepó. ²¹ Atéró bitu, ɔ wote depa kale néli whj ni fake tómó ɔla nukuraalu, folope sorokóta deretei naai kisipa mutu betepa haɔrapené ama humu ɔe nukua depakélé, dowɔae fóló beterepó.

²² Ai ala du betere tuámó kale whj Lasarus sukutepa, *ensel*-rapené ɔ beleyóló fóló, Abraham betere uté tɔró beteralépó. Atéró ɔ sukɔle kijipaae kale néli whjkélé sukutepa douralépó. ²³ Téró, kale néli whj mo ti dó tare simó duku bituraalu kese falalemó, kale Lasarus Abraham-tamo daapa kelalépó. ²⁴ ɔ atépa kolóló duraalu, ‘Aya Abraham-ó, naao ɔ kɔle depata, ti kale Lasarus-né naase doymó wɛi fɛ eróló yalo hape siri bulɔle wópóló dotɛyae. Ti noatepae, ɔ siné dukuraalu doasi dele sereteiné dapó,’ yalepó.

²⁵ Ai fo depa Abraham-né duraalu, ‘Ti naale-ó, aita mo deretei, naao kisipa muae. Take yɔ haemó betale sukamó wisi wisi ɔlamaaté su betalépó. Até du betepa, Lasarus ɔ dowi ɔla sua yaletéi, mió ɔ imó hosaa muni deyóló hɛkesené sinitu betepa, yɔ doasi dele ai su betere ape. ²⁶ Térétei, dɔ imó betere whj aipaae wóo, atéró

betere whi ipaae wóo yaqsóro, tuámó doasi fao muló betereiteiné dā aipaae tē wonénipó,’ yalepó.

²⁷ Ai fo depa, kale whiné Abraham-paae duraalu, ‘Aya Abraham-ó, Lasarus yālo ayané bepaae fóló norapepaae ene fǒpóló yae. ²⁸ Ti noatepae, yālo norape aporó beterapa, ę doasi dele su betere tikipaae atimakélé waqsóro, ene fǒpóló dapó,’ yalepó.

²⁹ Ti fo depa Abraham-né duraalu, ‘Moses-ró Kótóné kǒló whirapetamoné yó mótu betere fo wosóló, atima kisipa feteyóló tuę tiki tiratepa, ti té yǒpólópó,’ yalepó.

³⁰ Ai fo depa, kale whiné Abraham-paae duraalu, ‘Aita mo deretei, sukāle so whi fólótamo depa, ti atimané du betere dowi ala taaróló, kisipa feteyóló waalopó,’ yalepó.

³¹ Ti fo depa ama duraalu, ‘Moses-ró Kótóné kǒló whirapetamoné yó mótu betere fo wosenitepa ti sinóló kepaayóló wale whiné dere fokélé wosóló kisipa tiki tiraalomeipó,’ ” yalepó.

17

Dowi alamó dée nalatere whi sekęi ala erǒpóló yae yale fo

(Mat 18:6-7,21-22, Mak 9:42)

¹ Téró, Yesuné ama yó matere whirapepaae duraalu, “So whi fea dowi ala yóló dée nǒpóló kae kae sųsere alarape waalo ai ape. Té yaalotei, whi me dené me whi dowi ala yǒpóló dée nalatepa, ti atétere whipaae doasi sekęi ala eraalopó. ² Diákó mé whiné i betó mole naale senaale belekātikikó

dowi alamó dée nalatepa, ti atétere whjné depamó képi dulóló, doasi kapo fake oleróló wej kęlapaae taae deróluqsóró mo wisi uapó.

³ Atérapa, diaaę dere alarape diąnétei mo hotowa yóló kaae tawae. Naao notamo mepaae dowi ala depa, ti atékesé yóló ą foné sae. Ténalemótamo, naao dere fo wosóló ą kisipa feteyóló wapa, ti ama yale ala me ęla meipóló hęle kemerae. ⁴ Betą be demótei, naao noné wejkeró félimó yąpaae dowi ala eralepóló, yą beterepaae fesaae wóló, ‘No-ó, yąlo yąpaae wejkeró félimó dowi ala eraleteiné doasi kęleó ene wapa,’ ti naaomo kwia tani, me ęla meipóló hęle kemerae,” yalepó.

⁵ Téró, Kótóné ama fo eręle fępóló doteyęle whjrapené duraalu, “Tale-ó, dąné kisipa tiki doaló tiró bitinireteiné mo diriyóló tiraai dapa, naao dą yó ęlae!” yalepó.

⁶ Ti fo depa Yesuné atimapaae duraalu, “Dią kisipa tiki tiró betere alatamó mo sawa *mastard* niné ke kaae bupa, ti i daale *malberi* nipaae naao feleke turó tokóló, doasi wej kęla tuąmó daane derepae depa, naao dere fo wosóló mo téyaalo ai ape.

⁷ Diąkó betą whjné ama kutó diratere whj ęla wae biliyaai hae dukjyóló mulale fóló, ó *sipsip* hupu kaae tane fi teó waletamotei kale doasiné ama kutó diratere whjpaee, ‘Yą ęla naasepóló hapale ape,’ fo dua de? Meipó. ⁸ Doasi whjné atei fo yaalomeitei, etei fota ti enérápó. ‘Yąlo naaire ęlaró wejtamopi donoróló, ę nuku betepa ti naao naaire ęla donoraasepólópó dua dapó.’ ⁹ Kale

kutó diratere whjné ama doasiné ɔpaae dirae dere kutó fea diyóló kemeratepa, ama doasiné ɔpaae mo kée fo dua de? Meipó. ¹⁰ Atétere kaae, Kótóné diɔpaae dirae dere kutó diyóló kemetepa, diaaɔtei diɔ bopé fake enére? ‘Dɔta, whj wisi meitei, ɔɔné ditere kutóró diyalepó fo enérápó,’ ” yalepó.

Naase tamo whjrape dowi humu fuluné tiki dopa wisirale fo

¹¹ Ai fo yóló kɔlipaae Yesu ɔ Jerusalem be hulupaɔae sókó faairaalu, Samariaró Kaleli haetamo ɔɔle tuɔmó fu betalepó. ¹² Atéro ɔ betɔ be huluumó sókó felemó, dowi humu fuluné tiki dore naase tamo whjrape ɔtamo hokolaa yaai wóló, mo tumó daae molepó. ¹³ Atéro daalu fo fake yóló duraalu, “Doa whj Yesu-ó, naao ɔɔ kɔlené sukutu tao sae!” yalepó.

¹⁴ Ai fo depa, Yesuné atima kelalemó kɔlené sukutepa duraalu, “Diɔ fóló, so whjmó momaratere whjrapeɔpaae diaaɔ tiki yó melale fae,” yalepó. Atétepa, atimané tiki yó melaai tɔ tuɔmó fu betepatei, atimané dowi humu fulu torokó fóló wisiyalepó.

¹⁵ Atétepa, atimakó betɔ whjné ama tiki fopeyalemó wisipa kilituraalu, momó fesaae fóló fo fakeyóló Kótóné doi sóró horaté fu betalepó. ¹⁶ Até deté wóló, Yesu daale felekemó deraapisa fóló mulu, mo kée du betalepó. ɔta, Samaria hae kwiamó wale whjkópó.

¹⁷⁻¹⁸ Tétépa, Yesuné atimapaɔae woseturaalu, “Mepaae naase tamo whjrape yɔlo wisirénié?”

Ita, kae fake wh̄itei Kótóné doi hale sóró hor-atapa, Naase aporó kemeyóló douró wh̄irape-a, neȳaleé?” yalepó. ¹⁹ Téro ama ʔpaae duraalu, “Naao kisipa tiki tiró betale alané ȳa wisiralepa, turukó holóló mo dua fae,” yalepó.

Kótóné t̄eteróló kaae tare ala wóló mulapóló yale fo

(Mat 24:23-28,37-41)

²⁰ Atéro, me sukamó Farisi wh̄irapené Yesupaae duraalu, “Kótóné t̄eteróló kaae tare ala noa be d̄emó wapa so wh̄i feané kelaaloé?” yalepó. Ti fo depa Yesuné atimapaae duraalu, “Kótóné t̄eteróló kaae tare alata, wh̄iné kelené kolóló tūȳ yópóló me fareyópu kae yaalo meipó. ²¹ So wh̄i feané imó ó umó wóló beterapó fo enénipó. Ti noatepae, Kótóné t̄eteróló kaae tare alata, mió dīa tūamó i wóló mole ape,” yalepó.

²² Téro, ama yó matere wh̄irapepaae duraalu, “Take waaire be d̄erapekó bet̄a tūamó kale Wh̄iné Naalema kelenée du betaalotei mo kelaalo meipó.

²³ Atéro kekitu betepa, mepaae so wh̄iné duraalu, ‘Kale Wh̄iné Naalema umó wóló beterapó,’ ó ‘Imó wóló beterapó,’ depa, mo dere nisiyóló sya faq̄se.

²⁴ Ti noatepae, kale Wh̄iné Naalema ʔ wouta, epée duraalu hae kwia fea d̄eyó fu dere kaae yaalo ai ape. ²⁵ Ai alarape fea yaaipatei, folosóro ʔpi kae kae susupui ala supa, ti mió i alimó betó mole so wh̄iné ama fo woseni, ʔ h̄oraalo ai ape.

²⁶ Take Noa betale alimó yale kaae, mió Wh̄iné Naalema waaire alimókélé atétóro yaalo ai ape. ²⁷ Take Noa betale alimó, so wh̄i fea

qlaró wẹitamo nokole alakélé, so whı̄tamo betere-
 atere alakélé, whı̄ so dokotere alakélé, deté fu
 betepatei, Noasépi nuku tuɔpaae bitı̄ horalepó.
 Até deretamotóró, atima ai du betale ala kemene
 felepó. Atéturaalu, doasi wẹi dukulé horóló so
 whı̄ fea sisiraae felepó.

²⁸ Ai yale kaae, take Lot betale alimókélé,
 so whı̄ fea wisiyóló bitu qlaró wẹitamo nokole
 alakélé, ɔla ɔla dotonóló duputere alakélé, ɔla
 wae bilitere alakélé, be tẹtere alakélé, fea deté fu
 bitipakalepó. ²⁹ Atétu betepatei, Lot ɔ Sodom be
 hulua taaróló foletamotóró hepen bemó siró kapo
 whaa kaae ere *sulpa* sitamo hali kaae dorowóló,
 so whı̄ fea doralepó.

³⁰ Atétu yale kaae, kale Whı̄né Naalema mió
 kinóló betereitei hɔkeamó wapa, so whı̄ feané
 kelaalo ai ape. ³¹ Atétere sukamó, whı̄ me ama
 siki bemó biti hae bemó mole ɔla wisi saai dapóló
 derepaɔse. Kutómó daale whı̄ momó fesaae fóló,
 bemó mupa wale ɔla momókó sene faɔse. ³² Ti
 noatepae, Lot-né soma yale ala kisipa muae.
³³ Mepaae whı̄ de yało ala erótutei, ama betere
 bete me ala yaɔsórópóló, amatei hotowayóló kaae
 tapa, ti atétere whı̄né betere bete aluyaalopó.
 Tépatei, whı̄ me dené ama betere bete me ɔla
 meipóló taalatepa, ti ama betere bete aluni, mo
 ti muó tawaalopó. ³⁴ Yało diɔpaae i dere ape.
 Dilikitamo whı̄ tamo betɔ besekemó fı̄patei, me
 whı̄ dapesó furaalu, me whı̄ fı̄pa taaróló faalopó.
³⁵ So tamo *flawa* o bula yaai derɔketu betepa, me
 so dapesó furaalu, me so taaróló faalo ai ape,”
 yalepó. ³⁶ (-)

³⁷ Tétepa, kale yó matere wh̄rapené Yesupaae woseturaalu, “Tale-ó, ai alarape-a momó eratepa kelaaloé?” depa, ama duraalu, “Na ó hupu k̄laai nokole barape sikimó s̄e kw̄yóló bopétu betepa, ti ama naaire ɔla k̄laai mupa ai dere ape yóló kisipa yaalopó,” yalepó.

18

Tao sae yóló dotopo du betale wulia sopaae dó faróló yale fo

¹ Ai fo yóló kemetepa, Yesuné ama yó matere wh̄rapené Talepaae momatere ala h̄le yó tanópoló, etei fo sale yalepó. ² “Ai doasi be huluamó fo tokóló taletere wh̄i bet̄a beterepó. Ai wh̄ita, Kótó kolóló witere alakélé ini, dotorōe falepó. ³ Ai be huluamó bet̄a wulia so beterepó. Ai so ama bóe wh̄iné ɔtamo fo tokóló só deraqsóro ɔ tao s̄póló, suka fea fo taletere wh̄i beterepaae eneta du betalepó.

⁴⁻⁵ Kale soné bet̄a fo maaté eneta du betepa, ɔ h̄turaalu i fo yalepó. ‘Ēta, Kótókélé mo so wh̄ikélé, kolóló wi inire wh̄itei, i wulia soné ɔ tao sae yóló dotopoi fo maaté eneta yó taneteiné ɔ h̄tepa ɔ tao saalopó,’ ” yalepó.

⁶ Téró Talené duraalu, “Kale fo tokóló taletere dowi wh̄iné i sopaae yale fo wosóló kisipa muae. ⁷ Kótóné ama sorokó su yóló beteró betere so wh̄iné d̄tamokélé, dikitamokélé, kematóro yó tapa, ai kematere ɔla ama melaalomeié? ⁸ Ȳlo dīpaae i dere ape. Kale fo tokóló só deraaire wh̄iné dī só deraqsóro, ama mo hapale tao saalo ai ape. Téyaalotei, kale Wh̄iné Naalema i haepaae

wale sukamó so wh̄i fea kisipa tiki tiró betepa kelaalorópó,” yalepó.

Farisi wh̄iró takis moni siré kotere wh̄itamóné yale ala

⁹ Yesuné i fo sale atimapaee yó mótu duraalu, mepaae wh̄i atimata mo donoi ala dapóló bopé faketuraalu, mepaae so wh̄i t̄eteratere alamó Yesuné etei fo sale yalepó. ¹⁰ “*Taks moni sere wh̄iró Farisi wh̄itamo moma yaairaalu, momatere be dolopaae holalepó.* ¹¹ Téró, kale Farisi wh̄i ą turukó holóló daalu amatei, ąmó etei kaae moma yalepó. ‘Tale Kótó-ó, ęta mepaae wh̄irape dere kaae ęla ęlémi nokole alakélé, nópu nokole alakélé, mepaae dere dowi alakélé, ó i daale *takis moni sere wh̄i kaae bitinipó.* Téro yąlo yąpaae mo kée dapó. ¹² Ęta, betą fulamótei be dę tamomó ęla néni, weyóló hąle bitu, yąlo ęla ęla naase tamo moletei dekeyóló, betą Talepaae mótua dapó,’ yalepó.

¹³ Téyaleteti, kale *takis moni sere wh̄i ą mo tumó daalu, hepen bepaae kese horéni haepaae hemée deyóló daalu, ‘Tale Kótó-ó, ęta dowi ala dere wh̄ipa naao kęlené sukutu, yąlo dowi ala kwia kemerae,’ yalepó.*

¹⁴ Yąlo diąpaae i dere ape. Kale nalo momay-ale *takis moni sere wh̄iné ama dowi ala Talené kemeratepa, ą hąitamo bepaae feletei, me wh̄iné ama dowi ala hąle mupatei felepó.* Mepaae wh̄i de amatei ą deróló dua betepa, ti Kótóné ą sóró horaalo ai ape,” yalepó.

*Naale belekqatiki Yesupaae dapesó wale fo
(Mat 19:13-15, Mak 10:13-16)*

¹⁵ Téró so wh̄i feané teó sóró betó mole naale senaale tikimó Yesuné naase mulópoló, ą beterepaae dapesó wua dere ala kilitu, ama yó matere wh̄irapené dapesó wakesé yóló, atima foné salepó. ¹⁶ Téyaleteti, Yesuné kale naale senaale ą beterepaae dapesó ape yóló duraalu, “Atei kaae naale belekqatiki ę beterepaae wópólópa, sesékese. Ti noatepae, Kótóné t̄eteróló kaae tare aqmó betaaire alata, atei naale senaale belekqatiki kaae fóló betenérápó. ¹⁷ Ȳalo diąpaae mo i dere ape. Mepaae so wh̄i detamo i betó mole naale senaale belekqatiki kaae betepa, ti Kótóné t̄eteróló kaae tare aqmó sókó fóló betenérápó,” yalepó.

*Néli wh̄iné Yesupaae wosale fo
(Mat 19:16-30, Mak 10:17-31)*

¹⁸ Atéró, betą Juda topo wh̄i wóló Yesupaae woseturaalu, “Yó matere wh̄i wisi-ó, mo ti betere bete saairaalu, ȳalo noa alakó yaaloé?” yalepó.

¹⁹ Ai fo depa, Yesuné ąpaae tokó mótu duraalu, “Betą wh̄ikélé wh̄i wisi bitini, Kótó ą betą wisirapa, naao ępaae noatepa wh̄i wisi-ó fo de? ²⁰ Ti noatepae, kale tukóló muló betere fota, naao dosąayóló ai kisipare ape. So nópu naqse, wh̄i daqse, qlémi naqse, me wh̄i dilikóló kapala fo yaqse, naao hae aya aqmó mo dua betae erápó,” yalepó.

²¹ Ai fo depa, kale wh̄iné tokó mótu duraalu, “Ai alarape feata take ę ketemó bitu deté waleteti, miókélé h̄ale yótóro tarápó,” yalepó.

22 Ai fo depa, Yesuné ɔpaae duraalu, “Mo beta ɔla beta ɔa ɔa ɔa ɔa ɔa. Térapa, naao muó mole ɔla ɔla fea dotonóló, *moni* sóró mepaae yolealere so whimó melae. Atéro ɔta, hepen-mó mole wisi wisi ɔla saasepóló ɛ sya ape,” yalepó.

23 Kale hamoko whiné ai fo woseturaalu, ɔ doasi néli whi mo beterapóló kisipa mutu, kutiri humula yóló fomotamo felepó.

24 Atéteremó, Yesuné ɔ kelené kikéyóló kaae taru duraalu, “ɔla ɔla fea tare whi Kótóné teteróló kaae tare aomó sókó fóló betaaire mo doasi dirirapó,” yalepó. 25 “Ti noatepae, *kamel* hupu keteli dolomó sókó faaire hapóluni, sumó fenérápó. Tépatéi, doasi ɔla ɔla mole néli whirapeta, Kótóné teteróló kaae tare aomó sókó faaire mo hapólurapó,” yalepó.

26 Ai fo depa wosale so whiné Yesupaae woseturaalu, “Da feata alunérapa, Kótóné demaaté tao saaloé?” yalepó.

27 Ai fo depa Yesuné duraalu, “Mo whiné enénire ala Kótóné mo sumó enérápó,” yalepó.

28 Tétepa Pitané duraalu, “Dané be ó ɔla ɔla fea mupa taaróló, ɔa i sya wale ape,” yalepó.

29 Ai fo depa Yesuné duraalu, “Yalo diɔpaae mo i dere ape. Mepaae whi dené ama be ó soma ó nomarape ó hama alima ó naale senaale taaróló, Kótóné teteróló kaae tare aomó betaai dapóló fupata, ti mió i alimó bitukélé ama taaróló wale ɔla ɔla tómó beleróló, Kótóné mo dekeró matepa saalo ai ape. 30 Ai ɔla maaté meitei, take waaire alimó mo ti betaaire betekélé saalo ai ape,” yalepó.

Yesu ą sinaaire fo mó yaletei
(Mat 20:17-19, Mak 10:32-34)

³¹ Atéró, Yesuné yó matere 12 wh̄rape d̄paae dapesó fóló bitu duraalu, “D̄ta Jerusalem be huluapaae holaai folet̄ei, Kótóné ama k̄ló wh̄rapené i ala yaalopóló as̄ere fo mió mo dokonóló kale Wh̄iné Naalemapaae eratepa kelaalo ai ape. ³² Ȧta, Juda meire fake wh̄rapené d̄póló eleké deyóló, atima naase tūpaae mulaalo ai ape. Atétepa, atimané ą doka doka yóo, haleroó, fes̄a apuróo, képi tikiné fokosoi ala yóló, ą mo ti sukópóló dóo, yaalo ai ape yalepó.

³³ Téyaalotei, sore be d̄mó ą mo ti suk̄letei momó kepaayóló betaalopó,” yalepó.

³⁴ Ama yó matere wh̄rapené ai yale fo wosóta yaletei, bete hiróló moleteiné diriyóló k̄sipa sini, k̄ló k̄ló du betalepó.

Kele dilikire wh̄i wisirale fo
(Mat 20:29-34, Mak 10:46-52)

³⁵ Téró Yesu ą Jeriko be huluapaae felekemó sókó faai t̄mó fu betaalemó, bet̄a kele dilikire wh̄i t̄ d̄mó bituraalu, fua wuatere so wh̄paae monikó ąlae yóló, kema du betalepó. ³⁶ Atéró wosalemó, so wh̄i mo fea t̄mó fua wua du betepa, ai so wh̄paae woseturaalu, “Doa ai-a, noa ala maaté du bitu de?” yalepó. ³⁷ Ti fo depa, atimané ąpaae duraalu, “Nasaret be hulua wh̄ikó Yesu i fole ape,” yalepó.

³⁸ Ai fo depa, ama fo fakeyóló duraalu, “Depitné Naalema Yesu-ó, naao ę k̄lené sukuturaalu tao sae,” yalepó. ³⁹ Atéró, mepaae folosóro fele so wh̄iné kale wh̄paae momó yaai dée yóló foné

salepó. Tétépatei, kale sekéné fo faketóro dekeró yó taru duraalu, “Depit-né Naalema Yesu-ó, naao ę kolené sukæ,” yalepó.

⁴⁰⁻⁴¹ Atétepa Yesu ą keɣyóló daalu, kale wh̄rapepaae duraalu, “Ai wh̄i ę beterepaae dapesó ape,” yalepó. Atétepa, kale wh̄i dapesó wóló felekemó daapa, Yesuné ąpaae woseturaalu, “Yalo ɣamó noa alakó erópóló de?” depa, kale wh̄iné duraalu, “Tale-ó, ɣalo kelené ɣla ɣla kelenée yóló kisipa mutapó,” yalepó.

⁴² Tétépa, Yesuné ąpaae duraalu, “Naao kisipa tiki tirale alané naao kele ai wisiyalepa, mió kelaé,” yalepó. ⁴³ Yesuné ai fo deretamotóro kale wh̄iné ama kele wisitepa, Yesu sya furaalu, Kótóné doi hale sóro horaté felepó. Ai ala depa kelale so wh̄inékelé Kótóné doi hale sóro horalepó.

19

Takis moni siré kotere wh̄i Sakius-né yale ala

¹ Atéro, Yesu ą Jeriko be huluaamó sókó fóló, ai be belamó fu betalepó. ² Téyalemó, *takis moni* siré kotere wh̄irapené doasi topo wh̄i Sakius beterepó. ąta, fea ɣla ɣlané néli wh̄ipó. ³ Ama kisipané Yesu deró kelaai dapóló felemó, aimó mo h̄ale ɣla kaae so wh̄i touróló daae moleteiné, Sakius ą h̄alekeruraalu Yesu wisiyóló kilinipó. ⁴ Atépa, kale wh̄i ąpi sururu yóló fóló, Yesu tumó wale kelaai, betą nose kaae ni siki doló holóló kaae tawóló beterepó.

⁵ Atépa, Yesu ʔ ni betemó sókó fóló ai ni sikipaae kele horalemó Sakius daapa kolóló duraalu, “Sakius-ó, mió ʔ yaʔtamo naao bemó betaai kisipa mutapa, ya mo hapale dere ape,” yalepó.

⁶ Atétepa, ʔ hapale téti dorowóló, heketetamo Yesu dape sóró ama bepaee felepó.

⁷ Atétepa, ai daae mole so whi feané Yesu Sakius-né bepaee fupa kolóló, atimasisi kikiiti eróló duraalu, “ʔta dowi ala du betere whitamotei, betaai ai fele ape,” yalepó.

⁸ Téyaleteti, kale Sakius ʔ turukó holóló Talepaae duraalu, “Tale-ó, mióta, ya lo i mole ʔla ʔlarape bukóló, mepaae yolealere so whimó melóo, ya lotamo so whi dilikóló mepaae monikó simó ti douro félimó tómó beleróló tok ʔ melóo, yaai dapó,” yalepó.

⁹ Ai fo depa Yesuné ʔpaae duraalu, “Kótóné so whi aluyaqsóro tao sere ala mió i bepaee walepó. Ti noatepae, i whi ʔkélé Abraham-né naaletóro beterapó. ¹⁰ Ti Whiné Naalema ʔ waleteti, aluyale so whi kekóló tao saairaalu, walepó,” yalepó.

Naase tamo whirapené doasi whiné kutó dirai moni sale fo sale

(Mat 25:14-30)

¹¹ Atéro, ama ai du betere fo wosetu betepatei, ʔ Jerusalem be hulua felekepaae sókó waletiné Kótóné tetérolo kaae tare aqmó mole ala so whiné kisané mo felekemó sókó waaitere nisi du betalepó. Atétepa ama du betere fotamo touróló, atimapaee i fo salekélé yalepó. ¹² Atéro ama duraalu, “Hae kwia fea tetérolo kaae tare topo

wh̄irapené fake wh̄i bet̄a topo wh̄i sóró beter-
atepa momó fesaae wóló, hae kwia ama t̄eteróló
kaae tawaai dapóló, ̄a felepó. ¹³ ̄A atéró faairaalu,
ama kutó diratere naasetamo wh̄irapepaae ape
yóló duraalu, ‘Ȳalo i matere *moniné* mepaae
kutó diraté fóló, tómó beleróló sóró muló betepa,
momó fesaae wou kelaalopóló,’ ̄a felepó.

¹⁴ Téyaletei, ama be wh̄i so wh̄iné ai sekéné
atima t̄eteróló kaae tawaqsóró kisipa mutu, ‘Kale
doasi topo wh̄ipaae ene f̄ópóló, atimakó mepaae
wh̄irape ̄a fi k̄ilipaae dot̄eyalepó.’

¹⁵ Até yaletei, doasiné kale wh̄ipaae naaotóró
t̄eteróló kaae tawaasepóló, ȳa sóró beteratapa fae
depa, ̄a bepaae fesaae walepó. Téro, ama kutó
diratere wh̄irapepaae melale *moniné* mepaae
kutó diróló, tómó beleróló meteró saleró kelaai-
pa, dapesene fae yóló, wh̄irape dot̄eyalepó.

¹⁶ Atétepa, ama *moni* melale wh̄irapekó bet̄a
wh̄i folosóró wóló duraalu, ‘Doa wh̄i-ó, take naao
̄epaae bet̄a melale *moni* bosenóló, mo dekéro sóró
muló beterapó,’ yalepó.

¹⁷ Ti fo depa, kale topo wh̄iné duraalu, ‘Ȳalo
kutó diratere wh̄i wisi-ó, naao ai ere ala mo
wisirapó. Ti noatepae, ȳalo mo sawatamo melale
q̄la naao mo wisiyóló kaae tawirapa, naasetamo
be huluakélé naaotóró t̄eteróló kaae tawaasepe,
yalepó.

¹⁸ Kale dere kaae wh̄i me wóló duraalu, ‘Doa
wh̄i-ó, naaota ̄epaae *moni* bet̄a melalet̄ei, ȳalo
mepaae kutó dité fóló, naao melale *moni* tómó
beleróló aporó sóró muló beterapó,’ yalepó.

19 Ti fo depa, ama topo wh̄iné tokó mótu duraalu, ‘Aporó be huluarape naao t̄eteróló kaae tawaasepóló, ȳalo ȳa sóró beteratapó,’ yalepó.

20 Téró kale dere kaae, ama kutó dirale wh̄i me wóló duraalu, ‘Doa wh̄i-ó, naao kale melale *monita*, ȳalo me kutókélé dini, kuti kwiané bopeyóló mulaletei, i sóró wale ape. 21 Ti noatepae, ȳata mo kekepai wh̄i bitu, mené ɔlatei naao sóo, me wh̄iné biliyale ɔla naao bukóló, kwiapaae ȳa sóo dua dapó. Atétere ala ȳalo tuéruraalu, ɛ witepa naao yae yale ala inipó,’ yalepó.

22 Ti fo depa ama topo wh̄iné ɔpaae duraalu, ‘Ȳata, kutó diratere wh̄i dowipó. Ȳatamo fo tokóló ȳa só deraaitere ala ti naao dere fonétei ȳa ai só deretere ape. 23 Ti naao atei kaae kisipa mulutei, ɛ fesaae wouraalu h̄uróló sópóló *moni* mulatere tikipaae mulale fole noatepa yaleé?’ yalepó.

24 Téró, kale topo wh̄iné aimó daae mole wh̄irapepaae duraalu, ‘Ama ai tare *moni* fasóló naase tamo *moni* tare wh̄ipaae melae,’ yalepó.

25 Ai fo depa, atimané kale topo wh̄ipaae duraalu, ‘Doa wh̄i-ó, ai wh̄ita naase tamo *moni* taketi sóró tarapó,’ yalepó.

26 Ti fo depa ama duraalu, ‘Ȳalo diɔpaae i dere ape. Mepaae ɔla ɔla h̄uróló mole wh̄ipaae ti mo dekéró beleróló melaalo ai ape. Téyaalotei, mepaae wh̄i de ɔla ɔla sawa t̄éti mupa, ti ai ɔla fasó saalo ai ape. 27 Téyaalotei, mepaae ȳalo t̄eteróló kaae tare aɔmó betere h̄óróló bóe dele wh̄irapeta, ipaae dapesó wóló, mo ti sinópóló dae,’” yalepó.

*Yesu Jerusalem be huluapaae doasi topo whi aoyóló sókó wapa hale sóró horale fo
(Mat 21:1-11, Mak 11:1-11, Jon 12:12-19)*

²⁸ Téró Yesuné i fo yóló kemetepa, atima Jerusalem be huluapaae furaalu, ama ǵlísó felepó. ²⁹ Atéró, ǵ Betpas beró Betani beta-mopaae sókó faai fu betalepó. Ai be hulua tamo felekemó *Olip* dupó du betere tiki erapó. ³⁰ Aimó ama yó matere whi tamo dotonaaí atimaamopaae duraalu, “U bepaee diaamopi fae. Ai bemó sókó fóló kelenalemó, whikélé betóló kunire teó *donki* hupu duló betaalopó. Téyaalopa, ai hupu taayóló ipaae dapesó ape. ³¹ Atéró taanalemótamo, whi mené diaamopaae woseturaalu, ‘Ai neyaai de?’ depa, ti i fo yae. ‘Momó dapesó waaitei, Talené ama diyaaire kutó mupa sóró ape yale tikimó sóró fulapó yae,’ yalepó.

³² Atéró dotonatepa fóló kelalemó, atimaamopaae yale fotórómo epa kelalepó. ³³ Atépa, atimaamo kale *donki* hupu halika teraatu betalemó, hupu talerape wóló atimaamopaae woseturaalu, “Ai hupu teraatu betere-a noyaai de?” yalepó.

³⁴ Ti fo depa atimaamoné duraalu, “Ita Talené ama diyaaire kutó mupa, serǵle fae yale tikimó sóró fulapó,” yalepó.

³⁵ Atéró, Yesu beterepaae dapesó wóló daaló bitu, atimaamoné deró betere fǵloi kutirape sorokóló, Yesu ǵ hupuné sisó tómó beterǵpóló, whamenalepó. ³⁶ Atéró ǵ ai hupu tómó betóló wapa, so whi folosóró furaalu, atimané deró

betere kutirape sorokóló tumó whamenaté felepó.

³⁷ Atéro, ą Jerusalem be huluapaae felekemó sókó faairaalu, *Olip* du sokore aqpaee doropole tumó sókó derepelepó. Aimó, ama yó matere so whı mo feané Kótóné kae kae kelemei alarape eratepa kelaletiné atima hekesené sukuturaalu, fo fakeyóló Kótóné doi hale sóró horaai kaae salepó.

³⁸ “Mió Talené doimó wale doasi topo whı wisi-ó, Kótóné ya wisirópóló yae!”

“Kótóné hepen be tuamó mole hosaa muni deyóló dua betere ala so whı feapaae erópóló yae.

Téturaalu, mo taoró betere Kótóné kae mole doasi doi hale sóró horae!” deté fu be-talepó.

³⁹ Tétepa, ai so whı kuamó betó mole Farisi whırapené Yesupaae duraalu, “Naaó yó matere whırapepaae taalae yóló, foné sae,” yalepó.

⁴⁰ Ti fo depa ama atimapaae duraalu, “Yąlo diąpaae mo i dere ape. Atimatamo fo ini dua betepa, ti tumó ai daae mole kaporapenétei doasi fo fake yaalo ai ape,” yalepó.

⁴¹ Atéro, Yesu ą Jerusalem be huluapaae felekemó sókó faai fu bitu, ai doasi be hulua tuąpaae kese deralemó, mo kųlei ala epa, ą doasi wole yalepó. ⁴² Atéro woleyóló duraalu, “Hosaa muni deyóló dua betaaire ala mió i be demótóró dią beterepaae walapóló, kisipa uąsóró ti mo wisi uąpó. Téuątei, ai ala yaaire be de kemeyaletiné mió diaaą kelené kelaąsóró, kinó beterapó. ⁴³ Téretei, nalo me be demó kale bóe whırape atima naao bepaae dorowaairaalu, be

bopéro betere tipimó hae kaayóló mulaté holóló, naao be bopéro betaalopó. ⁴⁴ Atére tómó atima daane holóló, diakélé diaaḡ naale senaalekélé tao sóró haemó hairaalo ai ape. Kane fake me tómó beleretei, atéro mulópóló taalaalomeipó. Ti noatepae, Tale Kótóné diḡ tao saai wale be de diaaḡ kisipani, hōraleteinépó,” yalepó.

Momatere bemó ḡla dupu du betepa Yesuné hḡkonale fo

(Mat 21:12-17, Mak 11:15-19, Jon 2:13-22)

⁴⁵ Téro, ḡ momatere be bolaare tipi tuḡpaae sókó holalemó, whḡrapené ḡla ḡla dotonóló dupu du betepa fḡpóló dóló hḡkonalepó. ⁴⁶ Atéro, ama atimapaee duraalu, “Yḡlo beta, moma maaté yaai tḡnapóló ašemó epatei, diaaḡ ai du betere alané ḡlémi whḡ betere be aḡrótu beterapó,” yalepó.

⁴⁷ Atéro momatere bemó, betere dokḡ fea ama fo yó maleta du betalepó. Tétu betepatei, so whḡmó momaratere topo whḡrapekélé, Moses-né ašere fo yó matere whḡrapekélé, so whḡ kaae tare mepaae whḡ disirapekélé, fea touyóló, Yesu daaire tḡ kekitu betalepó. ⁴⁸ Téyaleteti, atimané ḡ daaire tḡ me kilinipó. Ti noatepae, yó matere fo so whḡné wosóló, hosaamó su betaleteiné ḡ daaire tḡkélé kilinipó.

20

Yesupaae yḡ topo whḡ né sóró beteralee yóló wosale fo

(Mat 21:23-37, Mak 11:27-33)

¹ Téro, me sukamó Yesu ḡ momatere be tuḡmó Kótóné ala etérópóló so whḡ feapaae yó

matere alaró, kale mió wosetere fo wisitamo yó mótu betalepó. Tétu betepa, mo so whimó momaraterere whirapekélé, Moses-né asere fo yó matere whirapekélé, mepaae whi disirapekélé, fea touyóló ą beterepaae walepó. ² Atéró wóló ąpaae duraalu, “Naao ai alarape yóppóló, ya né sóró beteralé?” yalepó.

³ Ti fo depa, ama atimapaee duraalu, “Yłokélé diąpaae wosetere fo betą i dapa, ępaae tokó ąlae.

⁴ Jon-né wei tópuraterere ala ó hepen bemó yae depa yalepé, mo whiné yae depa yalé?” yalepó.

⁵ Ai fo deremó, whirape atimasisitei fo kęlaaróló duraalu, “Dąnétamo, hepen bemó yae depa yalepó depa, ti dąpaae ama dere fo wosóló kisipa tiki tiraterere noatapa deé enérąpó.

⁶ Tépateti dąné duraalu, mo whiné yae depa yalepó depa, ti doai wóló betó mole so whiné kapó duné dą siróló daalopó. Ti noatepae, Jonta so whipaae yó matere Kótóné kóló whi betaleteti feané kisiparapó,” yalepó.

⁷ Atétepa, atimané ąpaae duraalu, “Jon-né wei tópuraterere ala ąpaae né yae depa yaleró, dą kisipanipó,” yalepó.

⁸ Ai fo depa Yesuné duraalu, “Diaaą yąlo wosale fo tokó menitepa, ti diąné ępaae wosale fokélé tokó melaalo meipó,” yalepó.

Whi betąné ama kutó kaae tanóppóló sóró betere atere alapaae dó faróló yale fo

(Mat 21:33-46, Mak 12:1-12)

⁹ Téró Yesuné so whipaae ai fo deté fóló, me i fo salekélé yalepó. “Whi betąné ama kutó diyóló wain képi wae biliyalepó. Atéró, ai kutó

mepaae wh̄irapené kaae taru, ʘlumétere ʘla sóró dotonótu betae yóló, ʘ f̄lo sukamó me be huluapaae bit̄i felepó. ¹⁰ Kale ʘla ʘlumétepa sere alimó, kale kutó talené ama kutó diratere wh̄ikó bet̄apaae duraalu, ya kutó kaae tare wh̄i beterepaae mepaae ʘlumére ʘlakó ser̄le fae yóló dot̄yalepó. Téyalet̄ei, kutó kaae tare wh̄irapené ʘ du beteró, hāle f̄póló dot̄yalepó. ¹¹ Téró, kale dere kaae ama kutó diratere wh̄i me dot̄yalepó. Téyalet̄ei, ai wh̄ikélé atimané dóló susupuróló, haletamo hāle f̄póló dot̄yalepó. ¹² Atéró, kale dere kaae sore dakoróló wh̄i memo dot̄yalepó. Téyalet̄ei, ai wh̄ikélé atimané du beteró samea sókó faróló, belapaae sóró taae deralepó.

¹³ Téró, kale *wain* képi kutó talené duraalu, ‘Mió yālo noa alakó yaaloé? Yālo yaala sókó fóló hosaa turó mole naale bet̄a atima beterepaae dotonatepa, atimané ʘ mo wisiyóló dape sóró, ama dere fo wosaalopóló kisipatu, dot̄yalepó,’ yalepó.

¹⁴ Téyalet̄ei, kale kutó diratere wh̄irapené ʘ wale kolóló, atimasisitei fo dokóló duraalu, ‘Aita, i kutó talené ama naalepó. Alima sinit̄epa, i kutóró mepaae mómu ʘla ʘlatamo fea ama sāsóró, da saair̄alu, ʘ daalopa siépe,’ yalepó. ¹⁵ Atéró, atimané ʘ kale *wain* képi kutó tuamó sóró belapaae taae deróló mo ti dalepó. Atétepa, kutó tale wóló atimapaae noa alakó eraaloé? ¹⁶ Kale kutó diratere wh̄irape mo ti dóló sukunóló, ai kutó mepaae wh̄irapené kaae taw̄ópóló melaalopó,” yalepó.

Tétepa, aimó betó mole mo so wh̄i feané ai dere

fo wosóló duraalu, “Aita enénire alatei dapó,” yalepó.

¹⁷ Téró, Yesuné kelené kíké yóló kaae taru atimapaee woseturaalu, “Kótóné fo tuámó, ‘Mepaae be tẹtere whịrapené taae farale kane faketei, sóró be hulua eleké wisinaale botokoróló deyaalo ai ape,’ yóló asẹmó ere fo-a, noa betené yaleé?”

¹⁸ Téyaalotei, mepaae so whị de ai kapo fake tómó kotóo sóró dée nukupa, ti ama tiki turukó fóló doalé maaté yaalo ai ape. Téyaalotei, ai kale kapo dokó dorowouraalu tẹiya dere so whịta, mo ti derakó fóló muaalo ai ape,” yalepó.

¹⁹ Tétepa, Moses-né asẹre fo yó matere whịraperó mo so whịmó momaratere topo whịrapetamoné ama ai yale fo saleta, atimapaetóró dapóló aimótóró tawóló daai yaletei, ai touró betere so whịné atimapaee me ala eraqsóró, witepa taaralepó.

*Sisapaae takis moni melaróe yóló wosale fo
(Mat 22:15-22, Mak 12:13-17)*

²⁰ Atétepa, atimané Yesuné me alakó ẹsókó fóló déró kelaai, mepaae whịrape mo ala dere whị aqyóló kíkiti kaae tawóló beterópóló, mepaae whịrape dotẹyalepó. Aita ẹle mei, ẹ ẹsókó fóló, ama i fo mo depa wosalepóló, Rom *Gavman* topo whịné naase tuámó mulale faai kisipa mutu yalepó. ²¹ Atétepa, kale whịrapené ẹpaae woseturaalu, “Yó matere whị-ó, naao dere foró so whịpaae yó matere alatamota, mo dono dapó. Naao fake so whị maaté taosuraalu, mo so whị sisópaae erótumipó. Naaota, Kótóné tuẹ mole

alatóró mo dono yó mótu beteretei dané kisi-parapó. ²² Ti dané *takis moni* Sisapaae materetei-a, donorépe meié?” yalepó.

²³⁻²⁴ Atimané ɔ só deraai dere ala ama kolóló, atimapaae duraalu, “Ai *denarias moni* yálo ke-laalopa ɛpaae yó ɔlae yóló matepa tao sóró duraalu, *moni* tómó i mole asoró doitamo-a né?” yalepó.

²⁵ Ti fo depa, atimané duraalu, “Sisanéópó,” yalepó. Tétepa ama duraalu, “Sisané ɔlapa, ti Sisapaae melae. Kótóné ɔla ti Kótópaae melae,” yalepó.

²⁶ Atéró, Yesu so wh̄i feané keletómó me alakó ɔsókó fuléró kelaai s̄u saletei, ɔ ɔsókókélé feni, ama atimapaae fesaayóló dere fomó, atima hokomó sókó furaalu fokélé tekini, siratei du betalepó.

Sinale wh̄i kepaayóló so dokaaloé yóló wosale fo

(Mat 22:23-33, Mak 12:18-27)

²⁷ Mepaae suk̄ale so wh̄i kepaayaalo meipó, du betere Sadyusi fakekó mepaae wh̄irapetamo Yesupaae wosetere fo yaai walepó. ²⁸ Atéró duraalu, “Yó matere wh̄i-ó, wh̄i bet̄a so dokaleteti, naale senaalekélé deni ɔle sinitepa, noma me wh̄iné ai so wulia dokóló naale detepa, ti ai naale noma suk̄ale wh̄i betale sirimó beterópóló yae fo Moses-né ašemó ɔpaae erapó,” yalepó.

²⁹ “Take w̄eikeró nomarape beterepó. Atéró bitu, topo wh̄i so dokaleteti, ai sotamo naale deni, ɔ ɔle sinalepó. ³⁰ Atéró sukutepa, kale so wulia noma me wh̄inémo dokalemó, ai wh̄ikélé naale

deni, haḷe sukālepó. ³¹⁻³² Nomarape fea até deté fóló, nalo mo kemerótu noma awā taalu whjné dokaletēi, akélé haḷe sukālepó. Atéro mo ti kemeróturaalu, kale sokélé sukālepó. ³³ Atéro, wēikeró whjrapené dokale so take kepaayóló wale sukamó, mé whjné dokaaloé?” yalepó.

³⁴ Ti fo depa Yesuné atimapaee duraalu, “Mió i alimó bitu, whj so dokóo, so whjtamo fóo, du betera pó. ³⁵ Tétu betepatei, sukāle so whj momó kepaayóló betaaire alimó atéro whj so dokotere alakélé, so whjtamo betera tere alakélé, sinitere alakélé ini, hepen bemó betere *ensel* kaae betaalo ai ape. ³⁶ Téturaalu, atima kepaaró betere naale senaale ereteiné Kótóné ama naale senaale tóro betaalopó. ³⁷ Ni sesaapemó duku betere si mi dolomó yale fo Moses-né asērapó. Aḷa, Abraham, Aisak, Jekop-sēpi fea tēteróló kaae tare Kótó betera pó. Atére foné sukāle so whj aluni, kepaayóló betera póló, haḷeamó yó matapó. ³⁸ Ti aḷa, sukāle so whj maaté tēteróló kaae tanitei, mo betere so whjkélé tēteróló kaae tare Kótó betera pó. Ti noatepae, sukāle so whjkélé, betere so whjkélé, fea amatóro betera pó,” yalepó.

³⁹ Moses-né asēre fo yó matere whjrape mepaaené apaae tokó mótu duraalu, “Yó matere whj-ó! naao dere fota, mo dono dapó,” yalepó.

⁴⁰ Téyaletēi, ama ai yale foné atima haleturaalu, whj betanékélé apaae me wosetere fo inipó.

So whj tēteróló kaae tare whj-a né naaleé yale fo

(Mat 22:41-46, Mak 12:35-37)

⁴¹ Téró, Yesuné atimapaee duraalu, “Kótóné so wh̄i t̄eteróló kaae tare wh̄i Kerisota, Depit-né naalepó du betere-a noa fo betené de?

⁴²⁻⁴³ Ti ai fo bete Depit-né amatei, hākearóló *buk* Sam-mó asēyóló muló beterapó.

‘Talené ę t̄eteróló kaae tare Talepaae duraalu, “Ȳalo naao bóe wh̄irape t̄etei aleróló, naao hó aomó beteraalopa, kaae tawóló ȳalo turu naase d̄emó betae,” ’ erapó.

⁴⁴ Ti Depit-né ą t̄eteróló kaae tare Tale-ó du be-taleteimo, ama naalepó, fo neteró yaleé?” yalepó.

⁴⁵ Téró, aimó betó mole so wh̄i feané ama yó mótu betere fo wosetu betepatei, Yesu ą ama yó matere wh̄irape daalepaae fetée fóló duraalu, “Moses-né asēre fo yó matere wh̄irapené dere alané dīa doraqsóro mo wisiyóló kaae tawae.

⁴⁶ Ti atimata, so wh̄i feané doasi wh̄i-ó yóló, dukiraterere kokomó so wh̄i fea tour̄leta dere tikipaae faairaaluu, mo f̄loi kuti wisimaaté deróló fua yóo, Kótóné fo wosetere be dolopaae fukélé, mo wisi tikimótóro betaai h̄ekese dua yóo, ęla detere sukamókélé, topo wh̄irape bitua betere tikimó, betaai ek̄le yóo, dua dapó. ⁴⁷ Téturaalu, kale wulia sorapekélé dilikóló atimané ęla ęla fea ęlémi sóo, moma duraalukélé, so wh̄iné dukiraterere kokomó f̄lo sīyóló yóo, dua dapó. Take kemetere sukamó at̄etere wh̄irapené saaire kwiata, mepaae so wh̄iné saaire sek̄ bosenóló, mo doasi saalo ai ape,” yalepó.

*Wulia soné moni ke derɔle wale fo
(Mak 12:41-44)*

¹ Téró Yesu ɔ momatere bemó bitu kaae taremó, mepaae néli whɔné Kótópaae hɔle matere *moni* deratere dolopaae dekéro derɔleta du betalepó.
² Atétepa kelalemó, betɔ yoleale wulia sonékélé sonaai *moni* ke belekɔamale tamo derɔle walepó.
³ Atétepa ama duraalu, “Yɔlo diɔpaae mo i dere ape. I yolealere wulia soné derale *moni* kené so whɔ feané derale *moni* taaróló, mo bosene falapó.
⁴ Ti noatepae, so whɔ feanéta doakale *moni* mupatei, téti maaté derɔleta yalepó. Téyaletei i wulia sonéta, ama depe dolo sesé mole *moni* ketei, mo ti kemeróló derɔle walepó,” yalepó.

*Sɔró haetamo kemeyai deremó eratere
fareyópu
(Mat 24:1-35, Mak 13:1-31)*

⁵ Téró, mepaae ama yó matere whɔrape atima furaalu, “Mepaae so whɔné Kótópaae hɔle matere ɔla ɔlaró kapo fake wisitamóné momatere be wisinaale teyale tikimó kokɔné sininó beterepa kelae,” yalepó. ⁶ Tétepa, Yesuné atimapaae duraalu, “Diaaɔ mió i keletere ɔla ɔla feata, take waaire sukamó me kapotamo atéro wolekepa kelaalomeitei, fea fisikó fóló, haemó kolokó doropóló mupa kelaalo ai ape,” yalepó.

⁷ Ti fo depa atimané ɔpaae woseturaalu, “Yó matere whɔ-ó, ai alarape-a noa sukamó yaaloé? Noa kaae fareyópu eratepa, kolóló kisipa muaaloé?” yalepó.

⁸ Ai fo depa Yesuné duraalu, “Mepaae whɔné kapala fo yóló diɔ dilikaɔsóró, mo hotowa yóló

kaae tawae. Ti noatepae, mepaae dilikitere wh̄irape wouraalu yālo doi yóló, ‘Kale waalopó du betere wh̄i ɛ́torótípó. Ali mió felekemó walapó,’ depa mo nisiyóló sya faqse. ⁹ Doasi bóe dele alaró mepaae wh̄irape atimané hae tiki atimatei t̄eteróló kaae tawaairaaalu, *Gavman* wh̄itamó bóe du beteraopó dere fo wosóló wiyaqse. Ti noatepae, folosóro ai alarape mo yaalotei, kemeyaaire ali folo sókó waalomeipó,” yalepó.

¹⁰ Téró atimapaee duraalu, “Me hae kwiamó betó mole so wh̄iró me hae kwiamó betó mole so wh̄itamó bóe dóo, me hae kwia t̄eteróló kaae tare topo wh̄iraperó me hae kwia t̄eteróló kaae tare topo wh̄irapetamo bóe dóo, yaalo ai ape. ¹¹ Atéturaalu, hae kwia feamó doakale bao dere alakélé, doasi sekei alakélé, wotetere aliró hepo alitamokélé waalopó. Téturaalu, so wh̄i mo doa winé sinóló diri furu furu yaaire alaró me ala yaairemó dere fareyóputamo samó eratepa, diaaq kelaalopó.

¹² Ai alarape yaaitei folosóro, mepaae wh̄iné dīa dóló susupuróló, fo wosetere berapepaae dapesó fóló, *dipula* beteraalo ai ape. Atéró, dīa doasi topo wh̄iraperó *Gavman* wh̄irapetamo beterepaae dapesó faalopó. Dīa yālo ala erótu beterepá bóe duraalu ai alarape yaalopó. ¹³ Atétere alané yālo yó melale alarape atimané keletómó yó melóppóló, dīa t̄e ai mulatere ape. ¹⁴ Atimané dīa só deraairaaalu, fotokojiné depa dīa noa fo yaaloé, yóló whaalia yaqse. ¹⁵ Ti noatepae, ai ala deretamo yālo dīapaae kisipa tiki dotoróe

fole alaró atimané dere fo tokó melaaire fotamo yó melaalo ai ape. Diḡné ai fo depa woseturaalu, diḡ só deraaitere whḡrape folópu kolokó fóló, mo betḡ whḡnékélé me tokó matere alakélé yaalomeipó. ¹⁶ Dīaaḡ hae aya ó norape ó fake whḡrape ó fulumu whḡrapenékélé, diḡ dḡpóló eleké deyaalo ai ape. Téturaalu, diḡ mepaae whḡrape atimané mo ti dóló sukunaalopó. ¹⁷ Atétu, so whḡ mo feané diḡtamo bóe dóló, diḡ hḡraalo ai ape. Ti atétere alata, atimané ę hḡrótu diḡkélé ai hḡratere ape. ¹⁸ Téyaalotei, dīaaḡ topo niki mo betḡkókélé aluyaalo meipó. ¹⁹ Diḡ mo ti betaaire bete saairaalu, mo diriyóló betae.

²⁰ Dīaaḡ kelerḡlemó, Jerusalem be hulua bóe whḡrapené bopéro betepa kilituraalu, kale be hulua mió mo felekemó dóló wópu mulaai dapóló, kisipa muae. ²¹ Atétere sukamó, Judia hae kwiamó betó mole so whḡ diḡ ti du sorokó molepaae botokó fóo, mepaae doasi be hulua tuḡmó betó mole so whḡ diḡ ai be hulua taaróló fóo, mepaae ai hae kwiamó betóló fale so whḡkélé ai doasi be hulua tuḡpaae faḡsóró yae. ²² Ti atétere alimó yaaire alata ḡale meipó. I haemó betóló fale so whḡné yale alamó Kótóné kwia móturaalu, doasi sekḡi ala eraalopóló, ašemó ere fo dokonóturaalu, mo eraalo ape. ²³ Ti aita, Kótóné i hae kwia feamó betó mole so whḡtamo doasi fopaae buturaalu, só ai deratere ape. Atétere be dḡmó mepaae naale ere soraperó, naale teó awḡ nuku betere sorapetamo betḡ kḡleó, mo doasi sekḡi ala saalo ai ape.

²⁴ Téturaalu, atima mepaae ti bóe dele sepaakéné dóló kemeróo, mepaae so wh̄i ti hae kwia feapaae *dipula* sóró dapo dapo yóo, yaalopó. Tétu, Jerusalem be mo ti doróló torokó faróló, Juda meire fake atimané t̄eteróló kaae taté fóló, Kótóné ðale muló betere kwiamó sókó fupa, ti kemeyaalo ai ape.

²⁵ Atéturaalu, s̄amó daale sukanékélé, h̄q̄rerapénékélé, wéliénékélé, kae kae alarape depa kolóo, doasi w̄ei k̄ɛla whaaу yóló holóo yaalopó. Atétere ala i hae kwia feamó betó mole so wh̄iné kilitu, noa ala du derópóló hosaa w̄ei w̄ei yóló wiyaalopó. ²⁶ I hae kwia feamó betó mole so wh̄iné ó s̄a wore duraalu, h̄q̄rrape torokó dorowale kilitu, i haemó noa ala du derópóló, doasi winé suk̄alopó. Tétu, diri furu furu yóló be fesaaetamo du dere kaae yaalo ai ape. ²⁷ Ai alarape yóló kemetepa, kale Wh̄iné Naalema ó s̄ako dolomó doasi bole fotok̄oró mo kae ere ðe wisinaaletamo h̄akeamó wapa kelaalopó. ²⁸ Ai alarape kaae sóró depa kilitu, aluyaqsóró Kótóné ama dupure so wh̄i mo felekemó dapesene walapóló kisipa mutu, h̄aj̄tamo turukó holóló daae muae.

²⁹ Atéró, ama atimapaae i fo sale yalepó. Ti daale ni noseró mepaae nirapetamoné ere ala diaaḡ kolóló kisipa muae? ³⁰ Nirape sóku fóló, tokḡ momó beletepa kilituraalu, kale ba fo ali mió mo felekemó ai sókó wale ape dua dapó. ³¹ Atei alarape kaae depa diaaḡ kilitu, Kótóné t̄eteróló kaae tare ala mió mo felekemó walapóló kisipa muae.

³² Yalo diɔpaae mo i dere ape. Mió i alimó betó mole so whi sukuni haɓe betepatei, i alarape folosóró yaalo ai ape. ³³ Saꝛó i haetamo kemeyaalotei, yaɓo fo betɔ mo kemekélé ini, haɓe muó tawaalopó.

³⁴ Diɔ weɓi nóló topo dotere alané diaaɔ tiki ó naao dere ala haɓe ɔla kaae taae fatereteikélé, ó i haemó whaaliatu betere alakélé, diɔné hosaa tuɔmó sekené sinitere alakélé du betepa, i be de sókó wouraalu ya hemó duku dere kaae yaɔsóró, mo hotowaró kaae tawae. ³⁵ Ti noatepae, ai yaaire alarapeta, i hae kwiamó betó mole so whi mo feapaae waalo ai ape. ³⁶ Kale Whiné Naalema betere tikimó diɔkélé betaalopó. Téyaalopa, ai alarapené diɔ só deraɔsóró, betere dokɔ fea hotowayóló kaae taru, momatere ala yó tawae,” yalepó.

³⁷ Atéró, Yesu ɔ suka fea ai momatere bemó Talené ala etérapóló yó melóló, be kuluka dere-tamo ɔ *Olip* du sorokó molepaae fini fi wuatu betalepó. ³⁸ Atei ala du betepa, so whi fea mo hɔkatitei turukó holóló Yesuné momatere bemó yó mótu betere fo wosaai wua yalepó.

22

Judas-né Yesu eleké deale fo

(*Mat 26:1-5,14-16, Mak 14:1-2,10-11, Jon 11:45-53*)

¹ Kale bosene fele be de kisipa mutu, fopei *bred* o deyóló nokole be de felekemó sókó waai depa etéyalepó. ² So whimó momaratere topo whiɔraperó Moses-né asɔre fo yó matere

wh̄irapetamo so wh̄iné kapo duné siróló daqsóró wituraalu, Yesu kikiti daaire t̄u kekitu betalepó. ³ Téró, atima 12 yó matere wh̄irapekó bet̄a wh̄iné doi Judas Iskariot tūapaae dowi Satan bit̄i walepó. ⁴ Tétēpa kale Judas ̄a fóló, mo so wh̄imó momaratere topo wh̄iraperó momatere be kaae tare diki tare wh̄irapené topo wh̄irapetamo betó molepaae felepó. Téró Yesu d̄ópóló netéro eleké deyaaloé? yóló, fo dokaai felepó. ⁵ Atéro, fo dokóló kemetēpa, h̄ekese duraalu *moni*-né ̄a dupuyaalopó, yóló mulalepó. ⁶ Atéro, Judas-né wisirapó depa, so wh̄i touróló bitinitere sukamó Yesu d̄ópóló naase tūapaae mulaaire t̄u kekitu betalepó.

Yesu ama yó matere wh̄irapetamo siki bemó bitu ̄la nale fo

(Mat 26:17-30, Mak 14:12-26, Jon 13:21-30, 1Ko-rin 11:23-25)

⁷ Kale bosene fele be dē kisipa mutu, fopei *bred* o deyóló nokole be dēmó bet̄a *sipsip* hupu male dóló, Talepaae simó suk̄ulaa daróló melaaire be dē sókó walepó. ⁸ Téró, Yesuné Pitaro Jon-tamo dotonaai duraalu, “Diaamo fóló, kale bosene fele be dēmó deyóló naaire ̄lakó taleyóló mulaai fae,” yalepó.

⁹ Ti fo depa atimaamoné ̄apaae woseturaalu, “Naao kisipané ai ̄la-a, d̄amoné momó taleyóló mul̄ópóló de?” yalepó.

¹⁰ Ai fo depa ama duraalu, “Diaamo ai be hulua tūamó sókó f̄elalemó, wh̄i bet̄a w̄ei wuti beleyóló t̄umó diaamotamo hokolaa yaalo ai ape. Téyaalopa ̄a sya fóló, fole be dolopaae diaamokélé

buó deyaē. ¹¹ Téró, ai be talepaaē etei fo yae. Yó matere wh̄iné ȳapaaē duraalu, “Ȳalo yó matere wh̄irapetamo bosene fele be d̄emó, ɔ̄la deyóló naaire be kekó momó donoróló muló betere?” yóló, wosae yalepó,” yalepó. ¹² Aténalemó, ama diaamopaaē óté taoró doasi be ke yó melaalo ai ape. Ai be ke dolomó betaaire ni fake ó mepaaē ɔ̄la ɔ̄lakélé fea s̄umó donoróló muló betepa ke-laalo ai ape.

¹³ Atétepa atimaamo fóló kelalemó, Yesuné yale fo motóró epa kelalepó. Atéró bituraalu, kale bosene fele be d̄emó atimané deyóló naaire ɔ̄la aimó donoróló mulalepó.

¹⁴ Atéró, kale ɔ̄la naaire suka kele sókó wapa, Yesuné yale fotóró mo epa kelalepó. Atéró *apose* wh̄irapetamo ɔ̄la nokole ni fake tómó booperó bitu ɔ̄la nuku beterepó. ¹⁵ Atéru, ama atimapaaē duraalu, “Ē doasi sek̄ saaire ala feleke depa, kale bosene fele be d̄emó detere ɔ̄la d̄a bet̄amó nokoletiné ē mo doasi h̄ekese dapó. ¹⁶ Ti ȳalo dīapaaē i dere ape. I bosene fele be d̄emó detere ɔ̄la ē néli h̄ale bitiré fóló, Kótóné t̄eteróló kaaē tare āmó mió i ɔ̄la detere ala bete dokonatepa, ti momó naalo ai ape,” yalepó.

¹⁷ Atéró, Yesuné *kap* wuti sóró taru, Tale Kótópaaē mo kée yalepó. Atéró mótu, Yesuné atimapaaē duraalu, “I matere w̄ei tao sóró, dī fea n̄osu deté fóló, kemerae. ¹⁸ Ti ȳalo dīapaaē mo i dere ape. Mió i nokole *wain* képi w̄ei momó kaaē néli h̄ale bitiré fóló, Tale Kótóné t̄eteróló kaaē tare ala sókó wale sukamó momó naalopó,” yalepó.

¹⁹ Téró, ama *bred* o bula tao sóró Kótópaaē mo

kée yóló, terekée daalu yóló ʒnirótu duraalu, “Ita, ʒalo tiki diámó i matere ape. Térapa, diʒané ʒ kisipa muóló nukulé fu betae,” yalepó.

²⁰ Atéró, atima ʒla nóló kemetepa, kale yale kaae w̄ei wuti tao sóró taru duraalu, “I *wain* w̄eita, Kótóné ama so wh̄i tao saalopóló, kisi yóló mulale fo diriróturaalu, diʒ tao saai sunée farale ʒalo sameapó. ²¹ Téretei, i ni fake tómó ʒtamo betámó ʒla nuku betere wh̄inétei, ʒ d̄ópóló eleké deyaalopó. ²² Téyaalotei, Wh̄iné Naalema i ala ȳópólópó yóló, Kótóné tukóló muló betere fo mo dokonóturaalu eraalo ai ape. Téyaalotei, Wh̄iné Naalema d̄ópóló eleké deyaaire wh̄i bet̄a mo doasi sek̄ei ala saaireteiné k̄lerapó,” yalepó. ²³ Ti fo depa, ai ala-a né yaai dée yóló, atimasisitei u wosene i wosene du betalepó.

²⁴ Atéró kale dere kaae, ama yó matere wh̄irape atimasisi doasi topo wh̄i-a, de betaai dée yóló fonétei alale su betalepó. ²⁵ Tétepa Yesuné atimapaee duraalu, “Kale Juda meire fake t̄eteróló kaae tare topo wh̄irapénémo so wh̄i t̄eteróló kaae tan̄ópóló, sóró beteró betere wh̄irapeta doasi néli wh̄i bitu, so wh̄i fea tao sóró wisi ala erótu betere wh̄irapepó dua dapó. ²⁶ Tépatei, diʒ atei kaae ala ini, diʒ tuámótamo doasi topo wh̄i betepa, ti mo ketei kaae betóo, diʒ t̄eteróló kaae tare topo wh̄i ti kutó diratere wh̄i kaae betóo yae. ²⁷ Ti noatepae, ʒla deyóló nokole sukamó doasi doi mole wh̄irapéné noa ala dua de? Ti atima doasi wh̄irape ni fake tómó bitu, ʒla maaté nuku beterepé, kutó diratere wh̄i kaae bitu, ʒla biliyóló maleta dua de? Meipó. Ai doasi doi mole wh̄irape

atima ai ala dumi, ni fake tó mó bituraalu, ɔla maaté nukua dapó. Té patei, ɛta diɔ feané kutó diratere whi kaae betera pó. ²⁸ Diɔta, ɛpaae sekɛi ala wou betepatei ɛ taaróló botokó feni, ɛtamo betámó bitiré walepó. ²⁹ So whi tɛteróló kaae tanópóló ya lo Ayané ɛ sóró beterótu yale kaae, ya lokélé diɔ so whi tɛteróló kaae tanópóló, sóró betera tápó. ³⁰ Até dapa, ya lo tɛteróló kaae tare ala tuámó ni fake tó mó bitu, ɔla nóló, wɛi nóló du betaalopó. Atéturaalu, doasi topo whi betere tikimó bitu, 12 Israel fakerapetamo diaaɔ fo tokóló tale yaasepóló, sóró betera tápó.

Pitané yaaire alamó Yesuné yale fo

(Mat 26:31-35, Mak 14:27-31, Jon 13:36-38)

³¹ Saimon, Saimon-ó, ya lo ya paae i dere fo wosae. Mepaae so whiné *whit* ke buléro kelaai fumi sukutu dere kaae, ya tuámó noa alakó muléro kaae kelaairaa lu, Satan-né ya paae wosene walepó. ³² Té ya letei Saimon-ó, naao kisipa tiki tiró betere ala taaróló haepaae derepaosóró, ya lo ya mó momaralepó. Naao kisipa tiki feteyóló, ya ɛ beterepaae momó wapata, ti naao norape tao sóró fotokɔ bulaasepé,” yalepó.

³³ Té tepa Pitané ɔpaae duraalu, “Tale-ó, ya *dipula* betera tepa ti ɛkélé wusuró beteroó, sukutepakélé ti wusurótóró sukɔ enérápó,” yalepó.

³⁴ Ai fo depa Yesuné duraalu, “Pita-ó, ya lo ya paae i dere ape. Mió i be demó wɔ *kakaruk* bané hale yaaipatei, naao ɛ kisipanipó fo sore félimó yaalo ai ape,” yalepó.

³⁵ Téró, Yesuné atimapaee woseturaalu, “Yalo diã dotonale sukamó *moni* butere be ó hõleke be ó me òlakélé sóró fae ini, hãle fõpóló doteyalepó. Téyaletei, diã me òlakó mei yaleé?” depa atimané duraalu, “Meipó,” yalepó.

³⁶ Ai fo depa, ama atimapaee duraalu, “Mió diaaõ *moni* detere be mupa sóo, yokélé sóo yae. Bóe dele sepakekótamo munipa, ti diaaõ tómó deró betere kuti sokóló, me whĩtamo dotonóló sepake betakó dupuyae. ³⁷ Ti noatepae, i fo aseýóló muló beterapó. Dowi ala dere whĩrape dosãaturaalu, akélé touróló dosãayalepó. Yalo diãpaae i dere ape. Ai ere fo dokonóturaalu epaae mo eraalopó. Mo dapó. Emó kisipa muturaalu, Kótóné kóló whĩrapené asemó ere forape fea dokonóló epaae motóró eraalo ai ape,” yalepó.

³⁸ Téró, ama yó matere whĩrapené epaae duraalu, “Tale-ó, ðané bóe dele sepake tamó i tarapa kelere?” depa, ama duraalu, “Ai supó,” yalepó.

*Yesu Olip dumó daalu moma yale fo
(Mat 26:36-46, Mak 14:32-42)*

³⁹ Atéró, Yesu a belapaae sókó doropóló ama dua dere kaae, *Olip* du sokorepaae fupa, ama yó matere whĩrapekélé, a sya felepó. ⁴⁰ Atéró, aimó sókó fóló, ama atimapaee duraalu, “Sũ sere alané diã dowi alamó dée nalaqsórõpa, Talepaae momatu betae,” yalepó. ⁴¹ Atéró, a atima daale tiki sawa taaróló fóló, bukutiri teýaró bituraalu momayalepó. ⁴² Ama i moma yalepó. “Aya-ó, naao kisipané epaae i waaire sekõi ala waqsóró sesé yaai depa ti té yae. Yalo kisipané enére ala yaalomeipa, naao yaai kisipa mole ala betã

erae,” yalepó. ⁴³ Atétepa, ó hepen bemó betere *ensel* betá dorowóló ą tao sóró fotokọ bulalepó. ⁴⁴ Atéro, Yesuné ama hosaa tuámó mo doa sekené sinitapa, Alimapaae mo fotokọi moma yalepó. Atéturaalu, ama tikimó fosono doasi fąke kaae dorowóló, haepaae fu betalepó.

⁴⁵ Atéro momayóló kemetepa, ą turukó holóló ama yó matere whįrape beterepaae momó fesaae fóló kelalemó, atima dekené sukuturaalu fotokọkélé meiyóló, noke foposaa yó molepó.

⁴⁶ Atépa ama atimapaae duraalu, “Dią noatepa, noke foposaa yó mule? Sų sere alané dią ąlisóró fóló, dowi alapaae só deraqsóró, turukó holóló Talepaae momatu betae,” yalepó.

Judas-né Yesu bóe whįné naase tuqpaae mulale fo

(Mat 26:47-56, Mak 14:43-50, Jon 18:3-11)

⁴⁷ Ama fo kemeni hąle du betepatei, so whį mo hąle ọla kaae walepó. Kale yó matepa wosetere 12 whįrapekó betá whį Judas-né Yesu kọló tukó naai, ą daale felekepaae walepó. ⁴⁸ Téyaleteti, Yesuné ąpaae duraalu, “Judas-ó, kale Whįné Naalema dọpóló, eleké deyóló kọló tukó naai wou de?” yalepó.

⁴⁹ Até yaaire ala, Yesuné ama yó matere whįrapené kolóló ąpaae duraalu, “Tale-ó, dąné i tare sepakerapené deyaróe?” yalepó. ⁵⁰ Téro, atimakó betá whįné mo so whįmó momaratere doasi topo whįné kutó diratere whįné tururó wosęli sąae deralepó.

⁵¹ Tétepa Yesuné duraalu, “Ai ala me momókó yaqse!” yalepó. Atéró, Yesuné kale whjné woséli ama ere kaae eralepó.

⁵² Téró, Yesuné mo so whjmó momaratere doasi topo whjrapekélé, momatere be kaae tare whjrapené topo whjrapekélé, whj disirapekélé fea woló, ą tawaai boperóló daae molepó. Atépa ama duraalu, “Diaaq ęta, i hae kwia tęteróló kaae tare doasi topo whjrapené kaae tare alarape fasó saai, bóe daai ąlisóró fole whjpóló, sepakeró nópulutamo tao diliki yóló, ę tawaai wou de?

⁵³ Take ę diątamo momatere be tuąmó bitua yaletei, diaaq ę daai tanipó. Ténitei, mióta, dilikire alané tęteróló kaae tapa, diaaq yaaitere ala yópóló, tukóló muló betere sukakelemó dapó,” yalepó.

Pitané Yesu tuęnipó yale fo

(Mat 26:57-58,69-75, Mak 14:53-54,66-72, Jon 18:12-18,25-27)

⁵⁴ Téró, atimané ą tawóló so whjmó momaratere topo whjné bepaae dapesó felepó. Atétepa, Pitakélé Yesu sya nalo taaeta deté fu betalepó. ⁵⁵ Téyaletei, ai momatere be bolaare dopóku tuą dolomó si noke yóló, atima fea simó boperóló betó mupa, Pitakélé atimatamo beterepó. ⁵⁶ Atéró ą simó beterepó, kutó diratere so seimale betąné kolóló, mo ti kikéyóló kaae taru duraalu, “I sekęta, Yesutamo betąmó kwęale whjkópó,” yalepó.

⁵⁷ Ai fo depa Pitané duraalu, “Ti senaale-ó, naao ai bope dere whjta ę mo tuękélé inipó,” yalepó.

⁵⁸ Atéró sawa betero, whi me kaené ą kolóló duraalu, “Yąkéle atimatamo kwęale whikóe?” depa, Pitané duraalu, “Ai whita ę meipó,” yalepó.

⁵⁹ Atéró, suka kele betą kemetepa kale dere kaae, whi menémo duraalu, “I sekęta, Yesutamo betąmó kwęale whikó irurapó. Ti ąkéle Kaleli whitóró mo hitipó,” yalepó.

⁶⁰ Ti fo depa, Pitané duraalu, “Diaą ai bope dere whita, demó déró ę tuęnipó,” yalepó. Ai fo deretamotóró wą *kakaruk* bané hale deremó, ama du betale fo tukó felepó. ⁶¹ Tétépa, Tale ą Pita daalepaae fetée wóló, kelené kikéyóló kaae tawalepó. Até deremó, take Talené Pita ąpaae *kakaruk* bané hale sore félimó yaaipatei, naao ę kisipanipó yaalopó yale fo kisipa muni walepó. ⁶² Atétépa, Pita ą belapaae sókó doropóló, mo doa dekené sini wole du betalepó.

*Diki tare whirapené Yesu faleyale fo
(Mat 26:67-68, Mak 14:65)*

⁶³ Atéró, Yesu botokó faqsóró, kaae tare whirapené ą doka doka duraalu faletere forape yóló deleta du betalepó. ⁶⁴ Atéró, ama kelepaa atimané kutiné kinóló dokóló ąpaae woseturaalu, “Yą né daleé? Yą dale whi dąpaae yó ąlae,” yalepó. ⁶⁵ Atéró, atimané ą faleyóló kae kae dowi forape du betalepó.

*Pailat-ró Herot-tamoné Yesutamo fo tekąle fo
(Mat 26:59-66, Mak 14:55-64, Jon 18:19-24)*

⁶⁶ Atéró, be teó dęteretamo fo tokóló tale yópóló betero betere whi disirapekélé, mo so whimó momaratere doasi topo whirapekélé, Moses-né

asere fo yó matere whĩrapekélé, fea betapaae tourale walepó. Atéro touró bitu, Yesu fo tokóló taleyópló tale dere whĩrape beterepaae dapesó felepó. ⁶⁷ Atéro atimané duraalu, “Yata, Kótóné so whĩ tetéroló kaae tare whĩ Kerisopata, ti dapaae yó alae,” yalepó. Ai fo depa, Yesuné duraalu, “Yalo diapaae depa diaaq epaae kisipa tiki tiraalomeipó. ⁶⁸ Yalo diapaae mepaae fo wosenalemókélé, diaaq tokó melaalomeipó. ⁶⁹ Téretei, mo miótóro kaae sóro kale Whĩné Naalema mo doasi fotokq bole Kótóné turu naase tuamó be-taalo ai ape,” yalepó.

⁷⁰ Ai fo depa, atima mo feané apaae woseturaalu, “Ti yata, Kótóné Naalemaé?” depa ama duraalu, “Me kae mei, diaaq mo dono ai dere ape,” yalepó.

⁷¹ Ti fo depa, atimané duraalu, “Me kae noa fokómo depa, wosaai de? Fo feata, ama kólómótóro sókó wapa dané ai wosale ape,” yalepó.

23

Yesu Pailat-né keletómó fo tokóló, filipaa ni tómó olerae yale fo

(Mat 27:1-2,11-26, Mak 15:1-15, Jon 18:28–19:16)

¹ Téró, atima aimó betó mole whĩ mo fea turukó horóló, Yesu Pailat beterepaae dapesó felepó.

² Atéro, atimané a faleyóló só derótu duraalu, “Ai whĩnéta, so whĩ feané Sisapaae *takis moni* melaqsóro sesé yóló, so whĩ kópaae alisóro fu beterapó. Tétu, amatei ata so whĩ tetéroló kae

tare topo wh̄i Kerisopó du betere alané d̄ané t̄eteróló kaae tare alarape fea dorótu beterapó,” yalepó.

³ Atétepa, Pailat-né Yesupaae woseturaalu, “Ȳata, Juda fake so wh̄i t̄eteróló kaae tare topo wh̄ié?” depa, Yesuné duraalu, “É̄pó. Naaotóró dono ai dere ape,” yalepó.

⁴ Téró, Pailat-né Talepaae momaratere topo wh̄iraperó so wh̄i featamopaae duraalu, “I wh̄i ȳalo k̄aae kelalemó, fo tokóló ̄a só deraaire bete mekéle mupa kilinipó,” yalepó.

⁵ Tétepa, atimané fo fakeyóló deteraainé duraalu, “Ai wh̄iné Judia hae kwiamó betó mole so wh̄ipaae yó matere fo wosetu, fo tiki whaa deté fu betalepó. Ama Kaleli hae kwiamó kaae sóró yó maté wóló, mió ipaae ai sókó wale ape,” yalepó.

⁶ Ai dere fo wosóló, Pailat-né atimapaae woseturaalu, “Āta, Kaleli wh̄ié?” yalepó. ⁷ Ai fo depa, atimané duraalu, “Ai wh̄ita, Herot-né t̄eteróló kaae tare hae kwiamó beterapó,” yalepó. Atéyale sukamó Herot ̄akélé ai Jerusalem be hu-luamó betepa, Pailat-né Yesu Herot beterepaae dot̄eyalepó.

⁸ Téró, Yesu atéro sókó wapa kilituraalu, ̄a mo hajné sinalepó. Ti noatepae, ama mepaae kelemei alarape erótu beterapó deté fole fo woseturaalu, Yesuné kelemei alakó eratepa kelenée yóló, kisipa mutu betaleteinépó. ⁹ Atéro, kale Herot-né ̄apaae kae kae forape woseté feletei, Yesuné fo bet̄akélé tokó menipó. ¹⁰ Atétepa, so wh̄imó momaratere doasi topo wh̄iraperó Moses-né as̄ere fo yó matere wh̄irapetamoné ̄a faleyóló

só deratere fo du betalepó. ¹¹ Téró, kale Herot-ró ama diki tare wh̄irapetamoné ʔ faleyóló duraalu, wisi wisi kuti deróló Pailat beterepaae momó fesaae fópóló dotonalepó. ¹² Upuléta, kale Herot-ró Pailat-tamo bóe dóló betaletei, mió i ala yale sukamó fulumu wh̄i aleyóló beterepó.

¹³ Atéró, kale Pailat-né so wh̄imó momaratere topo wh̄irapepaaekélé, so wh̄i t̄eteróló kaae tare topo wh̄irapepaaekélé, so wh̄i feapaaekélé ape yalepó. ¹⁴ Atéró touró betepa, ama atimapaae duraalu, “Diaaʔ i wh̄ita, take t̄eteróló kaae tare doasi topo wh̄irapetamo bóe daai ʔlisóro fole wh̄ipóló, ʔ beterepaae dapesó wapa diaaʔ keletómó ʔalo ʔ tuamó daaló bitu, me haşókó fele alakó muléro kekalemó meipó. ¹⁵ Herot-nékélé taleyalemó, dowi ala mekélé munipa, ama d̄apaae ai dotonale ape. I wh̄i mo ti sukópóló dele alata, me noa ala itikimó daai de? ¹⁶ Térapa, ʔalo ʔ fokosó sóro haʔe fópóló dot̄eyaai dapó,” yalepó. ¹⁷ (-)

¹⁸ Atimané mo bet̄a k̄ló daae fóló fo fakeyóló duraalu, “Ai *dipula* betere wh̄i Barabas d̄a beterepaae wópóló dotonóturaalu, i seké dóló alurae,” yalepó. ¹⁹ Ti noatepae, ai wh̄i Barabasta *Gavman* wh̄i betaai dapóló bóe dóló wh̄i dupa, ʔ *dipula* beteralépó.

²⁰ Pailat-né ama kisipanéta, Yesu haʔe fópóló dotonaaيراalu, so wh̄ipaae momó yalepó. ²¹ Téyaletei, atimané mo doa fo fakeyóló duraalu, “ʔ filipaa ni tómó dóló olerae, ʔ filipaa ni tómó olerae,” du betalepó.

²² Téró, ama sore dakoróló atimapaae duraalu, “I wh̄iné noa dowi ala yalemó daaloé? I wh̄i

daaire bete me munipó. Téreteiné, ɣalo ɔ dóló susupuróló, hɔle fǒpóló dotonaaɪ dapó,” yalepó.

²³ Téyaletɛi, atimané fo fake dekéro yó taru, doasi seýóló duraalu, “A sukǒpóló filipaare ni tómó dóló olorae,” yóló, dere foné Pailat-né fokélé só deralepó. ²⁴ Atétepa, Pailat-né kisipanéteɪ taleýóló wisirapa téyae yóló, dotopoi fo du betere so whɪpaae melalepó. ²⁵ Atéro, ama whɪ betɔ dóo, teɛteróló kaae tare alamó topo whɪrapetamo bóe dóo deremó, *dipula* beteraɪe whɪ hɔle fǒpóló dotonae yalepó. Téro, Yesupaae atimané kisipa mole ala erǒpóló, doasi diki tare whɪrapené naase tuɔpaae melalepó.

Yesu filipaa ni tómó olerale fo

(Mat 27:32-44, Mak 15:21-32, Jon 19:17-27)

²⁶ Atéro atimané Yesu duóló sóró fu betalemó, Sairin be hulua whɪkó Saimon ipu bemó biti doasi be huluapaae derepaai wou betepa tu tuɔmó hokolaa yalepó. Atéro ɔ tawóló Yesu oleraaire filipaa ni beleróló, Yesuné sisómó fǒpóló yalepó. ²⁷ Atétepa, so whɪ mo feané ɔ sya felepó. Atéro, sorape feané sya fu bitu kǒlené sinituraalu, mo dekené sukɪ wole fo deté wou betalepó. ²⁸ Até deté wou betepa, Yesu fetée anóló duraalu, “Jerusalem senaalerape-ó, diaaɔ ɛ wolekesé, diɔsisiteɪ wole yóló, diaaɔ naale senaalekélé wole yae. ²⁹ Ti noatepae, take waaire sukamó diaaɔ eteɪ fo yaalo ai ape. Mepaae sorape naale senaale deni, hɔle ni daale sorapekélé, naale senaale meiyóló hɔle betere sorapekélé, naale senaale awɔ menitere sorapekélé, hajiné sinóló ai betere ape.

³⁰ ‘Ai sekęi ala wale sukamó atimané i fo yaalopó.
“I daae mole ulupaae dukó dorowóló dą
tęirae,” yaalopó.

Du sorokó mole hae durapepaaekélé, kęae
dorowóló dą husuręale dere ape yaalopó,
erapó.

³¹ Ti kisi daale nipaae atei ala depa, ti sélitere
nipaae noa kaae sekęi ala eraalóé?” yalepó.

³² Kale Rom *Gavman*-né yóló muló betere fo
tukóló dowi ala yale whę tamokélé ątamo betamó
dóló oleraa i dapesó walepó. ³³ Atéró, atima
sókó wale tikiné doita, whęné topo diripó doi
mulapó. ą sukópóló aimó atimané filipaa ni
deyóló oleralepó. Atéró, me whę ama turu naase
dęró oleróo, me whę ama fę naase dęró oleróo,
yalepó. ³⁴ Atéró Yesuné duraalu, “Aya-ó, ę dele
whęrapené saaire dowi ala kwia naao hęle ke-
merae. Ti noatepae, atimané du betere alarape
atima wisiyóló kisipanipó,” yalepó. Atéró, ati-
mané ama kuti taleyóló saairaalu i ala yalepó.
Ni fakerape tao sóró fesekeké horótua yalemó,
me whęné doi ó siri moletei sóró dorowapa, ai
whęnétoró sua yalepó.

³⁵ Atéró kale so whę fea mo tumó kese ęlu
yóló daae molepó. Kale tęteróló kaae tare
topo whęrapené Yesu faletere fo yóló duraalu,
“Mepaae whę aluyaqsóró ama mo wisiyóló tao sua
yaletei, ątamo Kótóné sóró sóró, beteró betere
whę Kerisopata, ti amatei ą tao sópóló yae,”
yalepó.

³⁶ Atéró, kale doasi diki tare whęrapekélé, ą
oleró betere tikipaae wóló daae muluraalu, faletu

betalepó. Atéroró, atimané amó betā kēlaa wale *finika wain* wēi ą nae yóló melalepó. ³⁷ Atéroró ąpaae duraalu, “Yątamo Juda so whjné doasi topo whj̄pata, ti yą sinaqsóró naaotei tao sae,” eneta du betalepó.

³⁸ Yesuné ama toporó beteremó oleró betere aseḡmó i fo erapó.

ITA, JUDA FAKE SO WHJ̄ TĚTERÓLÓ KAAE TARE DOASI TOPO WHJ̄PÓ.

³⁹ Téro, kale dowi ala du betepa dóló ol-erale whj̄ tamokó betāné ą faleyóló duraalu, “Yą Kerisopata, ti naaotei yą taosu dąmokélé tao sae,” yalepó.

⁴⁰ Téyaletēi, me fakeró oleró betere whj̄né me whj̄ foné sóró duraalu, “Dąmó sukutereteita, mo dąmoné yale dowi alamó kwia tokó mótu dereteiné mo donorapó. Téretei i whj̄ta, me dowi alakélé meipatei, dą fea betā ala yóló sinitapa, yą Kótópaae winié? ⁴¹ Ti noatepae, dąmota dąmoné yale alamó i sinitere ape. Téretei i whj̄ta, dowi ala mo betąkélé inipatei, hąle dóló oleró beterapó,” yalepó.

⁴² Téro ama duraalu, “Yesu-ó, yą naao tĚteróloró kaae tare be tuąpaae furaalu, ę kisipa keteraqse,” yalepó.

⁴³ Ti fo depa, Yesuné ąpaae tokó mótu duraalu, “Yąlo yąpaae mo i dere ape. Miótitei, yą ętamo mo kokoné sukj̄ be wisinaalemó fóló betaalo ai ape,” yalepó.

Yesu sinale fo

(Mat 27:45-56, Mak 15:33-41, Jon 19:28-30)

⁴⁴ Atéro suka tuamó daapatei, hae kwia fea diki yalepó. Atéro dikipatei bitiré fóló, 3 kilok suka tó daane folepaae kemeyalepó. ⁴⁵ Ti noatepae, sukané dę sukąleteiné, diki yó tawalepó. Talepaae momaratere be satałeróló oleró betere kuti ama hałetei tuamótóro teketé doropóló, haepaae sókó deralepó. ⁴⁶ Atétepa, Yesuné fo fakeyóló duraalu, “Aya-ó, yało kepe bete naao kaae tawasepóló, ya tuapaae i mulatere ape,” yalepó. Atéro ama ai fo yóló kemetepa, ama fomo sókó fóló ą sukąlepó.

⁴⁷ Atétepa, kale diki tare whırapené topo whıné ai yale ala kolóló, Kótóné doi hale sóro horótu duraalu, “Mo dapó, ita mo whı wisinaale ai sukırapó,” yalepó. ⁴⁸ Atéro, betapaae touró betere so whıné kelale alarape atima bepaae momó fesaae furaalu, naao téyae yóló dekené sinité fu betalepó. ⁴⁹ Téyaleteti, mepaae ą kisipare whıraperó ątamo Kaleli haemó betamó betóló wale sorapetamo atima mo tumó daae mulu, ai dere alarape kaae dilikiyóló yó molepó.

Yesu dourale fo

(Mat 27:57-61, Mak 15:42-47, Jon 19:38-42)

⁵⁰ Atéro ai Judia hae tuamó tene Arimatea be whıko Josep beterepó. ąta, mo whı wisinaale naameyóló dua betepa, Judia hae kwiamó betó mole so whı haşókó fupa fo tokóló taleyópoló sóro betero betere whıpó. ⁵¹ Ai sekénéta, mo whıné dere alaró mo tikiné dere alatamomó ama mo wisirapó kiswa mutumipó. ąta, Judia hae kwiamó tene Arimatea be huluamó walepó. Tėru, ą Kótóné teteróló kaae tare aqmó mole ala wópoló

kaae tawóló beterepó. ⁵² Atéró, kale wh̄i ʔ Yesuné tiki saaitapóló Pailat-paae wosene felepó. ⁵³ Téró, kale wh̄iné Yesuné tiki tokóló muló bituraalu, mo dēi kutiné bopeyóló wh̄i betʔkélé munénire kapo dolomó mulalepó. ⁵⁴ Atima s̄a naai tukóló muló betere be dē dótóro sókó waai depa, ʔla ʔla donoróló mulatere be dēmó ai alarape yalepó.

⁵⁵ Atéró, mepaae Kaleli hae kwiamó Yesutamo wale sorape Josep-né Yesuné tiki mulaai fupa, neyóló mulatéró kelaairaaalu, atima Josep s̄ya felepó. ⁵⁶ Téró, atimané bepaae fóló kale felé k̄laa wale fetera kaae ʔlaró felé k̄laa wale *wel* wēitamo taleyóló munalepó. Téyalet̄ei, kale yóló muló betere fo tikinépa, Talepaae moma yaai dapóló tukóló munale sukamó s̄a nóló betalepó.

24

Yesu kepaayóló fele fo

¹ *Fula* kaae sere be dēmó, mo h̄ikati kale sorapéné felé k̄laa wale ʔlarape sisóló wh̄i mulale dou tópaae felepó. ² Atéró atima fóló kelalemó, wh̄i dou t̄u kinale kane fake biliyó faló beterepó. ³ Atépa, atima kane dolopaae buó deóló kelalemó, Tale Yesuné tiki munipó. ⁴ Atépa, neȳalerópóló atima k̄sipa teketu beteremó, mo kasa kasai kuti deró betere wh̄i tamo atima daae mole uté dēró sókó wóló daalepó. ⁵ Até deremó, kale sorape atima winé sinitu, kelepaa haepaae hemée deyóló betó molepó. Tépa, kale wh̄i tamoné atimapaee duraalu, “Suk̄ale wh̄i douró betere tikimó, betere wh̄iné noatepa keketé kutu bitu de? ⁶ Ti noatepae, ʔ aimó muni kepaayóló falapó. Take dīʔ Kaleli

haemó bitu ama diɔpaae yale fo diaaɔ kisipa munié? ⁷ ‘Whɛné Naalema mepaae dowi ala dere whɛrapené naase tuɔpaae mulaalopó. Atétepa, atimané ɔ filipaa ni tómó oleróló sukutepa, sore be demó ti ɔ momó kepaayóló betaalopó,’” yalepó. ⁸ Téro, atimané ama yale fo mopóló kisipa yalepó.

⁹ Atéro, atima whɛ dou tópaae fi fesaae wóló atimané kelale alarape kale 11-whɛraperó mepaae whɛrapetamopaae yalepó. ¹⁰ Ai sorapeta, Mak-tala sokó Mariakélé, Joanakélé, Jems-né hama Mariakélé, mepaae sorapekélé, atima fea betó mulu, kelale alarape ama *aposel* whɛrapepaae yalepó. ¹¹ Téyaleteti, kale sorapené yale fo mo dapóló kisipa tirénipó. Ti noatepae, atimané kapala fo detere nisi yalepó. ¹² Téyaleteti, Pita ɔ mo hapale sururu yóló fóló, whɛ dou tómó sókó felepó. Atéro ɔ dou dolopaae fóló kelalemó, ama tiki bopeyóló mulale deɪ *linen* kuti maaté demó mupa kelalepó. Atépa ɔ momó bepaae fesaae furaalu, i noa ala yalerópóló kisipa tekété fu betalepó.

Emeas bepaae fole tɔ tuɔmó yale fo

¹³ Atéyale sukamótóro atimakó whɛ tamo Emeas bepaae faai tɔ tuɔmó fu betalepó. Ai Emeas be taaróló Jerusalem be huluapaae fole dɔleta, 11 *kilomitapó*. ¹⁴ Atimaamo tɔmó fu bituraalu, kale yale alarape fea sɔraté fu beterepó. ¹⁵ Atimaamo até deté fu betepa, Yesu tɔ tuɔmó sókó wóló, atima fea betɔmó fu betalepó. ¹⁶ Até yaleteti, atimaamoné Yesupóló kisipa yaɔsóro, me ɔlané atimaamoné kele seraaralepó.

¹⁷ Atéro fu bitu, Yesuné atimaamopaae woseturaalu, “Diaamo ai-a noa fo deté fu bitu de?” yalepó. Ti fo depa, atimaamo fu betaletei, kelepaa humula yóló kejyóló daalepó. ¹⁸ Atimaamo fu betere me whi Kliopas-né apaae duraalu, “I be demó yale alarape so whi feané kisiparapa, yaṭa Jerusalem be huluapaae wale whié?” yalepó.

¹⁹ Ai fo depa ama apaae woseturaalu, “Noa alamó de?” yalepó. Ti fo depa atimaamoné duraalu, “Nasaret be hulua whikó Yesupaae erale alamó dapó. Ti noatepae, aṭa Kótóné kóló whi bitu, ama dere foró dere alatamo Kótóné kele tómókélé, so whi feané kele tómókélé, mo doasi fotokotamo du betalepó. ²⁰ Atéro so whimó momaraterere topo whiraperó ḍa teteróló kaae tare whirapetamoné a sukópóló dae yóló, doasi *Gavman* whirapené naase tuapaae mulalepó. Atétepa, atimané a filipaa ni tómó sinópóló ol-eralepó. ²¹ Téyaletei, Israel fake so whi dupuróló tao saaire whipóló kisipa mualepó. Ai maaté mei, ai ala yóló betepa be ḍe tamo kemeyóló, soreraterere be ḍe ti mió i ape. ²² Ai fotei me ipó. ḍa betámó kotere sorape sore mo hikati kale whi dou tópaae fóló, mepaae kelale alarape depa wosetu ḍa kilita yalepó. ²³ Kale sorape fóló kelalemó ama tiki munipa, *ensel*-rapené Yesu kepaayóló beterapóló atimapaae yale fo fea ḍapaae ene walepó. ²⁴ Téro, ḍané fulumu whirape atimakélé fóló kelalemó, kale sorapené ene wale ala motóro epa kelalepó. Téyaletei, atimané a betā kilinipó,” yalepó.

²⁵ Ama atimapaee duraalu, “Diaamota, take Kótóné ama kóló wh̄irapené deté wale fo wosóló kisipani, ketei kaae kisipa tiki okokoru kutiri hapólu ai ererapó. ²⁶ Kótóné so wh̄i t̄eteróló kaae tanópóló, sóró betero betere wh̄i Keriso ą doasi doi muaaire ala tuąpaae sókó faairaalu, folosóro ai sekei alarape salepó. Ai alata haşókó faalomei, mo yaalopó ere fo dokonóturaalu yalepó. ²⁷ Mo take Moses-né asere fomó kaae sóró wóló, Kótóné kóló wh̄irape feanékélé asere fo beteta, emótóro erapóló amatei haķearóló yó malepó,” yalepó.

²⁸ Atimaamo fole bepaee felekemó sókó faai, tu aupalomó fu betalepó. Téyaleteti Yesu ąta, ai be hulua bosenyóló saletópaae faai fole aą yalepó. ²⁹ Atéro ą fupatei, kale wh̄i tamoné ą kejróló duraalu, “Felekemó be diki yaai dapa, da imó fiyaalopa siépe,” Depa atima fea fiyaai felepó.

³⁰ Atéro, ą atimaamotamo ąla naairaalu, ąla nokole ni fake tómó beterepó. Atéro bitu, ama *bred* o bula betą tao sóró Alima Kótópaae mo kée yóló terekeyóló nópóló sóró malepó. ³¹ Téro, atimaamoné kele seraaretei fişaae furaalu, kale seké airapóló diriyóló kisipa yalepó. Téyaletamo atimaamoné kele ąlinameróló ą aluyó deyalepó. ³² Tétepa, atimaamosisitei duraalu, “Da tumó wouraalu, asemó ere fo damopaae yó matepa, wosóló hosaamó si kaae dukuraalu mo feléné sukąlepó,” yalepó.

³³ Atétepa, mo ai fapotóro atimaamo Jerusalem be huluapaae momó fesaae felepó. Téyalemó, mepaae 11- *aposel* wh̄iraperó atimatamo betere so wh̄irapetamo fea betąpaae touró betepa ke-

lalepó. ³⁴ Atéru, atimané kale wh̄i tamopaae duraalu, “Ai mo dapó. Tale kepaayóló furaalu, Saimon beterepaae wapa ama mo kelalepó,” yalepó. ³⁵ Téró, kale wh̄i tamo t̄u tuəmó wou bitu yale alaró *bred* o bula tekeyóló atimaamo matepa, ą kisipa yale alatamo atimapaae yalepó.

Yesu ą ama yó matere wh̄irapepaae yó male wale fo

³⁶ Atéró, ai fo du betepa Yesu atima betó mole tuəmó sókó wóló atimapaae duraalu, “Hosaa muni deyóló mo dua betere ala dią tuəmó mulóppóló yae,” yalepó.

³⁷ Atei fo deremó, atima kisipané kepené dere nisi yóló kilita sókó furaalu, winé sinalepó.

³⁸ Atétepa, ama atimapaae duraalu, “Dią wíturaalu kisipa tamo muóló, hosaa noatepa w̄itu bitu de? ³⁹ Ẽtóró mo h̄tipa, yalo naaseró hótamo diaaą kelae. Ti noatepae, kepeta miró diritamó bunipa, ę ai ala erémóló olaa yae,” yalepó.

⁴⁰ Ama ai fo yóló kemetepa, atimapaae ama naaseró hótamo yó melalepó. ⁴¹ Téyaletei,

atétere ala kilituraalu, h̄kesetere alaró, siratere alatamo atima tuəmó mualetai, ąta Yesupóló kisipa tirénipó. Atétepa atimapaae woseturaalu, “Dią imó bitu, naaitere ọlakó mule?” yalepó.

⁴²⁻⁴³ Tétepa, atimané simó biliyale ya kwia ą matepa tao sóró, atimané kaae tapa nalepó.

⁴⁴ Atéró ama atimapaae duraalu, “Moses-né as̄ere fokélé, Kótóné k̄oló wh̄irapené ere fokélé, Sam *buk*-mókélé, ęmótóró kisipa mutu ere fo fea dokonóturaalu mo eraalopóló ę diątamó betəmó bitu ai yale ape,” yalepó.

⁴⁵ Kótóné ašemó ere fo fea kisipa yópoló, ama atima kisipa wisi mulalepó. ⁴⁶ Atéro ama atimapaee duraalu, “Kale ašemó ere fo i ape. Kótóné ama so whi fea tetéroló kaae tanópoló, sóró beteró betere whi Kerisota, doakale sekei alaró susupui alatamo sóró mo ti sinaalotei, tamo be de kemeyóló sore be demó a momó kepaayaalopó. ⁴⁷ Jerusalem be huluamó kaae sóró hae kwia feamó betó mole so whipaae yalo doimó i fo yó maté kweyaalopó. Diaaq dere dowi ala taaróló kisipa feteyóló wapa, ti diaaq dowi ala kwia yalo hale kemeraalopó. ⁴⁸ I alarape depa kelalepóló so whipaae yó melaaire whirapeta, ti diatoró ai ape. ⁴⁹ Take yalo Ayané diq melaalopóló mulale qla yalo diappaee dotonaa kisipa mutapó. Téyaalopa, diq ai be huluamó bitiré fóló, mo óté taoró mole doasi fotokóné diq kuti kaae bukurqle dorowópóló, kaae tawae,” yalepó.

Yesu i hae taaróló ó sqpaae dapesó holale fo

⁵⁰ Téro atima wópóló, api folosóró Betani be huluapaae felepó. Téro, ama naase horóló fonétei atima wisiralepó. ⁵¹ Atéro, atima wisiraterere fo du betepatei taaróló, Alimané a hepen-paae dapesó holalepó. ⁵² Téro, atima bukutiri tearó bitu, Doa Tale-ó, yóló ama doi sóró horaté hekesetamo Jerusalem be huluapaae momó fesaae felepó. ⁵³ Atéro, atima momatere bemó bitu, Kótóné doi hale sóró horatere ala suka fea deté fu betalepó.

Yesu Kerisoné So Whi Tao Sere Kisi Fo Wisi
The New Testament in the Folopa Language of Papua
New Guinea

Nupela Testamen long tokples Folopa long Niugini

copyright © 2005 Wycliffe Bible Translators, Inc.

Language: Folopa

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-20

PDF generated using Haiola and XeLaTeX on 11 Nov 2022 from source files dated 9 Oct 2020

4e9b4b04-0b47-5583-9c4d-fb82cfdd65c2